

सिलसिलुवार
क्याह क्याह वनु?



म.क.रैना

सूची

व्यलायती गॅर	३
खज़ानु	६
स्वर्ग तु नरुक	१०
जुप्त तु ताक	१४
पास तु फेल	१७
कैटरपिलर	२०
डुडु	२५
सुह शिकार	३०
नबु लालु	३४
तालेह	३८
पॅत्युम बाज़	४६
त्रु-लूर	५०

व्यलायँती गँर

रॉत्य रातस आयि नु मे नैदुरय। न्यसुब रॉच्युय गोस बु बेयि थोद वँथिथ तु अनिगटि मंजुय दिच मे गरि कुन नज़र। यि गँर ऑस पंचाह वँरी प्रॉन्य। अम्युक डाइल ओस मॉलु तमुन्य रंगु तु अनिगटि मंज अथ वख्त वुछुन ओस नु सँहँल कथाह कँह। मगर बु ति ओसुस शदादु। मे ओस गरि हुंद नब्ज ग्वडय थोवमुत रँटिथ। रटुहॉ ना ? ऑखुर मे ति हय अथ नवि सरु वख्त वुछान वारु कारु त्रे वँरी गँयि। मे आसु अनि गटि मंज ति अमिचि सुचन सु साफ यिवान बोज़नु।

वुनि ऑस रॉच हुंज अकॉय बजेमचु तु पांछ बजुनस ओस वुनि स्यटाह वख। मगर मे ऑस नैदुर रॉवमुच। दिल बँहलॉयी करनु खॉतरु सन्योस बु अथ गरि। यि ऑस म्यॉन्य बुड्य बबन अमृतसरु प्यठ पंचाह वँरी ब्रॉठ अँनिमुच। गँर ऑस जान शक्लि। अथ ऑस्य त्रे कवर प्यठ तु अलारम ऑस त्यूत बडि दिवान जि पूरु मँहलु गछिहे हुशार। म्यॉनिस मॉल्य सुंदि वननु मुतॉबिक ऑस यि गँर ग्वडु प्यठय बराबर रेडियो हिसाबु वख्त दिवान, मजाल छा जि अख मिनट गछिहे पथ या ब्रॉठ!

मगर त्रे वँरी ब्रॉठ आव अथ गरि रछाह किशु। यि पेयि ताकचु प्यठ वँसिथ तु गँयि बंद। कुंजु कॅर्य कॅर्य ति चलेयि नु कँह। असि ओस मँहलस मंजुय अख जान गँडी साज़। तँम्य कॅर अथ अँदुर नेबरु नज़राह, तु कलु गिलनॉविथ वोनुन, 'यि नबा गछि नु ठीख कँह। अमिच मिशीन छि बदलय।' मे खँच शान। गछि ति किथु वँन्य ठीख ? यि ऑस थोडॉयी कांह ज़चि गँर। यि ऑस असली व्यलायतुच गँर तु यि कथ ऑस असि बुड्य बबन कसम ख्यथ वँन्यमुच।

गँडी साज़न योदवय गँर ठीख हेच नु कॅरिथ मगर ओस ज़ानन वोल। तँम्य द्युत मे बराबर नेब जि अथ कुस हेकि ठीख कॅरिथ। मे ज़ोन गँनीमथ। मे तुल पनुन यार राजु सुत्य तु वोतुस दोरान दोरान गुरगॅर्य मँहल। अति कोडुम तस गँडी साज़ सुंद पय। अँमिस कॉसिब गँडी साज़स ओस नाव व्वस्तु रज़ाक। अँमिस ओस नु दुकानाह बुकानाह कँह। यि ओस गरस मंज बिहथुय गरि शेरान। कॉसिब ओस ना ? अँस्य येलि अँम्यसुंद गरु वॉत्य तु अँम्यसुंदिस कुठिस मंज चायि, असि गँयि अँछ बाह बाह त्रख। अति आसु ताकचुन प्यठ हतु बजु गरि सजॉविथ। अजि रूसी, अजि जापॉन्य तु अजि जरमॅन्य। यि कोर मे आँकुवँनी अंदाज़। अख ज़ु बासेयम हिंदोस्तॉन्य ति। कँह आसु चलान तु कँह बिहिथ। असि कॅर व्वस्तस सलामाह। तँम्य कॅर असि कुन अँडुय नज़र तु त्रोवुन कलु बेयि व्वन कुन। दर अस्तु ओस सु अख गँर शेरनस सुत्य आवुर। गरि वोल ति ओसुस ब्रॉह कनि बिहिथ। मे दोप, यि गव जान। व्वस्तु छु पँज्य पॉठ्य व्वस्तु। पनुनि कामि सुत्य कॉम, न सवालुय तु न जवाबुय। गंटु खंड गँछिथ तुल व्वस्तन कलु थोद। खँरीदार गव ख्वश जि कॉम अंदेयि। मगर व्वस्तन वोनुस, 'अमु लाल, च़े हज़ पेयी पगाह बेयि युन, तिक्याजि अथ रॉव राथ अख सुचन तु स्व पेयि अथु सुत्य नँव गरुन्य।' खँरीदारस फीर बुथिस ज़रदी। मे कुन बुथ कॅरिथ वोनुन, 'वन हज़ क्या करव ? यि गँर ऑस म्यॉन्य मॉल्य वर्लड वारु वख्तु कांगो प्यठ अँनिमुच। छे यि असली अंप्रीकॅन्य माल मगर सुचन कति अनस ? व्वन्य हरगाह व्वस्तु रज़ाक अथ अथु सुत्य सुचन बनावि, ति लग्या जान ? कुजा अंप्रीकॅन्य गँर तु कुजा अथु सुचन ?' खँरीदारन हेच व्वस्तस गँर वापस। बुथिस खार्यन द्रुह तु द्राव।

व्वस्तु रज़ाक आसिहे वॉसि योहय पंचाह दुवंज़ाह ह्यू। मे कुन कॅरुन दोलु नज़राह तु वोनुन, 'वन तु व्वन्य क्या बनि यथ वख्तस। कति अनु बु अँमिस अम्रीकॅन्य सुन्न तु स्वय लागस ? ग्वडु छुना लूकन प्राह गोमुत। कबॉडिस ति हरगाह फुटमुन्न गॅर ह्यन मॅल्य, दपान छि यि ऑस मे फलॉन्य ऑशनावन व्यलायतु प्यु या अरबु प्यु अँन्यमुन्न। हता यारु, येति छना अस्ल अस्ल गरि मेलान! बा ख्वदा हज़, राथुय वॉन्न मंज़ूर अहमुदस नॅव गॅर। यि छनस मामन करॉची प्यु सुज़मुन्न। हता यारु क्याह वनय ? गॅर छा किनु क्याह ? टिक टिक छुस तिथु पॉठ्य गछान ज़न छि कुकिल बूल्य करान। प्यु वनय अख सिरु कथ। मे वोनुनय मंज़ूर अहमुदुन्य मामन ज़ि करॉची हुंज़ुनय गर्यन छि अम्रीकाह वॉल्य पनुन नाव लेखान तु क़ान। हयो मंज़ूरा...' व्वस्तन लोय मंज़ूरस नाद, मगर सु आव नु कॅह। व्वस्तन वोन मे ल्वति पॉठ्य, 'सु आसी यारन निश गोमुत नॅव गॅर हावनि।' मे कोर कलु सुत्य तसुंजि प्रथ कथि आंकार। मे ऑस ना पनुन्य गॅर शेरुनावुन्य! बु ओसुस दिलु मँज़ी सॉचान ज़ि खबर कुस बद-रद वनि यि म्यानि गरि। बु गोस त्रन तु त्रुवहन। बु ओसुस यी सॉचान ज़ि मे गॅयि व्वस्तु सुंज कथ कनन, 'व्वलु सॉ अन, त्रे क्या छुय ?'

मे कॅड खूच्य खूच्य फ्यरनु तलु गॅर न्यबर तु थॅवुमस ब्रॉटु कनि। वॉलिंजि थॅवुम थफ वॅरिथ। व्वस्तु रज़ाकन तुज यि अथस क्यथ तु वोनुन, 'बुछ तु हज़, यि गॅयि असली व्यलायतुच गॅर। अथ कुस वनि न ? बा-ख्वदा छुख कुस्मथ वोल। अज़ कल कति मेली युथ माल।' बु गोस व्वस्तु सुंज कथ बूजिथ ख्वश। बुथिस आम नोव रंग। मे वोनुमस, 'यि हज़ पेयि ताकचु प्यु वॅसिथ तु गॅयि बंद।' व्वस्तन थॅव गॅर पथर। बुथ गोस व्वजुल नार ह्यू। सु वोथ ज़न तु मे मार दिनि। दोपुन, 'यिथिस मालस छा अडु कायिर्यगी करान ? युथ चीज़ गछि तगुन रॅछरुन, नतु गॅयि क्वलि मंज़ दिन्य दॉरिथ।'

व्वस्तु रज़ाकन थॅव म्याँन्य गॅर अँकिथ कुन तु वोनुन, 'तु कति छुहँम रोज़ान।' मे वोनुस, 'बु हज़ रोज़ान बाल गार्डन।' 'अदु गछतु करतु पनुन्य कॉम। कॉल्यक्यथ यितु वारु कारु, गॅर आसी तयार।' मे दोपुस, 'अथ कॅन्न हज़ पाँसु लगन ?' व्वस्तन बुछ नु मे कुन कॅह। सु ओस ब्याख गॅर अथस मंज़ रॅटिथ खोलान। दोपुन, 'पांछ वंपयि गछन सुत्य अनुनि।' बु द्रास गरु कुन वापस मगर दिलस रूदुम फ्रुट। 'युथ नु यि अमि गरि मंज़ु व्यलायॅती सामानु कडि तु दीसी सामानु नियस लॉगिथ ?' मगर करु हॉ क्याह ? नारस दिमुहँवु नरि। अमि दूह आयि नु मे रातस नॅदरुय।

त्रेयिमि दूह वोतुस बु दुपहरन ह्यू व्वस्तु रज़ाकस निश। सु ओस बतु ख्यवान। दोपुन, 'हतु सॉ गोबराह, मुबारख छुय। चॉन्य गॅर गॅयि ठीख, मगर त्रे पेयी स्व आथवारि ताम येती थवुन्य। तु कति यिख गरि गरि योर ? बु थवय तथ बराबर टेस वॅरिथ।' मे गव दिलस तसलाह। पानस वॅरिम तॉरीफ ज़ि बु कोताह गाटुल द्रास यिथिस व्वस्तस निश यिथ। सुती सूंचुम, शायद आसुनस सुन्न तु मूजूदय, नतु वनिहे ना यि ? मे दिन्न ओरु योर नज़र। पनुन्य गॅर गॅयम नु कुनि नज़रि। बुथिस फ्यूरुम बेयि मोतुन मगर पानस द्युतुम तसलाह। दोपुम, टेस आसि ना यि बेयिस कुठिस मंज़ करान!'

आथवारि दूह वोतुस बु सुली व्वस्तु रज़ाकुन गरु। अँमिस ओस अख ल्वकुट लॅडकु सुत्य बिहिथ। तस ऑस जान नपु नपु करवुन्य मछि गॅर लॉगिथ। मे तोर फिकरी ज़ि योहय गछि मंज़ूर अहमद आसुन तु यि आसि अँमिस करॉची हुंज़ुय गॅर लॉगिथ। मंज़ूर अहमुदस आसु अथस मंज़ सरतलुवि बुरबतनि जोराह यिमन सु मश्कि प्युठ नचुनावान ओस।

व्वस्तु रज़ाकन कॅड म्यॉन्य गॅर अकि जोलनु मंज़ु तु थॅवुन मे ब्रॉह कनि। दोपुन वुछ तु क्याह छि चॉन्य गॅर गुर्य सुंघ पॉठ्य रॅथ्य पकान। मे कॅर गरि नज़राह। अथ ओस डाइल तमुन्य लद। म्यानि गरि ओस सफेद डाइल। मे वोनुस, 'त्रे हज़ छय क्याहताम गलती। यि छनु म्यॉन्य गॅर। तथ ओस सफेद डाइल।' व्वस्तन त्रोव व्वश। दोपुन, 'अहनू यारु, पज़र ह्य छु। यि मंज़ूर साँब छुना मे खानु मोल। यि छुय मे दोयिमि ज़नानि दशि गँड्य गँड्य ज़ामुत। अँमी क्या साँ तुल राथ चानि गरि हुंद डाइल तु नियन तथ टिकु वावुज बनॉविथ। वन तु क्याह वनस? तोति कोर ख्वदा साँबन रुत ज़ि अमी साइज़ुक द्राव अँकिस प्राणि गरि डाइल तु लोगुमस। नतु गॅयेयि गॅर ख्वठ ज़द।' मे तुज, यि दॅप्यिज़ ति, वदान वदान गॅर अथस क्यथ। डाइल ओस कृहुन स्याख ह्यु ति तु आवस्योमुत ति। व्वस्तन त्रॉव मे डाइलु म्वखु अख र्वपय तु चोर र्वपयि हेचनम। युथुय मे सलाम कॅरिथ वापस नेरुन ह्योत, व्वस्तन कोर मे आलव। दोपुन यि निसाँ गोबुरा पनुन अमानथ सुत्य। मे आव नु कॅह समुज। 'कुस अमानथ?' मे जवाब दिनु ब्रॉटुय तुज व्वस्तन कुनी चपाथ तु त्रॉवुन मंज़ूरस। तँम्य लोग वदुन। व्वस्तन दोपुस, 'यि छा गिंदन तमाशु? शिकस लदु, मोल लवी युतुय।' अमि पतु नियन तस अथु मंज़ु तिमु सरतलुवि बुरबतनि ज़ु तु पिलुनाव्यन मे कुन। दोपुनम, 'वुछू बबा, ख्वदा गवाह। बु छुसय नु काँसि हुंद चीज़ रटान। मे येलि गॅर तानु तानु करनु पतु जोडुन्य हेच, यिमु ज़ु गिरारि तोरुम नु कॅह फिकरी ज़ि यिमु कत्यथ आसु अथ लॉगिथ? लेहज़ा, यि छु चोन अमानथ तु नितु सुत्य। हरगाह कुनि सातु गॅर बंद गछी, मे निशि अँन्यज़ि वापस, मगर यिमु गिरारि ति अँनिज़्यस सुत्य। खबर छा, तमि वख्तु मा यियि समुज कॅह। मगर अख कथ वनय, गॅर छय पँज्य पॉठ्य व्यलायँती। तान कॅडिथ ति छय यि बराबर पकान। यि कति बनी अज़?'

बु द्रास दिल मोलूल गॅछिथ। गिरारि ज़ु थव्यम चूरि युथ नु गरि कांह वुछि। मगर व्वस्तु रज़ाकुन अथु! त्रे वॅरी गॅछिथ ति आँस गॅर बे-वाय पॉठ्य चलान तु बाबर वख्त दिवान।

अकि लटि दिद्य मे बेयि गरि कुन नज़र। सुबहचि त्रे आसु बजेमचु। मे ओस पांचि बजि नैदरि व्वथुन। मे कॅर बेयि शंगनुच कूशिश तु वुछान वुछान पेयम नैदर।



खज़ानु

अकि लटि आव मे बेयि तस फॅकीरु सुंद बुथ अँछन तल। खोफनाख शक्ल, थोद कद, बजि बजि अँछ, कनन कनु वॉल्य, कलस सफेद दसतार, हँटिस स्वरफु चालि गुलोबंद तु अथस मंज कृहन्य तस्बीह। फॅकीर ओसा पँज्य पॉठ्य फॅकीरुय किनु सांगल, मे आव नु कॅह समुज। मे गँयि सॉरिसुय पानस ज़न दूनन। तसंज गोब तु खोफनाख आवाज़ गँयि मे बेयि अकि लटि कनन, 'वख छुय नु ज़्यादु कॅह। यि मे वोनुय, ति कर। बस दून दूहन अंदर गछख खज़ानु हॉसिल करुन। बाकय छय त्रे सॉरुय खबर।'।

मे दिन्न ओरु योर नज़र। न ओस बुथि कांह तु न पतु। यि ऑस सिरिफ तस फॅकीरु संजु छाय, खसु मे पँतिम्यव चोरव दूहव प्यठ पानस ब्रॉह कनि ऑस बासान। मे कोर दिल दौर। तसंजि कथि हेचुम वारु साम। ऑखुर बु क्याज़ि छुस यूत बांबुर्योमुत? तँम्य बिचारन क्याह वोन? तँम्य यि वोन, ति वोनुन सिरिफ मे मदथ करनु बापथ। मे ह्यँच तसंजि कथि वारु साम। चोर दूह गँयि, येलि सु मे आवरेनि नेबर कनि समुख तु वोनुनम, 'ज़िंदगी छय स्यठाह जीठ मगर कार छुय सोरुय पथर। क्याह क्याह करख तु कोत कोत वातख? हरगाह मानख, अख खॉर गछय वॅरिथ। शन दूहन अंदर अंदर छुय संगरमालु फवलनु वख्तु पखलन बालु थँगिस प्यठ वातुन। अति छुय सारिवुय खोतु बँडिस बुरज़ु कुलिस तलु कनि अख खज़ानु दफन। खज़ानस प्यठ कनि छु अख शाहमार बिहिथ मगर त्रु वुछिथुय त्रलि सु। बस त्रे छुय खज़ानस नख द्युन तु मे निशि वातुनावुन। न्यसुब म्योन तु न्यसुब चोन। बु छुसय हुथ क्वलि अपारि कनि रोज़ान। मगर कुनुय ज़ोन गँछिज्यनु कॅह। कॉम छे स्यठाह मुश्किल। ब्याख नफर तुलिज्यन सुत्य। खज़ानु छु स्यठाह बोड। त्रे पेयी नु कांह फख। सथ पीरि ख्यनय आरामु सान, पतु छय पनुन्य मरज़ी। मगर अख कथ थव याद। हरगाह शन दूहन अंदर अंदर कॉम सपदि तु जान, नतु करन बु बदल असॉम्य तयार।'।

खज़ानुक नाव बूज़िथ गोस बु ख्वश मगर खतरु बास्योम स्यठाह। मे ऑस करज़ु बलायाह अख कलस। बासान ओसुम वुमुर सोर्यम यि करज़ु नखु वालान। बु कर करु खांदर तु कर बसावु पनुन गरु? खदवय फॅकीरु सुंद बुथ अँछन ब्रॉह कनि यिथुय ओस मे हेरिम शाह ह्योर तु बँनिम शाह ब्वन गछान, मगर खज़ानु याद वॅरिथुय ओस मे म्वर्दु अँछन ज़न गाश यिवान। मे कोर फॉसलु जि अज़ राथ क्युतुय नेरु बु खज़ानु हॉसिल करनु बापथ।

मँज़िलु ओस स्यठाह बोड। मे तुजि च्वचि दॅह मरु लॉचि गंड वॅरिथ सुत्य तु गाश फवलवुनुय द्रास। ब्याख नफर सुत्य तुलनुक ओस नु सवालुय। हरगाह मुसीबथुय तुलुन छु, तु कुनुय ज़ोन क्याज़ि नु? मे क्या ह्यमथ छे ना? ब्याख कथ छुम हरफस गवाह तु मँडिस शॅरीक बनावुन?

बु गोस पकान। बाल, जंगल, क्वलु, खाह पथ कुन त्रावान वोतुस बु दुपहरस बाँग्य कॉली मातायि हुँदिस मंदरस निशि। अति वुछुम स्यठाह बीरु। मे दोप लूख आसन आरती करनि आमत्य। ब्रॉठ कुन वोतुस तु आरती वारती गँयम नु कुनि नज़रि। लूख ऑस्य लॉन वॅरिथ अख अँकिस दकु दिवान तु ब्रॉठ पकान। अख नवजवान ओस लॉनि स्योद करान तु काँसि काँसि लॉनि मंज बराबर न रोज़नस प्यठ टास ति लायान। मे प्रुछ तस नवजवानस, 'हे येति क्या दॅलील?' तँम्य वोनुम असुनाह त्रॉविथ, 'बासान छु, नोवुय नोवुय छुख योर आमुत। त्रे छय ना किहिन्य खबर?' मे वॅर कलस ज़ीर तु तँम्य वोन, 'स्वरगु प्यठ छु दर्मराज़न पनुन दुथ सूजमुत तु सु छु स्वरगु

लूकचि टिकट बॉगरान। यस यस मरनु पतु स्वरगस गछनुक शोख आसि, सु हेकि येती पनुन्य टिकठ ह्यथ।' टिकठ आँस हथ वंपयि, मगर मे आसु चंदस वुहय। मे कति आँस खबर जि स्वरगुचि टिकट मेलन ज़मीनि प्यठय ? मे दोप जान गव मे बूज दरवेशु संज कथ तु यपॉर्य द्रास। यि काँम ति थवव यपॉरी वॅरिथ। अद पाँसु जन छिनु बराबर चंदस, व्वजमिस पन्न ना ? अँस्य क्या चलव कुन। बेयि पगहकि प्यठ यिमव अँस्य ति वारु कारु बड्यन मोहनिव्यन मंज गँजरावन। खजानु आसि ना गुरु वोतमुत !

मे बोजुनोव नव जवान बडु आरु हति बुथि पनुनि चंदुच दँलील। तँम्य द्युतुम दिलासु। दोपुन अदु कँह परवाय छुनु, बु करय सुफॉरिश। तसुंदिस दिलासस प्यठ रूदुस बु लॉनि। बुथिस खोतुम त्युथ रंग जन तु मे वरॉय कहुन्य गछिहे नु जनतस। युथ नु नव जवान पोतुस कँह दगा गछि वॅरिथ, मे लॉज तस सुत्य यारज। तस निशि नन्यव मे जि टिकट कुनुनुक कम्प रोजि पांचन दूहन जॉरी। यि नवजवान ओस कमि ताम बेयि शहरुक तु यि ओस दर्म राजुन्य दूतन पानस सुती ओनमुत। नव जवानस सुत्य कथु करनस लोग मे स्यठाह मजु मगर यि मजु रूद नु जादु कालस बरकरार। युथुय तँम्य मे पुछु जि टिकठ ह्यथ कोत छुय गछुन, मे फँट्य आँरख। जंगन चायम थरु थरु। दोपुम हय हे ! अँमिस गोछ नु शख आसुन गोमुत। नतु क्वसु चेट्य अँमिस जि मे कोत छु गछुन। मे द्युत नु तस जवाबाह कँह, मगर तँम्य पृछुम बेयि, 'क्या साँ, कमन गवतुन गोख ? वनानुय छुख नु कँह। अँस्य क्या सुत्य यिमोयि ?' मे दोपुस, 'हा न साँ तिछ कथ छनु। दफ बु ओसुस सौंचान जि टिकटि हुंघ बाक्य पाँसु कति अनु ?' अमि पतु वॅर नव जवानन छ्वपय तु मे ति ह्योत तस निशि वारु वारु लोब।

बु रूदुस लॉनि मंज ब्रॉह पकान। बुथि ओस अख स्टेज बँनिथ, यथ प्यठ अख बुजुर्ग बिहिथ ओस। तस सुती ओस ब्याख अख नवजवान बिहिथ, युस लूकन निशि पाँसु ओस रटान। बुजुर्ग ओस पानय टिकट बॉगरान। म्यॉन्य वॉर्य वॉन्न तु मे त्रावि वुह वंपयि नवजवानस ब्रॉठु कनि। तँम्य वॅर मे दोलु नजर। मे दोपुस, 'बाया, अजु छुय मे युतुय चंदस। हरगाह पन्नख, पगाह दिमय बाक्य। अख्तुय दिमय पाँछ अलाव।' मगर नवजवानस गव नु असर कँह। तँम्य कोर साफ इनकार। बुजुर्ग ओस नु आँसु सुत्य काँह कथ करान। सिरिफ ओस इशारु हावान। तँम्य कोर नवजवानस पाँसु रटनस मनाह। मगर बु कथ मानुहँस ? मे लोगुस रडु। मे पथ यिम लॉनि अँस्य तिमव लोग शोर। बु ओसुस नु कुनि सूरतस मंज टिकटि वरॉय नेरुनस तयार। म्बखसर चायि लॉनि मंजुक्य ज़ु त्रे नफर मंजु तु कौरुख फॉसलु। वुह वंपयि दिथ ह्यकु बु सिरिफ टिकटि हुंज बुकिंग वॅरिथ, तु टिकठ मेलि तेलि येलि बु बाक्य शीथ वंपयि दिम। मे ज़ोन गँनीमथ। अजु करव बुकिंग, पगाह येलि बु खजानु वापस ह्यथ यिम, तेलि दिमोख बाक्य वंपयि तु ह्यमोख टिकठ। दर्मराजुन्य दूतन मॉन्य यि कथ। कलु सुत्य कौरुन आंकार। मे पिलुनोवुन टिकटि बदलु अख काकुद यथ प्यठ वुहन हुंद रँसीद तु टिकटि हुंज बुकिंग दर्ज आँस वॅरिथ। मे थोव काकुद चंदस मंज तु द्रास।

वति पकान पकान आव मे खयाल। मे दोप यिनु यिम मे पगाह फंद करन तु टिकठ दिनस करनम इनकार ! या अँस्यतन यिम म्यानि वापस फेरनु विजि डूंगु बडॉविथ वॅल्यमुत्य ! मे चायि फिकिर। हरगाह गुरु फेरु वापस बाक्य वंपयि अननु बापथ, यपॉर्य गछ्यम खजानस प्यठ वातुनस चेर। मे द्युत पानस दिलासु, 'करन क्याह ? लूठ छा ? बुकिंग छना वॅरमुन्न ? फंद फिरेबी करन तु अदालथ वान छा दँद्यमुत्य ? अकि अकि ह्यमख हिसाब।'

पखलन बालस निश वोतुस बु सिरिं लूसिथ। अनि गटि मंज पहाडस खसुन ओस खतरनाख। मगर रोज़ कति रातस ? अथ जायि ओस जंगली जानवरन हुंद खतर ति स्यठाह। मे पेयि अँकिस यारि कुलिस कुन नज़र। कुल ओस बोड तु अँकिस लंजि प्यठ ऑसुस बेहनस ति जान जाय। मे दोप रातस गव अँती गुज़ार करुन। बु खोतुस पँज्य संद्य पॉठ्य कुलिस। लंजि प्यठ बनोंवुम बेहनस किच्च जाय। च्वचि दँज मुचरॉवुम तु बँरुम यड। अमि पतु त्रॉवुम कुलिस प्यठुय नँदर।

सुबहुचि चोर आसुहन बजेमचु येलि बु हुशार गोस। वुनि ओस न्युक न्युक गाश ति यिनय। मे ज़ोन नु वख्त ज़ायि करुन मुनॉसिब। बु वोथुस कुलि प्यठु ब्वन। लोरि हना अख तुजिम अथस क्यथ तु ह्योतुम पहाडस खसुन। योदवय अनि गटि मंज साफ साफ ओस नु यिवान बोज़नु, मगर बु ओसुस आँकुवँनी वथ छांडान तु ड्वचुर ड्वचुर दिवान। बुथि ऑस्य कँड्य दार जंड। ख्वरन तु जंगन वोथ कंड्यव सुत्य मुसलु, मगर मे हॉर नु ह्यमथ कँह। बु रुदुस पादुर्य सुंह सुंध पॉठ्य ह्योर कुन लमान। खज़ानुक चेशकु ओसुय दिलस, सुती दिच्च स्वरगुचि बुकिंगि ति स्यठाह ह्यमथ। दून च्वन जायन गोस बु डुलु ति, मगर मे कोर दर्यर। मे ओस नज़रि तल सिरिफ पखलन बाल थोंग तु खज़ानु। वातान वातान वोतुस बु वारु कारु बालु थँगिस प्यठ मगर पान ओसुम अडु मोर गोमुत। वुनि आसु संगरमालु फवलुनय। मे त्रोव अँकिस पॉतरि कनि प्यठ डाफ।

म्यानि हिसाबु आसिहे मे ओड गंटाह गोमुत डाफ त्रॉव्यमुतिस जि मे गँयि कनन क्रख। ज़न ओस सुह कति ताम ग्रज़ान। मे गँयि वॉलिंज न्यबर नीरिथ। योत ताम वाचोस वारु कारु, व्वन्य गोछुम नु पोतुस सुह ख्योन! मे दिच्च ओरु योर नज़र। कुलाह कोटाह ओस नु कांह। दूरि अँकिस जायि गव मे होखमुत बुरज़ु कुल अख नज़रि। मे त्रॉव दव तु खोतुस अँथ्य कुलिस प्यठ। सुह गोम नु कुनि नज़रि। खबर यि मा आसिहे मे वँहम! रछाह गँछिथ वोथुस बु कुलि प्यठु ब्वन। संगर मालु आसु तयार फवलुनस। मे लोग बोड बुरज़ु कुल छांडुन। दूर दूर ताम गोम नु कांह कुल नज़रि। मे दिच्च वारु व्वन्य तँथ्य कुलिस नज़र, यथ बु सुह सुंदि खोफु खोतमुत ओसुस। अति न ओस शाहमार तु न बास्योम खज़ानु। सूंचुम, खबर शाहमार मा आसि मे वुछान वुछानुय च़ोलमुत। खज़ानु हय आसि तु येथ्य कुलिस तल गछि आसुन।

मे ह्योत पॉतरि टुकरव सुत्य ज़मीनि खनुन। अथन खँतिम हठ। यीतिस कालस फोल पूर गाश तु सिरिं ह्योतुन नोन नेरुन। फुटु जोराह खँनिथ ति आव नु मे कुनि खज़ानु बोज़नु मगर मे हॉर नु ह्यमथ। सूंचुम कँह वख्त तकलीफ तुलिथ छि वुमरि ऑश करुन्य। बु रुदुस खनान। द्यव पतु त्रे तु त्रेयव पतु च़ोर फुट। मगर खज़ानु नदारद।

व्वन्य लँज मे त्रेश। बु दोर्योस पोन्थ छांडनि हुपॉर्य तु यपॉर्य मगर पोन्थ गोम नु कुनि नज़रि। अँकिस जायि वुछिम सासु बँद्य केम्य क्रुल अँकिस कँड्य जंडस तल बिहिथ। जंडस तलु कनिच ज़मीन ऑस अँदर। मे ओन अख पनु वँथर तु यि लोगुम अथ जायि मेचि मंज तिथु पॉठ्य जि अथ रुज़ तोंथ ब्वन कुन अलूंद। वारु वारु हेतिन अमि पनु वँथरु प्यठु पां फेर्य पशुन्य। मे थोव ब्याख अख पनु वँथरु कचुल ह्यु बनोंविथ अथ तलु कनि, युथ ज़न पोन्थ अथ मंज जमाह गछि। यि ओस बडु ज्यूठ कार। पां कचुलस लघुहँन यिथु पॉठ्य गंटु वादु बँरिथ यिनस। मगर अमि सुत्य रुज़ मे व्वमेद बरकरार।

पनु वँथरुकिस कचुलस मंज येलि पां फेर्य दँह वुह जमाह गँयि, मे त्रॉव्य तिम ज़ेवि प्यठ। सॉरिसुय पानस पेयम शेहलथ। कचुल थोवुम बेयि जायि प्यठ लॉगिथ। सिरिं ओस व्वन्य स्यठाह

ह्योर वोतमुत। मे तुज दोर युथ ज़न खज़ानु वदि कडनु बापथ बेयि फुट ज़ु फुट खँनिथ ह्यक। युथुय बु खज़ानु ख्वडस निश वोतुस, मे चँज ख्वरव तलु मेच नीरिथ। ख्वडस मंज़ ओस बोड कृहुन शाहमार ऑर वँरिथ बिहिथ। मे वँर ह्यमथ। पँकीरु संज़ कथ हेचुन पँज़ नेरुन्य। शाहमार आव अथि, वारु कारु मेलि खज़ानु ति। पँकीरन ओस वोनमुत जि मे कुन वुछिथुय चलि शाहमार। सु चोल नु कँह। मे सूच खबर अँमिस मा पेयि नु वारु मे प्यठ नज़र। मे कोर तस हिश...श..श... तु दिचुमस ख्वरु सूत्य ज़ीर। शाहमारन दिचु कुनी ग्राय पानस तु याशाह कँरिथ दिचुन मे ख्वरस ट्वफ। बु प्योस अँती पथर। अँछन गोम अनि गोट तु अँछ लजम बुरज़ कुलिस कुन दरस। शायद गोस बु मँरिथ।



स्वर्ग तु नरुक

म्याँनिस अमानथ दिनस सुती गॅथि हट्ट कट्ट जवान जोराह मे ब्रॉह कनि पॉदु। यिम आसुहॅन नवि जमानुक्य यमदुथ। बुथ ओसुख प्रोन तु ह्यांग ति ऑसिख नु कॅह। अँकिस ओस क्लीन शेव तु बेय ओस फ्रॅच कट थोवमुत।

बु ओसुस वुनि युहुंद कद तु बाडवुय सरु करान जि यिमव कॅर मे नर्यन दून थफ तु तुलुहॅस थोद। अमि पतु तुल यिमव आकाशस कुन कदम। बु गोस हॉरान तु परेशान। मे ओस नु ज्रांह जॅमीनि प्यठ स्योद पकुन तगान मगर यिमन सुत्य सुत्य ह्योतुनस बु ति हवहस मंज वुडव कॅरिथ पकुन। योदवय म्यानि नरि जंगु आसु नु हिलान कॅह, मगर बु ओसुस रजि रोस्तुय ज़न हवॉयी फोजुकिस जंगी जहाजुक्य पॉठ्य पकान। मे ज़ोन जि मे छु जिंदुगी निशि अथ छोलमुत, मगर दिलुक तमाह, सु ओसुम ज़न वुनि ति कलु वॅण्डिथ। मे दिन्न ब्वन कुन वारु नज़र। शाहमार ओस ख्वडस मंज वुनि ति ऑर कॅरिथ बिहिथ। शायद ओस तस वुनि ति यि फ्रठ जि बु मा यिम वुनि वापस तु खज़ानस करु कबज़।

दुनियिहा अख कॅण्डिथ वॉत्य अँस्य कथ ताम जायि। मगर मॉफी दिज़्योम! येति कति ओस दुनियाह? सु ओस ना मे मॅरिथ पथ कुन त्रोवमुत। आ, दॅपिव असमाना अख कॅण्डिथ वातुनोवुहस बु यम दुतव अँकिस जायि। क्लीन शेव यम दुतन कोड पतलोनु चंदु मंजु अख चीज़ तु रोदुन ऑसस ब्रॉठु कनि। यि चीज़ ओस त्युथुय युथ सॉनिस दुनियिहस मंज टेलेफोन आसान ओस। रंग डंग ओसुस जान। शायद आसिहे यि ति टेलेफोनुय, मगर तार ऑसुस नु कॅह। असि ओस बूजमुत जि व्यलायतस मंज छि तारि वरॉयी टेलेफोन आसान। शायद मा आसिहे अँम्य जवानन ति तती प्यठ अनुनोवमुत। खॉर मे क्या अथ सनुन? मे ओस जॅमीनि प्यठ पनुनिस गरस मंज फोन लागनुक अरमानुय रूदमुत। म्याँन्य मॉल्य ओस टेलेफोन महकमस मंज दॅह वॅरी ब्रॉठ पांछ हथ र्वपयि बॅरिथ फोन बुक कोरमुत। मगर सु कति फोन? येति बु अफसरन पृछनि गोस, दोपुहम, 'हता यारु च्चु मा छुख पागल गोमुत! येति छि वुह वॅरी ब्रूटिम 'ओन योवर टेलेफोन' वॉल्य ज़ु ज़ु सास बॅरिथ ति यपारी। च्चु कथ छांडान पांचन हतन प्यठ फोन?' मे फोर्यव नु जवाबुय। व्वन्य करेयि फॅकीरन मे यॉरी तु मे सॉचोव जि बु ह्यमु ततकाल सकीमि मंजुय व्वन्य द्रोगि म्वलु फोन, मगर जिंदुगी द्युत नु साथ कॅह। हरगाह मे क्वदरथ खज़ानु लॅबिथ निनुक वख दियिहे, द्यव बु ति पनुनि दारि प्यठ बिहिथ तु फोन अथस मंज रॅटिथ मखन लालस आलव लायिहॉ, युथ तस हेरिम शाह ह्योर तु बॅनिम शाह ब्वन गछिहे! मगर सु कति। च्चकि बु शिकस लद। वनु कस?

मे त्रोव ज़्यूठ व्वश तु त्रॉवुम बेयि यम दुतु सुंदिस तारि रोस्तुय फोनस कुन नज़र। सु ओस कस ताम सुत्य कथ करान। मंजु मंजु मे कुन नज़राह त्रॉविथ कलु हिलावान तु मंजु असन खंगालु त्रावान। ब्याख यम दुथ ओस वुनि ति मे अथस थफ कॅरिथ।

कॅह काल गॅछिथुय त्रोव यम दुतन फोन चंदस तु पृछुन मे नाव। मे वोनस, 'बाया, जॅमीनि प्यठ अँस्य मे लूख लोलु सान वनान 'साहब'। नतु हरगाह पज़र बोज़ख, असली नाव ओसुम कृष्णदास। कृष्ण सुंद दास कम तु पनुन ज़्यादु।' क्लीन शेव यम दुतन कॅर मे बुथिस कुन नज़राह। वापस द्युतुन नु जवाबाह कांह। अँस्य रूद्य पकान, या वॅन्यतव वुडान। बुथि ओस सख

ओबर। मे पेयि बदनस ठँडी। मे हेच्रॉयि यम दूतन सुत्य बेयि कथ करुन्य मगर तिम ऑस्य दूनुवय मनहूस बलायि। म्यानि कथि द्युत नु तिमव कन केह। मे पेयि रुसवा गँछिथ छ्वपय करुन्य।

ओबर मंजु येलि अँस्य न्यबर द्रायि, मे वुछ बुथि अख बोड देवारु। देवारस ऑस्य ज़ दरवाज़। अँकिस प्यठ कनि ओस लीखिथ स्वर्ग तु बेयिस प्यठ कनि नरुक। मे ह्यच्रॉयि बड कुदामु सान स्वर्गस कुन पँद्य त्रावन्य जि यम दूतव फ्युर ज़बरदस्ती म्योन चॉठ नरकस कुन। मे मान्योव नु कुनि वति मगर चल्योम नु केह। मे ओस नु ज़न नर्यन ज़ंगन ताकथुय। अंदर अच्रान अच्रानुय गव मे अँछन अनि गोट। मे यि नरकस मुतलिक बूजमुत ओस, बराबर ओस ती। जायि जायि ओस नार दज़ान तु यमु केँकर नारस ब्रौठ कनि नच्रान तु नग्मु करान। शायद आसुहन क्वकर्मि अथ नारस मंजु दज़ान। कुनि कुनि जायि ऑस्य इनसान कुल्यन अलूंद त्रॉविथ। अँकिस जायि ओस लूक अरसाथाह सँमिथ। तिमव ओस सख शोर लोगमुत। दर्म राज़ ओस पंडालस प्यठ बिहिथ तिमन सज़ाह बोज़नावान। बु येलि तिमन नज़दीख वोतुस, मे प्यव ज़न तु असमान कलस प्यठ। मे वुछ अति तिम तिम नफर, यिम ज़मीनि प्यठ स्यठाह दान तु प्वन्य करान ऑस्य। यिमन हुंद अख दर्शुन करनु बापथ लूख सासु बोद खर्चान ऑस्य तु मीलु वादु पकान ऑस्य। 'गव सु ओस सोरुय अपजुय!', मे वोन पानस सुत्य। मगर म्यानि सॉचनुच आवाज़ ति ऑस बडि गछान। फ्रेंच कटु वॉलिस यम दूतस गँयि म्यॉन्य कथ बूजिथ कन खडा। योदवय तस फिकरी ओस नु केह तोरमुत, मगर तोति दोपुन, 'अज़ कथ छुख नारस नरि दिवान? तति क्याज़ि सूंचुथ नु?' मे दोपुस, 'बाया! बु छुस नु ति सॉचान यि च़ सॉचान छुख। बु छुस हॉरान गछान जि यिमव ज़मीनि प्यठ सुत्य कर्म कॅर्य, तिमव मंजु ति छि वारयाह मे येति नज़रि गछान।' यम दुथ ओस शायद ज़ानन वोल। दोपुन, 'ति छनु कथ। असली तल छि ज़मीनि हुंद लूख आसान क्याहताम, तु बासान क्याहताम।' मे म्यूल पनुनि सवालुक जवाब। पानस मुतलिक ओस नु मे शखुय कांह। बु ओसुस सिरिफ तु सिरिफ नरक खॉतरय ज़ामुत। हरगाह मे कुनि सातु कांह रुत कर्म कोरमुत ति ओस, सु ओस मे तमी सातु दुनियिहस निश कुनिथ ख्योमुत। सु ओस नु कांह त्युथ नफर युस बु ज़ानुहँन तु यस नु मे पनुनि च़ि कामि हुंज कथ कन पॉव्य पॉव्य आसिहे वॅनिमुच़। मगर बु ओसुस सॉचान यिमन नफरन हुंद, यिमन ज़मीनि प्यठ स्यठाह नाव ओस तु यिम रुत्यन नफरन मंजु शुमार ऑस्य सपदान। म्यान्यन नज़रन तलय ऑस्य वुन्यक्यन कम अज़ कम अख दरजन तिथ्य नफर दर्म राज़स ज़ारु पारु करनस लॅग्यमुत्य। मगर जान गव, तिमन पेयि नु मे कुन नज़र, नतु गछिहेख वारय रुसवाँयी तु मे खसुहँन बॅल्य पाफ।

म्यानि खॉतर ओस शायद क्वदरतन रुतुय सूचमुत। मे ऑस स्वरगुच बुकिंग वॅरमुच़ तु तम्युक रँसीदु ओस मे वुनि ति चंदस मंजु। मे छुडोव पनुन अथु जवानु सुंदि अथु मंजु तु ब्यूतुस अँकिस कनि पलस प्यठ। गासु द्रमुन मा ओस अति कुनि जि तथ प्यठु बेहमुहॉ! फ्रेंच कटु वॉल्य त्रॉव मे कुन दोलु नज़राह, तु पृछुनम, 'क्या सॉ यिती सुत्य थोकखु? वुनि छनु कथुय।' मे वोनस वापस, 'न सॉ, स्व दॅलील छनु केह। असली कथ छे यि जि मे छि स्वरगुच बुकिंग ज़मीनि प्यठुय वॅरमुच़। पछ नय बिही, रसीदु हावय।' यम दूतस बीठ नु पछुय। दोपुन, 'हे यारु, च़े हिविस शिकस लदस कपॉर्य गँयि स्वरगुच बुकिंग? स्वरगुचि टिकटु छा आसान वति पेमच़ु जि च़े तुजुथ अख पानस किच़। तलु बा हाव?'

मे कोड चंदु मंजु काकुद तु होवुमस। काकुदस ओस टाकारु पॉठ्य दर्म राज़ सुंदिस दुथु सुंद दसखत। जवानस फीर बुथिस लेदरि छठ। काकुद होवुन पनुनिस सॉथियस। तमि पतु

कॅरुख क्याहताम कथ पानुवॅन्य कथ ताम बदलय बोलि मंज। शायद आसिहे यि संस्कृत। मे आव नु कॅह समुज। असि कर ओस संस्कृत पोरमुत ? भगवत गीतायि हुंघ ति ऑस्य असि ग्वडनिक्य पांज या सथ श्लूक तगान परुन्य, तिक्याज़ि तिम ऑस्य ज़बॉनी याद। नतु कति अँस्य तु कति संस्कृत ! मोल मॉज ति ऑस्य दिवान अंग्रीज़्य परनसुय प्यठ ज़ोर। दपान ऑस्य पतु कथ लगिव संस्कृत ?

बु रूदुस कटु चेश्मव तिमन दूनवुन्य यम दूतन कुन वुछान। फोनु वॉल्य यम दूतन कॅर मे नरि थफ तु दोपुनम, 'हे बाया! सॉन्य छय नु कांह गलती। असि यि वोनुख, ती कोर। व्वलु हुमिस दर्म राजस हावव यि काकुद तु पृछोस ज़ि व्वन्य क्या छु करुन ?' मे रोट दरकु। दोपुमस बस, येमि अलावु पकय नु बु अख कदम ति। त्वहि छुवु गछुन तु गॅछिव। बु प्रारोवु येती।' तिमव द्युत मे इजाज़थ पथर बेहनस तु पानु गॅयि दर्म राजस निश। बु रूदुस यीतिस कालस ओरु योर वुछान। यि अंघ पॅख्य सपदान ओस, ति वुछनु सुती ओस दहशथ गछान। मे वोन कृष्णु बगवानस कुन, 'व्वन्य रॅछिज़्म येति योर। ऑखुर युथ छुस तु त्युथ, मगर म्याँनिस नावस सुत्य छुना चोन नाव ति! हरगाह मे कॅह वुल्टु गछि, तमि सुत्य गछी ना च्चे ति बदनाँमी। लूक वनन ना कृष्णु बोखुख नरकस।'

शायद बूज म्याँन्य व्वनथ कृष्णु बगवानन। दूनवय यम दुथ आयि असवुनि बुथि वापस तु दोपुहम, 'हे बाया! न्यसुब मुश्किल गोय हल। मगर च्चे छय शीथ र्वपयि वुनि बकायाह। तिम कति अनख ? हरगाह शीथ र्वपयि अँज्य बरख तु अँज्य निमोथ स्वरगस। नतु छुय येती ब्युहुन।' मे ओस नु चंदस पाँसाह कांह। मे दोप तिमन आरु हति बुथि, 'बलायि लगोवु, दियिव ना तामथ व्वजुम। बु दिमोवु पतु वापस। स्वरगस मंज आसि मे कांह नतु कांह पनुन पाँसु वोल !' तिम वॅथ्य दर जवाब, 'असि कति गॅयि हारु पाँदु ? येति छा काँसि तनखाह मेलान वख्तस प्यठ ? अगर बिही, त्रे र्यथ गॅयि तनखाह निनुसुय। त्वहि छुवु पताह अँस्य छि येति ऑश करान। ज़ानि हा यारु सोन पान, किथु वॅन्य छि अँस्य दूह दूह कडान।' बु गोस यि दॅलील बूज़िथ हॉरान। दोपुमख, 'क्याज़ि, येति छुना बजठ वजठ किहीन्य आसान ? तिम पाँसु कोत छि गछान ?' तिमव त्रोव व्वश। दोपुख, 'आसान क्याज़ि छुनु ? आसान छु, मगर सु सोरुय छु दिवताहन हुंदिस टी.ए. तु डी.ए. हस प्यठ खर्च गछान।'

'टी.ए. तु डी.ए.!! क्युथ टी.ए. तु डी.ए. ?' बु गोस हॉरान। तिमव वोन व्यस्तॉरिथ, 'तिम छिना कालु पगाह लाव लश्कर ह्यथ पृथवी लूक तु पाताल लूक गछान। तति छिनु तिम ज़्यादु दूहन ब्यहान कॅह, मगर तोत ताम युस ज़्यूठ ङॉसलाह छु, तिम छि तमी हिसाबु चार्ज करान। व्वन्य हय बचि तु बचि क्याह ? अँस्य ति छि छ्वपु दम वॅरिथ सोरुय बरदाश करान। करव ति क्याह ? येति मा छु तुहुंघ पाँठ्य हाई कोर्ट तु सुप्रीम कोर्ट ? यि दिवता पानु वनि, ति छु फाईनल तु अटल।'

यिमु दॅलील बूज़िथ चायि मे तुर। मे सूंच, अमि हिसाबु छु ज़ॅमीनि प्यठ जनथ। हरगाह कांह नफर येति प्यठ हुत ताम ति क्रकु दिवान दिवान पकि, दॅहन जायन पृछुनस वति पकुवुन्य ज़ि बाया कुस तकलीफ छुय ? येति छु यि बदलय तावन। असि मा छु युथ कुसाह ज़ांह वुछमुत ! हरगाह ज़ॅमीनि प्यठ अँकिस दूहस ति काँसि तनखाह बंद करन, हाई कूटी ताम कर्यख लार।

मगर वुन्यक्यस ओस नु अथ मसुलस प्यठ बहस करुन मुनाँसिब। वुन्यक्यस ओस सवाल शीतन र्वपुयन हुंद। मे वोन फोनु वॉलिस यम दूतस, युस दूयव मंजु सीनियर ओस बासान, 'बाया,

मे मानतु च्चु पनुन ल्वकुट बोय। छुना सलाह, मे निख वापस तथ बुरज़ु कुलिस निश। खबर शाहमार मा आसि च्चोलुमुत, बु दिमहॉ खज़ानस थफ। हरगाह बरादेंरी वॅरिव, न्यसुब गव तुहुंद तु न्यसुब गव म्योन। त्वहि हरगाह यि फ्रठ छु ज़ि बु मा च्चलु, हतुसाँ मे थॅव्यतव जंगन गंड वॅरिथ।’ मगर अमि सुत्य अंदेयि नु कॉम केंह। तिमव वोन ज़ि अकि लटि परलूकस मंज़ यिथ छुनु वापस गछुनुक सवालुय व्वथान। मे रॅट्य तिमन ख्वर ज़ि कांह सॅबीला सूंचतव म्यानि खॉतरु। ऑखुर म्यानि वुह वॅपयि, यिमु मे बुकिक करुनस दिचु, मा गछुन बिलकुलहय फॅक्य?’

फोन वॉल्य कोर बेयिस साँथियस सुत्य मशवरु। तमि पतु कोडुन चंदु मंज़ु बेयि फोन तु कॅरुन कस ताम सुत्य कथ। बुथि तलु ओस बासान ज़ि कॉम छे अंदन वाजेन्य। केंह काल कथ करनु पतु थोव तॅम्य फोन बेयि चंदस तु वोनुन, ‘हे अख सॅबील छय। हरगाह च्चे ज़ांह कालि काँसि बेछुवनिस या काँसि फॅकीरस छ्वपु दम वॅरिथ कांह पाँसु छुय द्युतमुत, सु यियी मुजराह।’ मे प्यव याद, मे ओस तॅस्य फॅकीरस नपु नपु करवुन हॅत्युन द्युतमुत, येम्य मे खज़ानुक पय ओस वोनमुत। तु यिहॅय अख कथ ऑस नु मे काँसि वॅन्यमुच़ तिक्याज़ि बु मा ओसुस यछान ज़ि कांह गछि खज़ानुकिस राज़स वॉकुफ गछुन। मे वोनुमख, ‘आ, द्युतमुत क्याज़ि छुम नु! फलॉन्य फॅकीरस मे पूर हथ वॅपयि द्युतमुत। व्वन्य गव च्चु वनुहम रॅसीदु हावुन, सु मा छुम!’

जवानन कॅर बेयि फोनस प्यठ कथ, तु हिलोवुन कलु। दोपुन, ‘कुसमतु वोल छुख। योहय अख रुत कर्म छुय नु च्चे काँसि निश वोनमुत तु अम्युक फल म्यूलुय वुन्यक्यस। व्वलु पख स्वरगु लूकस कुन।’

अॅस्य हेतिन स्वर्गु लूकस कुन नेरुन्य ज़ि पॅत्य किन्य वोथ हुय। नरकु मंज़ु पेयि किथु ताम पाँठ्य म्यान्यन कॅचन ज़ॉन्यकारन मे प्यठ नज़र। तिम आयि दोरान दोरान तु कॅरुख मे ख्वरन थफ। दोपुहम, ‘बलायि लगीय। अॅस्य छि येति कुन्य मॅशीदि हुंद जिन ही गॉमुत्य। कुनि छुनु दिल लगान। च्चुय योत ह्यकख असि दिलासु मदारु दिथ। मतु गछुतु स्वर्गस केंह। असि सुत्य रोज़ तु येत्य। अॅस्य ऑस्य ना ज़ॅमीनि प्यठ चॉनिस प्रथ पॅज़िस अपज़िस साथ दिवान! वुन्यक्यस कथ छुख असि वुछिथ कलु फिरान?’ यिमन मंज़ ओस गूकलु ति, येमिस मे ज़िंदु पानस हसमतुन्य वसमथ ताम खेमुच़ ऑस। सु ओस ज़्यादय पहान रज़न खसान।

मे सूंच हरगाह बु यिहॅजि कथि कन थवु, बु गछु येमि मोकु निशि अथु छॅलिथ। वॅह्यताम वॅह्यताम बनेयि मे सवर्गस गछुनुच सॅबील ज़ि यिमु शिकस लद गॅयि बूद। हता यारु बु क्या दारोवु केंह? ज़ॅमीनि हुंद हिसाब म्वकृत्योव ज़ॅमीनि प्यठय। गॅछिवू यारु, तोह्य पानस तु बु पानस। मे वोन तिमन आरु हति बुथि, ‘हे यारु बु ज़ानोवुय नु तोह्य। मे कथ छिवु अनान ऑर्य कटिन्य तॉर्य वॅट्य वॉलिथ। गॅछिव वॅरिव पनुन्य कॉम।’ मे कोर यम दूतन इशारु ज़ि पॅकिव जल जल स्वर्गु लूकस कुन। तिमव रॅट मे नॅर तु हेच़्चुख वुडव करुन्य। मगर च्चकि म्योन कुस्मथ खराब। युथुय बु ह्योर कुन ह्योतुनस खसुन, गूकलन कॅर मे ज़ंगि थफ तु द्युतुनम द्रसु। बु आस याशाह वॅरिथ कनिविस देवारस प्यठ लायिनु तु फोटुम कलु।

अॅथ्य सुत्य गोस बु नॅदरि हुशार। मे वुछ पनुन्य मॉज म्यानि ज़ंगि थफ वॅरिथ द्रसु दिवान तु वनान, ‘व्वथू व्वन्य। परबथ छुय ना गछुन! च्चेर गीय। यिमन यारन वोतुय ऑदि प्यठ प्रारान।’



जुफ्त तु ताक

मे दिन्न अँछन मूरन। यि सौरुय ओसुस बु सोपुन वुछान। गरि कुन कँरुम नजर। पांछ आसु बजेमच्च। दरवाजस प्यठ आँस्य म्यॉन्य त्रे यार विजु, राजु तु निकु प्रारान। बु वोथुस थोद तु वोतुस आंगुनस मंज। अथाह बुथाह न्यूम छँलिथ। द्वबि द्राव कुरतु पाँजामु लोगुम तु द्रास यारन सुत्य परबथ कुन।

दर अस्ल ओस अमि दूह असि मैट्रिकुक रिजल्ट नेरन वोल। असि ओस कालय फॉसलु कोरमुत जि गाश फवलनु ब्रोंतुय गछव परबथ। अख दिमव प्रक्रम तु बेयि तुलव गँणीशु बलु निश तोमलु फँल्य। यि कसमतस आसि, ति ननि तँती।

अँस्य रूद्य निकिस निकिस गाशस तेज कदमव पकान। सफा कँदल, नोव कँदल, आँल्य कँदल तु नायोड त्रॉविथ वॉत्य अँस्य गँणीशु बल। अति कोर ट्योकाह पॉन्य पानस पानय, यि जॉनिथ जि हरगाह गुरु जियस निश गछव, सु पिलुनावि रँतन दीप। असि आँस्य नु पाँसु किहीन्य तु बँल्य गछिहे दँहन थी खजालथ। गणपथ जियस कोर नमसकार, परन पेयस तु द्रायि ब्रोंह कुन। बुथि ओस सु कुल यथ तलु कनि लूख तोमुल आँस्य त्रावान जानावारन ख्यनु बापथ। यिमय तोमलु फँल्य अथस मंज तुलिथ आँस्य लूख पनुन कसमत ति वुछान। खास कँरिथ आँस्य शुर्य पनुन पास या फेल वुछनु खॉतरु यिम तोमलु फँल्य तुलिथ गँजुरावान। ताकुल गँयोव पास तु जुफ्त गँयोव फेल। यूत यूत कुल नँजदीख ह्योतुन वातुन, मे हेचुन जंगन थरु थरु अचुन्य।

ग्वडु तुल्य निकन तोमलु फँल्य तु दितिन विजस अथि। बुथिस आँसुस लेदरि छठ फीरमुच्च। निकु ओस सोन लीडर तु प्रथ कांह कॉम आँस अँमिसुय प्यवान ग्वडु करुन्य। विजन गँजुराँव्य, यिम द्रायि काह फँल्य। दोपुन बाया, निकस छिवु काहनाँव्य सुंद्य काह। मतलब ताकुल तु पास। निकस आव बुथिस रंग वापस। अमि पतु तुल्य विजन पानु तु पतु राजन। विजस आँस्य कुनवुह, तु सु ति पास। राजस द्रायि साड पंदाह फँल्य, याने पंदाह पूर तु अख ओड। असि कोर सॉच। फॉसलु गव जि ओड छुनु मुजराह, यिम गँयि पंदाह बराबर। मतलब राजु ति पास। मे बडेयि ह्यमथ। मे सूंच, दूह छु रुत। सारिनुय छु ताकुल नेरान तु मे क्याजि नेरि नु। मे मोर याशाह कँरिथ तोमलु फल्यन जॉटु तु दितिम निकस अथि। येमि किन्य बु पनुनि पार्टी हुंद डिप्टी लीडर ओसुस, तमि किन्य ओस निकसुय हक म्यॉन्य फँल्य गँजुरावनस। निकन गँजुराँव्य, ग्वडु अकि लटि, पतु बेयि लटि। बु ओसुस वॉलिंजि थफ कँरिथ तसुंदिस जवाबस प्रारान। निकन त्रॉव्य तोमलु फँल्य म्यॉनिस अथस मंज वापस तु वोनुन, 'बाया यिम छी शेतुवुह। न कम तु न जादु।' मे गँयि अक्लु बकल। गव अम्युक मतलब बुय योत छुस फेल। ति किथु कँन्य सपदि? राजन आँस्य पनुन्य सॉरी परचु मे नक्ल कँर्य कँर्य लीख्यमुत्य। सु गछ्या पास तु बु फेल? मे दोपुमख क्याहताम गलती छि गॉमुच्च। बु करोवु नवि सर। अदु यि कसमतस आसि, ति मेलि। मे तुल्य दोयिमि लटि तोमलु फँल्य तु येमि लटि दित्य मे गँजुरावनु खॉतरु राजस अथि। तँम्य गँजुराँव्य। बराबर आँस्य सदाह फँल्य। मे तुजि व्वटु मगर निकन द्युत फेश। दोपुन त्रेयिमि लटि छु वोनमुत व्वसतादन। बाक्यव कोर तसुंजि कथि तॉयीद। मे ह्योतुन आँरकु श्रान गछुन। यिथु तिथु तुल्य मे त्रेयिमि लटि ति तोमलु फँल्य तु गँजुराँविम पानय। मगर कसमतन द्युत नु साथ कँह। यिम द्रायि बेयि जुफ्तुय। मे नटेयि जंगु। चूरमि लटि बेयि वुछनुक ओस नु सवालुय, मगर पानस सुत्य सूंचुम,

‘हरगाह बु बगवानस फेलुय आसुहॉ करुन, तेलि क्याज़ि आसिहे दोयिमि लटि मे ताकुल आमृत?’ मे दोप न, दोयिमुय छु ठीख। मे प्रुछ यारन, ‘त्रेयिमि लटि वॅम्य व्वसतादन छु वोनमुत?’ तिमन ऑस नु वारु पताह कॅह। दोपुख, ‘असि छु लूकन निशि बूजमुत मगर व्वसताद सुंद नाव छनु पताह कॅह।’ मे दोपुमख, ‘त्रॅटिव कथाह तेलि। यि दोयिमि लटि द्राव, ती छु पज़र।’

यारन गव म्यानि वननु सुत्य तसलाह। ऑखुर ऑस्य अॅस्य यछानुय जि साॅरी गॅछ्य पास गछुन्य। तिमव कोर म्याॅनिस वनुनस सुत्य पूर पाॅठ्य यितिफाक। निकन वोन, ‘व्वसताद सुंज मिसाल छि बिजॉती गलथ। यि छि दर अस्ल वॅम्यताम ख्वद गरज़न टुड्य फॉलॅवमुत्र।’ तु सुती कोरुन मे मुबारख ति। मतलब, दोयिमि लटि हुंद ताकुलुय छु सॅही तु लेहाज़ा छुख पास। बाकुयव यारव ति कोर मे मुबारख। अमि पतु ह्योत असि प्रक्रम द्युन। असि पतु पतु ऑस्य जु लॅडकु तु त्रे कोरि, यिमव ज़न असि नीरिथुय तोमलु फॅल्य हेत्य तुलुन्य। शायद आसिहे तिमन ति अज़ रिज़ल्ट।

वति पकान पकान युस युस ल्वकुट बोड मंदर तु मूर्ती असि नज़रि गॅयि, तथ तथ कोर असि नमसकार तु पेयस परन। येति येति असि सॅदुर लॉगिथ वॅन्य नज़रि गॅयि, तथ ति लोग अथु तु पतु लोग सु अथु पनुन्यन अॅछन। मतलब ओस सिरिफ जि रेडियो प्यठ रिज़ल्ट वनन वोल गोछ सोन रोल नम्बर ति वनुन।

प्रक्रम दिथ येलि अॅस्य काॅठ्य दरवाज़स निशि वॉत्य, अति ऑस सब्जी कुनुन्य। निकस ओस माजि वोनमुत हंद अनुन्य। अॅकिस सब्जी वाजनि निश ऑस्य हंदि बॅद्य तारु। असि लोग तस सुत्य बाव करुन। यितिसुय कालस आव अख अडवरु ऑनुकी तु तॅम्य बॅर यि हंद पनुनिस जोलुनस तु पिलनाॅवन अॅठॅनी सब्जी वाजनि कुन। असि लोगुस मॅचलु। दोपुस, ‘माहरा यि हंद छि असि ग्वडय मॅल्य ह्यॅत्रमुत्र। त्रे कथ बॅरुथ यि जोलुनस?’ ऑनुकी ओस सख तेशल। दोपुन, ‘मगुज़ मा छिवु खराब गॉमुत्य? वालोवु येती यीरी पीरी। मे ह्यॅत्र ना मॅल्य यि वटु अॅठॅनी दिथ!’ निकस ति खोत योरु अॅछन रथ। दोपुनस, ‘हे, त्रे मा ज़ॉनिथ अॅस्य शुर्य? अॅस्य छुनोय यि जोलनु वोलनु त्रॅटिव येतिथुय। स्योद स्योद दि साॅन्य हंद वापस।’ वुछान वुछान समेयि अॅद्य पॅख्य लूख। तिमु जु लॅडकु तु त्रे कोरि ति अयि ब्रॉह कुन, यिमव ज़न असि पतु तोमलु फॅल्य तुलिथ पनुन कुसमत अज़मोवमुत ओस। बुथ्यन ओसुख रंग जान। शायद आसिहेख सारिनुय ताकुलुय द्रामुत।

अॅक्य बुजर्ग नफरन तु यिमय लॅडकव तु कोर्यव कोर सोनुय तरफ। सब्जी वाजनि ति प्यव सानी कथि ताॅयीद करुन। म्वखसर गव ऑनकी जोलनु मंज़ु हंद न्यबर कडुनस प्यठ मजबूर। असि दिद्य अॅठॅनी तस तु सु द्राव। अमि पतु लाॅज असि लॅडकन तु कोर्यन सुत्य कथ, तु दरबाराह करान करान द्रायि वापस गरु कुन।

अड वति ह्योत तिमव कोर्यव तु लॅडकव असि वॅखसथ। असि कोर तिमन साॅन्य तरफदॉरी करुनस प्यठ शुक्रिया। तिमव मंज़ु प्यव अॅकिस कोरि ज्वन। दोपुन, ‘हंद कति छव?’ असि दिद्य नज़र, मुचुकरी मंज़ु ऑस असि हंद तुलुन्य मॅशिथुय गॉमुत्र। अॅस्य दवेयि वापस। काॅठ्य दरवाज़स निशि वॉत्य, अति न ऑस हंद तु न स्व सब्जी वाजेन्य। असि दोप मूद्य व्वन्य। गरि खारन मार दी दी लहा। असि यारव मंज़ु येलि ति कांह अखाह अतुर करिहे, मार ओस सारिनुय प्यवान। सारिनुय हुंघन गरिक्थन ऑस पताह जि यिम छि साॅरी रॅलिथ। खास वॅरिथ ओस असि सारिनुय निकुनिस बाॅय सुंद, यस अॅस्य साॅरी बाॅय टोट ऑस्य वनान, सख बीम। सु ओस नु मार

दिनु वख्तु पथ ब्रॉट वुछान केंह। मगर रछान ति ओस सख। यि निकस क्युत अनिहे, ति ओस असि क्युत ति अनान।

असि वॉर वती मिटिंग जि व्वन्य क्या करव। अँठनी ति यियि नु वापस केंह, हंद कति अनव ? राजन हॉव कमाल हुशॉरी। दोपुन, अगर बूजिव, मे निशि छव अख सँबील। असि दोपुस, वन जल। दोपुन, 'गँणीशु बलु निशि वुछमवु मे अँकिस जायि द्रमनिस अंदर नुनर खँचमुच्च। अगर म्योन मॉनिव, तूर्य गछव तु तति अनव अँठन आनन बराबर नुनर वँडिथ।' निकस खोत ज़हर। दोपुनस, 'पागला! असि छा हंद अनुन्य किनु नुनर?' राजन वोनुनस वापस, 'रछाह हे अक्लि कॉम। अनुन्य ऑस हंद, मगर दफ अज़ ऑस नु हंदुय कुनुन्य। अज़ ऑस सिरिफ नुनर कुनुन्य।' निकु गव यि बूजिथ थोद वँथिथ। दोपुन, 'सँबील छि मोकूल। पँकिव वँरिव जलदी।' अमि पतु त्राँव असि गँणीशुबल कुन बेयि दव।

अँस्य येलि वापस गरु वॉत्य, दँह आसु बजेमच्च। निकुनि बदलु गोस बु बाँय टॉठिस ब्रॉह कुन तु नुनर ब्रॉट कनि त्राँविथ वोनुमस, 'अज़ हसाँ बनेयि नु हंद कुनी। तति ऑस सिरिफ नुनर कुनुन्य। साँरी बटु अँस्य जोलनु बँर्य बँर्य निवान। असि ति अँन्य।' बाँय टॉठ्य तुज नुनर अथस क्यथ। दोपुन लॉव नुनराह छि, अस्ल। जान कोरव।' असि चाव सारिनय जुव वापस।

बाह बजे ओस रेडियोहस प्यठ रिज़ल्ट। मे ओस पनुनि जायि फ्रठय। जांगुर वँरिथ ओस मे दोयिमि लटि हंड ताकुलुय पोज़ मोनमुत, मगर अँदुर्य ओसुस म्वकल्योमुत। यूत यूत रिज़लटुक वख नँज़दीख ह्योतुन वातुन, त्यूत त्यूत ह्योतुन मे ऑस ह्वखुन। मगर माजि शारिकायि ओस रुतुय मंज़ूर। काह बजे वोनुख जि मैट्रिकुक रिज़ल्ट नेरि व्वन्य पगाह। बु गोस यि बूजिथ ख्वश। रिज़ल्ट पगाह नेरनुक मतलब गव जि पगाह छु बेयि असि परबथ गछुन तु नवि सरु तोमलु पँल्य गँज़रावुन्य। म्यानि खॉतरु ओस यि अख चान्स बेयि। म्यॉन्य बाक्युय यार अँस्य नु ख्वश केंह। तिमन ओस फ्रठ जि खबर छा, पगाह क्या सपदि ? कस नेरि ताक तु कस नेरि जुफ ?



पास तु फेल

कालु आयि नु मे चेर ताम नैदरुय। युथुय मे नैदरु आँस ह्यवान पेन्य, बु ओसुस कांह नतु कांह खोफनाक सोपुन वुछान तु वूर्य वूर्य गछान थोद वेंथिथ। अमि पतु सूच मे जि नैदरु करनी छु गलथ। मे ह्योत लेफि तल बिहथुय यँद्रोखी पाठ परुन, तु यि पाठ रूदुस बु तोत ताम परान, योत ताम विजन ब्वनु प्यठु क्रख दिच। मे दिच गरि कुन नजर। पांछ आसु तयार बजुनस। मे द्युत बुथिस पां फशाह तु द्रास यारन सुत्य परबथ कुन।

म्योन अख यार ओस रोजान गुरगैर्य मँहलु। नाव ओसुस चमन लाल। परुनस क्युत ओस सु असि ति पथुय। मे सुत्य आँसुस खास यारज तिक्याजि बाक्यन लँडकन नाव तु र्यछु कडुनस मंज ओस नु असि द्दशवन्य कांह मुकाबलु। जय कृष्ण ओस असि निशि आँठ खंड थोद, नाव ओसुस कोरमुत फ्रस। मूती लालुनि अँछ आसु हमेशु बासान जन शरॉब्य अँछ, नाव कोरुस ठरु। शिबुनस आँस अकि दूह जरकु बरक करवन्य बँनियान लॉगिथ, नाव कोरुस जरबाबु। प्राण नाथस ओस गरि ज़मीन ज़िराथ स्पठाह तु सु ओस दूहय असि नवि तोमलुचि तु नवि खादि हंजु कथु बोज़ुनावान। नाव कोरुस खंडु खाद। टोजस ओस कलस मस कमुय, नाव ओसुस कोरमुत टिनि। क्याह क्याह वनोवु ?

गुरगैर्य मँहलु नँजदीख वॉतिथ प्यव मे खयाल जि चमनु ति कडोन सुत्य। मे कोर तस आंगनु मंजु आलव। तसुंद मोल गव झ्जार तु द्राव दारि किन्य। मे वोनस, “माहरा, कति छु चमनु? असि सुत्य यिया परबथ?” सु वोथ तोरु कमि ताम बुथि, “तस क्या करुन परबथ गँछिथ? सु छु पास।” यि वँनिथ चाव सु अंदर। बु गोस क्युथ ताम ह्यु। बाक्यव यारव वॉल्य मे पॉजार जि चे कथ ओसुय अँमिस आलव करनि गछुन ? मे मँजिमख मॉफी।

चमनुस ओस नु असि ब्रॉंतुय रिज़ल्ट द्रामुत कँह। दर अस्ल ओस तसुंदिस मॉल्य सुंद माम साधु लयि सुत्य। नाव ओसुस काकूजी। काकूजी ओस गाह बे-गाह यिहुंद गरु यिवान तु चमनु ओस तस स्पठाह खँदमथ करान। कँह मॉल्य सुंदि बीमु तु कँह पनुनि मतलबु। दपान इम्टिहानु ब्रॉंतुय ओस काकूजी चमनुनिस गरस मंजु डेरु त्रॉविथ ब्यूठमुथ। चिमट तु कमंडल ओसुस सुत्य, यथ रॉछ रावठ करुन्य चमनुस जिमु ओस। येलि चमनुन्य मॉल्य तस चमनुनिस इम्टिहानस मुतलिक वोन, तु सुती यि ति वोनस जि यि माहरा छुनु खास मेहनथा करान कँह, काकूजियन वोनस, “क्या छुस करुन पँरिथ ? गछ कर पनुन्य कॉम। बु दिमय नाबद रछाह पँरिथ। तमि मंजु गछ्यस रछाह रछाह दूहय दिन्य सुबहस नेरनु वख्तु। अदु यि तति लीख्यतन कँह या मतु लीख्यतन, पास छुस गछुन। गछतु, सेकंड डिविजन थवस बु अँज्य दिथ।” यि सॉरुय दँलील आँस मे चमनुनुय बोज़ुनॉवमुच। मे कयोव पनुन्य किन्य तस ज़ारु पारु जि मे ति नितु काकूजियस निशि, तु सु गँयोव तयार ति, मगर तसुंद्य मॉल्य दिच नु तथ वथ कँह। दोपुनस, यिम राज छिनु आसान लूकन बावन्य।

ब्रॉह कुन पँकिथ समखेयि असि लँडकु जोराह बेयि। तिम ति आँस्य परबथ गछान। येलि असि तिमन कालु सपदेमति वाकहुच कथ वँन्य, तिमव त्रोव असुन। दोपुख, पास फेल छा आसान वुछुन तोमलु फल्यन ? सु छु आसान वुछुन कनि फल्यन। असि सूच, असि छि तैलि कालु गॉमुच गलती। यिनु अज़ ति बेयि कांह गलती गछि, अमि किन्य ह्योत असि तिमन सुत्य सुत्य पकुन।

गॅणीशु बलु नीरिथ वॉत्य अँस्य तथ जायि, येति असि व्वन्य कनि पॅल्य तुलिथ पास फेल वुछुन ओस। हुमव द्यव लॅडकव वुछ पनुन कुसमथ ग्वड। अख ओस पास तु ब्याख फेल। युस फेल ओस, सु ब्यूठ कनि थरस प्यठ पथर तु लोगुन वदुन। व्वन्य छुनु ब्याख लॅडकु तस पोशान छ्वपु करुनावुनस। असि गव पनुन पास फेल वुछुन मॅशिथुय। बु गोस तस ब्रॉह कुन तु वोनुमस, “हता यारु पतु छा ती पोज आसान! बॅल्यकि बगवान च़े ति पासुय करी। व्वथ हे पानस गणीशु सुंद नाव तु दि गरु कुन कदम।” बु ओसुस अँमिस यि वनानुय ज़ि राजन दिच़ मे ज़ीर। कनस तल वोनुनम, “तेलि कथ छु असि ति पनुन पान रंदि कडुन। यि कुस्मतस आसि, ति वाति। वुन्यकि प्यठय क्याज़ि ह्यमव परेशॉनी मॅल्य?” मे दोपुस, “तेलि क्या, पास फेलुय वुछव ना?” सु वोथ दर जवाब, “अहानू, येलि अँमिस छुख नॅसीहथ करान ज़ि पतु छा ती पोज आसान, पानस क्याज़ि छुख नु वनान?” मे सूच ज़ि राजु ति छु पोजुय वनान। मगर च़कि ओस तस पानस ति अँज्यकिस फ़ठ।

लॅडकु ज़ु द्रायि वापस गरु कुन। फेलु वॉलिस अँस्य वुनि ति गित्य गछान मगर यार ओसुस दिलसु दिवान। तिम नीरिथुय बुलॉव असि बोनि तल मीटिंग ज़ि असि छा अज़ कनि पॅल्य तुलिथ गँजरावन्य किनु नु, तिक्याज़ि हुमिस लॅडकु सुंद वदन बुथ वुछिथ ओस असि न्यसुब जुव नीरिथ च़ोलमुत। निकन द्युत फॉसलु। दोपुन, अँस्य त्रावव यि मामलु स्योद माजि शारिकायि प्यठ। स्वय दियि तार। बॅल्य कथ छि वॉलिंज अथस क्यथ थवुन्य? सारिनुय आयि अथ कथि बराबँदी।

प्रक्रम दिथ वॉत्य अँस्य कौठ्य दरवाज़स प्यठ। कालुच सब्ज़ी वाजेन्य अँस अज़ ति तँथ्य जायि बिहिथ। असि दिच़ ओरु योर नज़र। सु अँनुकी गव नु कुनि नज़रि। अचानक पेयि सब्ज़ी वाजनि मे प्यठ नज़र। तमि लोय नाद, “हयो गोबराह!” अँस्य गँयि तस ब्रॉठ कुन। तमि वॅड चंदु मंज़ु अँठनी तु दिच़ुन असि। दोपुन, त्वहि गँयिवु ना राथ हंद येती मॅशिथ। स्व कुन्य मे बेयिस खॅरीदारस त तुहँद्य पाँसु आयि वापस। अँस्य गँयि ख्वश। निकन दोप, “हयो, दँसलाबय द्राव जान, दूह हबा नेरि वारु कारु रुत। मे छुवु बासान, अँस्य आसव सॉरी पास।” मे कोरुस तॉयीद। अमि पतु वॉत्य अँस्य असान तु गिंदान गरु वापस। डेरु लोग निकुनि गरि।

मसाह गव असि ओड गंटु गरु वॉत्यमुतिस ज़ि नेबुर्य गव आलव “हयो निका!” असि दिच़ दारि किन्य नज़र। निकुन यार अँली मीर ओस आंगुनस मंज़ अख अखबारु वरुखाह अथस क्यथ रँटिथ। असि वुछिथुय च़ाव सु दव तुलिथ अंदर तु दोपुन निकस कुन, “माजि हुंद कसम, अज़ त्रावथ नु अँकिस रच़ि। अज़ छय काकनि हुंदि अथु गाड ख्यावन्य। बा ख्वदा बोज़ुनावथ रुच़ खबर।” निकन कोरुस गाड ख्यावुनुक वादु। अँली मीरन कोड अखबारु वरुख तु त्रोवुन असि ब्रॉठु कनि। यि ओस सानि रिज़ल्टुक अखबार। अँली मीरस ओस मोल अँकिस अखबारु प्रेसस मंज़ कौम करान तु तँमी ओस अख वरुख सुबहॉय गरु वोलमुत। असि दिच़ अखबारस नज़र। असि आयि नु पनुन्य रोल नम्बर ज़न बोज़ुनय। अँली मीरन दिच़ अखबारस बेयि थफ तु रोदुन अथस मंज़। दोपुन, हता वुछान क्या छिवु? सॉरी छिवु पास। बु ति पास। अमि पतु हॉविन असि वारु पौठ्य पनुन्य रोल नम्बर। पँज्य पौठ्य अँस्य अँस्य सॉरी पास। असि कोर तस नालुमोत। यीतिस कालस लँज सारिनुय पताह ज़ि अँस्य गँयि मैट्रिकस पास। सारिनुय हुंद्य गरिव्य समेयि निकुनि गरि। बॉय टोठ ति ओस नु व्यच़ान कुनि। थर्ड डिविजन यिनस प्यठ कोरुन असि लानु तानु मगर अँदुर्य ओस ख्वश। अँली मीरुन्य डिमांड बूजिथ द्राव सु पोत खोरी वापस बाज़र गाडु अनुनि। अमि दूह लोग निकुनि गरि मॉलु। गाड वुछिथ कस यियिहे नु अँसस पोन्य? मगर बु

ओसुस रछाह दिल मलूल। चमनुन रोल नम्बर ओस नु अखबारस मंज कुनी। मतलब सु ओस फेल। यि ह्यकव नु वॅनिथ जि तस दूहदिश नाबद रछ दिनस मंज कॅरा तसुंद्य मॉल्य कांह कोताँही, किनु काकूजियुन नाबदय ओस गलथ।

रेडियोहस प्यठ रिज़ल्ट बोज़ान बोज़ान छु अर्यन दर्यन फ्रठ गछान। येलि रिज़ल्ट वनन वोल परान छु “वन वन टू, वन वन फोर, वन वन सेवन, वन टू वन” वॉलिंजि छि दुबुरारय बडान तु शाह छु बंद गछान। मे ओस्य यिथ्यन वख्तन प्यठ कम कम हटु कटु जवान कूनन चामुत्य वुछमुत्य। सारिनय बोज़न वाल्यन छि अमि सातु बुथ्यन लेदरि छठ आसान फीरमुच। ओस्य ओस्य रिज़ल्ट नेरुनस बेसबरी सान प्रारान ज़रूर, मगर फ्रटु वरॉय। अखबार नय आसिहे वुछमुत, असि ति आसिहे वॉलिंज ओसु किन्य खँचमुच।

बाह बजे त्रोव असि रेडियो। रिज़ल्ट वनुन गव शोरू। ओस्य ओस्य ठाह ठाह कॅरिथ असान तु गँज़रावान जि येमि नम्बरु प्यठ यथ नम्बरुस ताम कॅच पॅयि। निकु ओस असि सुत्य सुत्य वनान जि यि कुस स्कूल गव तु अमि पतु कुस स्कूल यियि। येलि सोन नम्बर नज़दीख ह्योतुन वातुन, असि व्वशल्यव बुथ। फ्रठ रूद जि यिनु वनन वोल सोन रोल नम्बरुय वनि नु! मगर ति सपद्यव नु कॅह। सोन नम्बर आव पनुनि वारि प्यठ। राजन दिच क्रख, “असली मुबारख हबा छुवु व्वन्य।” अमि पतु मतु पृछ्यतव जि असि काँत्याह पाँसु वॅट्य पास गछुनस, तु अँली मीरन कॅच गाडु गनि खेयि! मगर अफसूस, चमनु ओस रेडियोहस प्यठ ति फेलुय। मे दौप वाय, मोल हय वथ दियिहेस, असि सुत्य आसिहे सु ति परबथ आमुत। अदु यिथु पाँठ्य माजि शारिकायि ओस्य कॅर्य पास, तिथय पाँठ्य करिहे तस ति।



कैटरपिलर

यि ओस बैसाखुक वख। कुल्यन कट्यन ओस नोव पन द्रामुत तु कुनि कुनि आँस बरजस्तु फुलय। बु ओसुस आँठी बजि सुबुहस तयार गँछिथ क्वार्टरस नेबर कनि लानस मंज्र बिहिथ चाय चवान। मे सूंच जि यीतिस कालस चाय चवान छुस, तीतिस कालस दिमु बैयि अकि लटि दपत्तुरक्यन काकृज्ज न प्युर। मे फिर्य फाइलि हँद्य वरख अकि अकि बैयि तु हेतिम केंह ज़रूरी न्वक्तु याद करुन्य। दपान ज़ांह गछि नु गुरिस पँत्य किन्य तु अफसरस ब्रूह्य किन्य पकुन। गुर छु पँत्य किन्य लथ लायान तु अफसर छु बुथि वुछिथुय रोब करान। हरगाह नु रोब करुन्य लायख कांह कथुय आसि, तेलि छु तोति हुट मुटुच कांह कॉम दिवान। अज़ ओस नु मे अँक्यसुय अफसरस ब्रूह्य किन्य पकुन केंह, बँल्यकि ओस अज़ मे चीफ साँबस सुत्य ति मुलाकात करुन्य। दय ज्ञानान कथ कथि प्यठ रटि तु कथ कथि प्यठ त्रावि? अमि किन्य ओसुस बु कूशिश करान जि मे गोछ प्रथ कुनि कथि तगुन जवाब द्युन। आँखुर छना सॉरुय बलायि वातान ल्वकटिसुय मुलॉज़िमस प्यठ!!

दँलील आँस यिथुपॉठ्य जि चँर्यवनु ओस बिजलीगरुकिस टँरबाइनस क्याहताम खुर आमुत तु बिजली हँज पॉदावार आँस बंद गॉमुच। लोकल इंजीन्यरन हँदि जस्तु खॉज़ु बावजूद ह्योक नु यि टँरबाइन ठीख सपदिथ। अमि किन्य आव नेबर प्यठ अख ज़्यादु ज्ञानकार इंजीन्यर बुलावनु, येम्य टँरबाइन ठीख करनु खॉतरु पनुन अख प्लान मुरत्तब कोर। यि प्लान आव मंज़ूरी खातरु चीफ इंजीन्यरस शहर सोज़नु, मगर चीफ साँबन कोर प्लान अँछ वँटिथुय मंज़ूर करनुस इनकार। तँम्य कोर फॉसलु जि न्वकसुच साम ह्यनु बापथ करि सु पानु चँर्यवनुक दोर। च्वन द्वहन इन्तिज़ार वँरिथ वोत अज़ सु द्वह येलि चीफ साँबस पानु ओस ओर वातुन। प्रोग्राम ओस जि सु वाति शहरु प्यठ नव बजे बाँग्य। डिविजनल आफिसु, युस थरगुंडु ओस, करन अतिक्य अफसर चीफ साँबस सुत्य मुलाकात तु चाय चथ सपदन साँरी चँर्यवन कुन रवानु। चँर्यवनु हेयि चीफ साँब मोकस प्यठुय वाकातन हँज साम तु बैयि करि नेबरु प्यठ आमुतिस इंजीन्यर तिवारी साँबस सुत्य ति मुलाकात। तमि पतु वातन तिम वापस थरगुंड, येति बतुक इन्तिज़ाम ओस करनु आनुत। बतु ख्यथ करन तिम पानुवँन्य सलाह मशवरु।

चीफ साँब वोत बराबर काह बजे थरगुंड। एक्जिक्यूटिव इंजीन्यर मागरे साँब ओस पनुन्यन मातुहतन सुत्य, यथ मंज्र जाला साँब असिस्टेंट एक्जिक्यूटिव इंजीन्यर तु तारिक साँब अँसिस्टेंट इंजीन्यर शॉमिल आँस्य, सडकि प्यठुय प्रारान। नेबर्युम इंजीन्यर तिवारी जी ति ओसुख सुत्य। सलाम दुआ वँरिथ तु चाय चथ सपदेयि साँरी चँर्यवन कुन रवानु। मागरे साँबुन टेक्निक्ल पी.ए. आसनु सबु ओस मे ति तिमन सुत्य ज़रूरी गछुन। चीफ साँबस पतु पतु आँस जीपन हुंज लॉन तु बु ति खोतुस अँकिस जीपि। चर्यवन वातान वातान बजेयि बाह। अति ओस प्रान नाथ जूनियर इंजीन्यर तु तसँद्य वकर्स सुपरवाइज़र जमाल दीन तु गफार डार फाकय तु फुकरय प्रारान।

चीफ साँब ओस अथ अलाकस मंज्र ग्वडनिचि लटि आमुत। जीपि मंज्र बन वँसिथ हेच तँम्य नज़रि सुती अलाकच साम। पावर हाऊस ओस सडकि प्यठ स्यठाह बन, दँरियावस निश। हालांकि पावर हाऊसस ताम आँस प्वख्तु सडख मगर चीफ साँबन ज़ोन मुनॉसिब व्वखुली पकुन।

मागरे साँबन कुन बुथ वॅरिथ वोनून, “बुछ हज क्वाह नज़ार छु? च्वापाँर्य छु गोन जंगल, ताज़ु हवा तु साफ आब। कति बनि यि जाय शहरस मंज़? हरगाह अख मील ति इनसान यथ जायि सुबहस सुबहस पैदल पकि, ज़ु ज़ु सेर माज़ हुरनस। दफ हज यि छि ख्वदा साँबन असि न्यामथ अता वॅरमुच।” मागरे साँबन कोर बडि बडि आंकार। हालांकि हॅकीकथ आँस यि ज़ि सु ओस पॅतिम्यन त्रे वॅरियन मंज़ योर सिर्फ द्वयि लटि आमुत, तु पावर हाऊसस ताम ओस अकी लटि गोमुत, सु ति जीपि मंज़। असि ति कोर तस सुत्य सुत्य चीफ साँबुनि कथि आंकार, तु लॅग्य तिथुपाँठ्य कदम तुलनि, ज़न तु असि वुमरन हंज़ पकनुच हॉल आँस। बाक्य साँरी ति गॅयि तस पतु पतु पकनुस मजबूर।

मसाह आसिहे असि ओड मीलाह कोडमुत ज़ि चीफ साँबस पेयि दूरि कथ ताम चीज़स प्यठ नज़र। अख कुल्य लँडाह अख आँस पथर पेमुच तु अँथ्य कुन ओस चीफ साँब मुदय गँडिथ वुछान। असि ति त्राँव सारिवुय ओर कुन नज़र मगर बोज़नु आव नु कॅह। चीफ साँब वोत यीतिस कालस अथ कुल्य लंजि ब्रॉह कुन। साँरी अफसर क्यो मुलॉजिम छि तस पतु पतु पकान। मे ति तुज यि दॅप्यजि ति दव, ज़ि खबर यिमव मा ख्यव, मेय मा रूद ख्यनय। चीफ साँबस अँद्य अँद्य गॅयि साँरी जमाह। मे दिच तारिक साँबस ज़ीर तु तॅम्य त्राँव मे जाय। चीफ साँब ओस ब्वन कुन जुकिथ पनु वॅथुरस कुन वुछान। अँस्य पॅक्य बेयि रछाह ब्रॉह कुन। अँकिस पनु वॅथुरस प्यठ आँस्य ज़ु वेठ्य कैटरपिलर (बॅड्य मुहुर्य) आराम करान। अख ओस सबुज तु ब्याख शाह तुल्य रंगु। तापस मंज़ ओस दूशवन्य हुंद रंग सख चमकान। चीफ साँबन दिच क्रख ‘कैटरपिलर’ तु त्राँवुन मागरे साँबस कुन नज़र। मागरे साँबन हिलोव तिथु पाँठ्य कलु ज़न तु कांह बेश कुमथ खज़ानु ओस कस ताम मॅशिथ गोमुत तु चीफ साँबन ओस वदि कोडमुत। मागरे साँबन बनोव बुथ असुवुन तु दिचुन जाला साँबस कुन नज़र। जाला साँब ओस ग्वडय तयार। तॅम्य ति हिलोव तिथु पाँठ्य कलु ज़न तु चीफ साँबुनि तेज़ नज़रि दाद ओस दिवान। यीतिस कालस पॅक्य साँरी अकि अकि ब्रॉह कुन तु कोरुख कैटरपिलरन हुंद दीदार। साँरी आँस्य चीफ साँबस तहसीनुचव नज़रव वुछान। मे सूंच, खबर चीफ साँब मा दियि यिमन सारिनय प्रमोशन तु बय रोज़ु यपारी। मे कोर जिगरु तु वोनूम पनुनिस साहबस मागरे साँबस कुन बडि बडि, “जिनाब, यि कस पेयि यिमन प्यठ ग्वडु नज़र?” मागरे साँबन खोर ज़बरदॅस्ती बुथिस खुशी हुंद रंग तु होवुन चीफ साँबस कुन इशारु, युस वुनि ति केम्यन दॅछिन्य तु खोवुर्य ओस वुछान, “चीफ साँबस हसाँ, बेयि कस?” बु गोस चीफ साँबस ब्रॉह कुन तु वोनुमस, “रंग हज छुख बराबर वॉलिंजि मंज़ थवुन लायख।” चीफ साँबन तुल कलु थोद। मे कुन वॅरुन वारु नज़र तु वोनून, “तुहुंद तारुफ?” मे चॅज खवरव तलु मेच नीरिथ। मे दोप हय हे, मे मा गॅयि कथ करुन्य पॅरिथ। मे वोनूस, “बु जिनाब छुस मागरे साँबुन टेक्निक्ल पी.ए.।” चीफ साँब वोथ थोद। मे दोप यि गोछ नु मे थापुर कडुन। मे कोड अख कदम पथ। बाक्य आँस्य साँरी हयबुंगु। चीफ साँबन वॅर मे अथस थफ तु दोपुन, “तलु साँ हेरि वनख काँसि म्योन कैमरा वालुन।” मे आयि नु वथ कुनि। मे होकुम दिथ युस पानुन्यार चीफ साँबन मे सुत्य होव, तमि सुत्य हुर्वव मे यज़थ। बु फ्यूरुस तेज़ तेज़ पथ तु वोनुमस, “बु जिनाब खारु पानय।” मागरे साँबन त्राँव मे कुन दोलु नज़र तु कनस तल वोनुनम, “पानु कोत छुय गछुन? जमालु सोज़ुन।” तसुंदि बुथि प्यठ ओस साफ यिवान बोज़नु ज़ि तस आँस नु मे सुत्य हमददी कॅह, बॅत्यकि ओस नु सु यछान ज़ि मे क्या गॅछ चीफ साँबस सुत्य ज़्यादु जान पहचान

सपदन्य। मे गव बुथ अलूंद तु वोनुम जमाल दीनस, “गछ साँ हेरि वाल साहबु संजि जीपि मंजु कैमरा।” जमाल दीनन तुज दव।

चीफ साँब ओस व्वन्य व्वदनी, क्याहताम साँचान। सारिवुय अफसरव लोग त्युथ ज़न तु तिम ति आँस्य साँचान। यि ओस नु काँसि पताह ज़ि कुस क्याह छु साँचान। मिनट वुह मरु गँयि। जमाल दीन आव नु वापस कैह। चीफ साँबन दिच गरि नज़र। अख आँस तयार बजुनस। मागरे साँबस कुन कोरुन बुथ तु वोनुनस, “मे छु बासान तीतिस कालस खसव अँस्य व्वनु। तति कूत काल लगी?” मागरे साँबन दिच जाला साँबस कुन नज़र। जाला साँबन वोन, “बस जिनाब, मसाह ओड गंट।” साँरी पँक्य व्वन्य पावर हाऊस कुन। चीफ साँब तु मागरे साँब ब्रॉट ब्रॉट, तु बाक्य पतु पतु। पकान पकान ओस चीफ साँब वुनि ति पथ कुन नज़र नज़र दिवान ज़ि कैटरपिलर छा अँत्य किनु चँल्य! मागरे साँबन वोन गफार डारस, “चु प्रार साँ येत्य। जमाल दीन यियी कैमरा ह्यथ, पतु यि तँस्य सुत्य।” बिजली गरस निश आँस अख पार्क। चीफ साँबस आयि शायद पार्क पसंद। दोपुन, “व्वन्य क्या करनि छु व्वन वसुन। येती लॉगिव कुर्सी तु ब्यहमव।” होकुमस आयि यकदम तॉमील करनु। चीफ साँब, मागरे साँब, तिवारी साँब तु जाला साँब बीठ्य कुरसियन प्यठ। बाक्य रूद्य व्वदनी। यीतिस कालस अँन्य अतिक्य स्टाफन चाय तु बिसकूट, तु लॉज सारिवुय चाय चैन्य। मागरे साँबन ह्योत पनुनि डायरी मंजु क्याहताम लेखुन।

चाय चवान चवान दिच चीफ साँबन नेबरु प्यठ आमृतिस इंजीन्यर तिवारी साँबस कुन नज़र। तिवारी साँबन युथुय चीफ साँब पानस कुन वुछान वुछ, तँम्य कोड जल जल पनुन ड्राइंग तु थोवुन तस ब्रॉट कनि।

बिजली गरु किस टँरबाइनस ओस संगीनु कोस आमृत, यि ओस तिवारी साँबुन वनुन। चीफ साँबन दिच नख्वस आँकवुनी नज़राह। तिवारी साँबस ओस वनुन ज़ि टँरबाइन किथु वँन्य छु खराब गोमुत तु तथ ठीख करनुक तसुंद प्लान क्या छु। जाला साँबन कोर तस इशारु तु तँम्य ह्योत पनुन आँस खोलुन। मगर चीफ साँब ओस नु मूडस मंजु कैह। तस आस्य शायद वुनि ति प्रान कैटरपिलरन मंजु। तँम्य वोन मागरे साँबस, “व्वलु हज़ यि यिथि ना पतु करनु। बतु ख्यथ क्या छु असि बेयि करुन?” मागरे साँबन होव तिवारी साँबस इशारु ज़ि अथ प्यठ करव कथ बतु ख्यथ। यीतिस कालस वोत जमाल दीन कैमरा ह्यथ। कैमरा वुछिथुय वोत्यव चीफ साँब। जमाल दीनस पृछुन, “यूत काल छा लगान कैमरा अननुस? चै क्या छुय नाव?” जमाल दीन व्वशल्यव। तस फूर नु जवाबुय। मागरे साँबन वोनुनस, “क्या साँ जवाब क्याजि छुख नु दिवान? यूत वख कथ लोगुय?” जमाल दीनन वोनुस, “जिनाब, तति आँस नु साहबु संजु गॉडी। साहबु सुंद ड्राइवर ओस गोमुत ह्योर गाम चाय चैनि तु गॉड्य आँसुन नीमुच सुत्य। बु ओसुस जिनाब तँस्य प्रारान।” अथ कथि न फूर चीफ साँबस जवाब तु न मागरे साँबस। चीफ साँबन रोट कैमरा अथस मंजु तु वोनुन मागरे साँबस, “वँलिव नेरव।” मागरे साँबन पृछुनस, “जिनाब, टँरबाइनस दिमव ना नज़र।” चीफ साँबन वोनुस वापस, “व्वन्य क्या नेरि तथ नज़र दिथ। त्वहि आसिवु ना वुछमुत।” मागरे साँबन हिलोव आंकारस मंजु कलु, हालांकि खराब गछनु पतु आँस नु तँम्य तथ अकि लटि ति नज़र दिचमुच।

चीफ साँब ओस तेज़ तेज़ दवान। पतु पतु ओस सोरुय कारवान दवान। चूकि योरु ओस चडायि खसुन, अमि किन्य ओस सारिनुय फ़ख खोतमुत। वातान वातान वॉत्य साँरी तथ कुल्य लंजि निश यथ प्यठ कैटरपिलर आँस्य। मगर अफसूस! लँड आँस अँत्य, मगर केम्य आँस्य नु

कुनी। चीफ साँब छु ओरु योर दवान, मागरे साँब तस पतु पतु। मागरे साँबन वोन जाला साँबस, “तलु साँ तोह्य बुछिव हुमि तरफु। जाला साँब द्राव अकि तरफु तु तारिक साँबस वोनून बेयि तरफु बुछुन। बु ओसुस अँन्यूर ह्यु प्रारान जि मे मा दियि चीफ साँब बेयि कांह होकुम। मगर ति सपद्यव नु कैह। व्वन्य ह्योत मे ति ओरु योर दवुन, कैटरपिलर छांडनु खाँतरु कम तु चीफ साँबस हावनु खाँतरु जादु। मे ओस पूरु यकीन जि साँरी आँस्य ती करान।

अचानक पेयि मे चीफ साँबुनिस बुथिस कुन नजर। तस आँस लेदरि छठ फीरमुद्य। मे वँर ह्यमथ तु गोस तस ब्रोंह कुन। बिचौर्य बुथ लॉगिथ वोनूमस, “जिनाब, यिमन कैटरपिलरन क्याह ओस त्वहि करुन?” चीफ साँबस व्वजुल्यव बुथ। कैमरा त्रुवुन पनुनिस फेकिस प्यठ अलूंद। मे कुन वँरुन दोलु नजर तु वोनून, “चे क्या छुय बासान? मे आँस्या यिम गरु सुत्यु निन्य?” मे वँछु यीरी पीरी। सारिनय ब्रोंठु कनि गोस रुसवा। मागरे साँबन बनोव बुथ तुथ, जन मे जिंदय चापिहे। जाला साँबन वोन वुठव सुती क्याहताम। शायद ओस वनान जि चे क्वसु चेट्च आँसुय मँज्य कथ करुन्य? मे तोर फिकरी जि चीफ साँब यि करि तु ति करि, मगर यिम साँरी त्रावन नु मे अज जिंदु कैह।

“न जिनाब, म्योन मतलब ओस नु ति ...”, मे हेचौर्यि चीफ साँबस पनुन्य सफौर्यी दिन्य। तँम्य चँट म्यौन्य कथ तु वोनून, “बलायि आयि अथ टँरबाइनस, अँम्य ख्यव ना वख्त! वारु कारु हय येत्य आँस्य तु कोत गौर्यि यितिसुय कालस?” चीफ साँबन वोन तिथु पॉठ्य, जन तस टँरबाइनुक न्वकुस कडान कडान तस दूह वादु आँस्य लँग्यमुत्य। मगर तसुजि कथि सुत्यु बडेयि मे ह्यमथ। मे दोप, न, चीफ साँब छुनु मे नाराज कैह। नाराज आसिहे, तेलि खेयिहे बुथ। मे वोनूस, “जिनाब, अगर तोह्य वँनिव, बु छांडन बदल कांह कैटरपिलर पगाह तु तुलस फोटुव। येति छि यिम बिसियार आसान। मे छु कैमरा ति।” मे ओस नु हँकीकतन कैमरा कैह, मगर मे सूच, अमि सुत्यु तरि अँमिस फिकरी जि बु छुस नु शिकसलद कैह। हरगाह कैमरा जरूरथ ति पेयि, काँसि ह्यमव व्वजुम। या तमि पतु मागरे साँबस छुना पानस ति कैमरा! तँस्य ह्यमव। सु क्या नकार कर्या? म्यानि खाँतरु छुसु द्युन, द्युन छुसु चीफ साँबुनि खाँतरु।

चीफ साँब ओस वुनि ति व्वदौस्य, मगर म्यानि कथि सुत्यु गोस शायद तसलाह। तँम्य थोव मे फेकिस प्यठ अथु। बु गोस बाह बाह गज थोद वँथिथ। जाला साँबस तु तारिक साँबस कुन वँरुम दोलु नजर। मतलब, बु गोस व्वन्य चीफ साँबुन खास नफर। चीफ साँबन प्रुछ मे नाव। मे वोनूस पनुन नाव तु तँम्य वोन तोरु, “मंजूर साँब छु ना साँ परान ज़ोलोजी। तँस्य क्युत ओसुम यि फोटू बकार।” अमि पतु वोनून मागरे साँबस कुन, “बु हज योत योत गछान छुस, कैमरा छुस अवय सुत्यु थवान जि बुथि मा पेयि कांह केम्य ज़ाथ या जानवर, बु निमस फोटुव तुलिथ। मंजूर साँबस छि यिम फोटू बडु बकार यिवान।” मंजूर साँब आसिहे शायद चीफ साँबस नेचुव। मागरे साँबन हिलोव शाबौशी हुंदिस अंदाजस मंज कलु तु वोनूनस, “जिनाब, सु ति मा छु युथ तुथुथ बचु। सु छु बडु मेहनती। वँचिम वँरी छुस हज?” चीफ साँबन खारि ड्यकस द्रुह। ओरु योर त्रॉवन नजर तु पतु वोनून मागरे साँबस, “तस हज छु फाइनल इयर। मगर तुह्य कति ज़ौन्यून सु?” मागरे साँबस गव शाह बंद। तँम्य ओस नु ज़ांह मंजूर साँब वुछमुतुय। तसुंद मतलब ओस सिर्फ चीफ साँबस थँन्य करुन्य। मगर फ्यार ओसुस आँसु नीरिथ च़ोलमुत, अवु किन्य प्योस जवाब द्युन, “जिनाब, मे छु सु कति ताम दावुथस मंज त्वही सुत्यु वुछमुत। शायद पँत्यमि र्यतय, वँमिश्नर साँबुनिस नेचिव्य सुंदिस खांदरस प्यठ।” चीफ साँबस वँछु नु यि कथ हटि कैह।

दोपुनस, “न हज़, सु कति? तस गॅयि व्वन्य जु वॅरी अम्रीका गॉमतिस्।” मागरे सॉबस फीर लेदरि छठ बुथिस। असि सारिनय थी गॅयस खजालथ। तोति लोगुन बुथ्य त्रकुर तु वोनुनस, “तैलि हज़ आसि मेय गलथ-फहमी।” चीफ सॉबन द्युत नु येमि लटि जवाब कैह। सु ओस वुनि ति ओरु योर नज़र दिवान जि कुनि मा गछि कैटरपिलर नज़रि। रछाह गॅछिथ वोन मागरे सॉबन चीफ सॉबस, “व्वलु हज़ पकव व्वन्य, बतु गछि ना यख।” चीफ सॉबन त्राँव गरि कुन नज़र। चोर आसु बजेमचु। दोपुनस, “आ, पॅकिव जल, पतु लगि ना डिसकशन करुनस ति वख।”

मागरे सॉबन आसु चीफ सॉबस खॉतरु कमु कमु ज़ियाफतु बनावनाविमचु। वाज़वान ओस तयस प्यठ आमुत लागनु। अँकिस र्वपयि हुँजि जायि आसु जु खर्च करनु आमचु तु हिसाबस यिहँन पाँछ हावनु। यि सोरुय खर्चु यियिहे कुनि हिसाबस मंज त्रावुन तु अमिच मंजूरी दियिहे चीफ सॉब अँछ वॅटिथ। चीफ सॉबस आव बतु ख्यनस मज़य। बाक्य अफसर क्यो मुलॉज़िम ति ऑस्य टास वॅड्य वॅड्य ख्यवान। बतु ख्यनु पतु आव ज़ाफरॉनी कैहवु पेश करनु। यीतिस कालस बजेयि शे।

चीफ सॉबन दिचु बेयि गरि कुन नज़र तु वोनुन मागरे सॉबस, “चेर गव स्यठाह। यि वुछिवुन ना ड्राइवर कोत गव? खबर तँम्य ख्यवु कैह? दँपिवुस नेरव। मागरे सॉबन वोनुस, “अहन हज़, तँम्य ख्यव बतु। यि छु यपॉर्य तिवारी सॉब प्रारान, अँमिस सुत्य करव ना कथ?” चीफ सॉबस गव यि वनुन बडु नागवार। दोपुनस, “हतु हज़, व्वन्य कथ छि अँमिस सुत्य मगुजमॉरी करुन्य। दीवुस हज़ कॉम करनु। यि क्या गलथ वन्या?” तिवारी सॉब ओस अँकिस अंदस कुन बिहिथ क्याहताम लेखान।

चीफ सॉब द्राव शहर कुन। मे वोन मागरे सॉबस, “दूह हज़ द्राव जान। चीफ सॉबन चाहे कैह वुछ या न वुछ, मगर कामि दिचुन अप्रवल। असि क्या ओस बेयि बकार!” मागरे सॉबन कोर आंकार। जाला सॉबस कुन त्राँवुन नज़र तु वोनुनस, “खबर यिम कैटरपिलर कति पॅट्य अँज्य? मे ऑस बेयि ति कुनि कुनि खर्चस अप्रवल हेन्य, स्व कॉम रूज़ यपारी। प्यठ वनय सिरु कथ। यि कैमरा छुय डिपार्टमेंटुक। बु ओसुस सॉचान यि तुलि अमि सुत्य टॅरबाइनस तु असि फोटू। मगर अँम्य छुनय यि लोगमुत केम्यन क्रुलन फोटुव तुलुनस। वनतु क्याह वनुहँस?”

चीफ सॉब नीरिथ आव तिवारी सॉब ब्रॉह कुन। तस ओस अथस क्यथ वुनि ति टॅरबाइनुक ड्राईंग। मागरे सॉबन वोनुस जि डिसकशन करनुक छुनु व्वन्य कांह ज़रुरथ, तु सु हेकि पनुन्य कॉम शुरू वॅरिथ। तिवारी सॉब गव हॉरान तु परेशान। तस ओस नु समजुय यिवान जि काकुद वुछनु वरॉयी किथु पॉठ्य मीज तथ अप्रवल। सु ओस गरा मागरे सॉबस कुन वुछान तु गरा पनुनिस ड्राईंगस कुन। ठीख तिथय पॉठ्य, यिथु पॉठ्य बु ओसुस गरा तसुंदिस बुथिस कुन वुछान तु गरा पनुनि फाइलि कुन, य्वसु मे अकि लटि ति मुचरावनुच ज़रुरथुय पेयि नु।



डुड

कालिजु प्यठु गरु वसान वसान येलि अँस्य देवान बाग वॉत्य, अति पेयि असि दूरि अँकिस सायबानस प्यठ नज़र। सायबानु ओस नोव तु रंगुदार। विजन त्रॉव मे कुन दोलु नज़र। दोपुन “कस ताम छु खांदर। वुमराह अख गव खांदरु साल ख्यनुसुय।” मे कोरुस आंकार। खांदरु सालुक नाव बूज़िथुय ओस मे ति अँसस पोन्थ यिवान। विजन थोव मे फेकिस प्यठ अथु तु दोपुन, “क्याह छुख वनान?” मे तोर नु केंह फिकरी। यिथ्यन मामुलन मज़ ओसुस बु सख मुड। मे वोनस, “कथ मुतलिक।” विजन वोन, “पख ब्रॉट, अँती वनय।”

ओड मीलु कमय पहन ह्यू पँकिथ वॉत्य अँस्य तथ सायबानस निश। सायबानु ओस सडकि हुंद अख हिसु बंद वँरिथ लागनु आमुत। ज़ु त्रे नफर अँस्य तँजीरु गंडान तु केंह अँस्य सायबानस अँदरु कनि सतरंडु तु मसनंदु वाहरावान। नेबरु कनि अँस्य केंह जवान ओरु योर दवु दव करान तु पांछु शे बुज़र्ग अँस्य वदुनी दरबार करान। बु ओसुस यि नज़ारु वुछुनस मंज़ मशूल। सायबानस अंदर अँस्य लँडकु तारु वाव मालु लागान मगर अथ वथ ज़न अँसुख नु यिवान केंह। मे गव मथ ज़ि बु हावु यिमान वाव मालु किथु कँन्य छि यिवान गंडनु मगर विजुन बुथ वुछिथ खेयम कथ। सु ओस अक्सर वनान ज़ि बु छुस हंगु तु मंगु ज़हरुबादस जंग छुनान।

विजन कोर मे अँती रोज़नुक इशारु तु वुछान वुछान त्रॉवन सायबानस अंदर कुन टुख। बु रूदुस सडकि प्यठ वदनी। येलि नु सु वारियाहस कालस वापसुय आव, बु गोस तस छंडनि। विजु ओस नु कुनी। सायबानस अँदरु अँस अकि तरफु मकानस अंदर अचुनस वथ, मगर मे ज़ोन नु तोर गछुन मुनाँसिब। मिनठ पंदाह मरु गँछिथ आव विजु वापस तु वोनन, “मे कोरुय सोरुय पताह। कस ताम गूपी नाथस छु नेचिविस खांदर। अज़ छख माँज़िराथ तु नेनि साल छु तयस प्यठ आमुत करनु। दपान अलु पलु छि आँठ सिन्य रननु आमुत्य। आंचार तु ज़ामुत दूदु प्यालु गँयि अलग।” “मगर चे कँम्य वँनी यि दँलील?” मे पृछुस। विजन वोन, “मे लॉज सायबानु वॉलिस दँदुर तु तँमी वोन। अखतुय ओस वनान ज़ि असॉम्य छे स्यठाह अँमीर।”

ज़ामुत दूदु प्यालुक नाव बूज़िथु आव मे अँसस वारय पोन्थ। मे अँस ल्वकुचारु पानु प्यठय ज़ामुति दूदुच सख कमज़री। अमि ब्रॉट ज़ि बु सॉंचु हॉ बेयि केंह, विजन वँर मे अथस थफ तु वोनन, “मे करेयि कूशिश ज़ि अति मा नेरि कांह ज़ॉन्य, मगर द्राव नु कांह। तोति छुनु परवाय केंह। अगर चु दिल करख, अँस्य ति यिमव साल खेनि। असि क्या थफ वँरिथ प्रुछुया कांह ज़ि तोह्य कम छिवु? सॉरी सॉचन आसन काँसि हुंद्य अँशुनाव।” मे द्युतुस नु जवाब केंह। बु ओसुस च़कि खोचु बुड। बँल्य कथ ओसुम पनुन पान अँट्य अट्य कडुन! विजस ति गँयि म्यानि जवाब नु दिनु सुत्य तसलाह तु तमि पतु त्रॉव असि गरु कुन दव।

किताबु गरि त्रॉविथ वॉत्य अँस्य स्योदुय निकस निश। सु ओस पतलूनस कुंद्य करान। असि कोर तस निश दुहुक रपोट पेश तु सुती वँनिस सायबानुच शेछ। येलि विजन तस वोन ज़ि कस ताम गूपी नाथस छु नेचिविस खांदर, निकन चारि बुम। दोपुन, “हा दपू यारु सतीशस छु बाँयिस खांदर।” “कुस सतीशु?” असि पृछुस। निकन थँव चुनि कुंद्य कनि पाँतरि प्यठ तु दोपुन, “यि सायबानु ओस ना गोल मज़ारस निश खोवरि सडकि प्यठ?” असि कोर आंकार। तँम्य वोन, “तँती गव ना वल्यन हुंद मकानु। गूपी नाथ वोल गव सतीशस मोल। खबर तोरवु

फिकरी केंह ?” मे पृष्ठुस बेयि, “यि सतीश कुस गव ?” सु वोथ दर जवाब, “सतीश छु मेय सुत्य परान एस.पी.कालिजु। तोह्य कति जॉनिवून!” निकन थोव कुंघ कोरमुत पतलून किलिस अलूंद तु लॉजिन वॉमीज़ि कुंघ करुन्य। असि कुन वुछिथ वोनुन, “तोह्य ति वॉरिव पनुन्य पलव तयार, सालस छुना गछुन!” मे पृष्ठुस, “असि क्युथ साल छु ?” निकन वोन वापस, “अंती छुख बेकुल लागान। दोपुय ना सतीशस छु बॉयिस खांदर तु सतीश गव मे यार। तँम्य ओस मे पँत्यमि हपत्तु वोनमुत मगर मे रूद नु यादुय। त्वहि ति छुवु मे सुत्य युन।” यि बूज़िथ गोस बु ख्वश। मे ओस वख्ताह अख गोमुत खांदर साल ख्यनुसुय। मे वॉर सतीशस तु निकस ऑही। विजु ओस ज्यादय पहन ख्वश। दोपुन, “बलायि छनुस, बु ओसुस डुडु पॉठ्य ति गछुनस तयार। मगर व्वन्य गव जान जि यज़तु सान गछव।” निकस ओस सु तिथु पॉठ्य बुथिस कुन वुछान ज़न तु तसंज़ सतन पीर्यन मिनथ ऑसुस।

साल ओस ऑंठि बजि मगर अँस्य वॉत्य सती बजि। खांदर वॉल्य ऑस्य दवु दव करान। सायबानस नेबर कनि आसु अँकिस जायि कुरसियु लॉगिथ। केंह बुज़र्ग ऑस्य बिहिथ सियाँसथ दगान। शेख अबदुल्लाहन क्याह वोन तु मीर कॉसिमन क्याह वोन ? असि ऑस नु तिहँज़न कथन सुत्य कांह दिलचस्पी। अँस्य रूद्य तिमन दूरुय पहन व्वदनी। मे प्रुछ निकस जि सतीश कति छु। तँम्य दोप तोह्य रूज़िव येत्य, बु छॉडन।

सतीश ओस आवुर। निकन दोप सु ओस अँदर वुर बलस प्यठ कथ ताम इन्तिज़ामस लोगमुत।

खांदर वाल्यव मंज़ु यिम नफर अँदर नेबर नचान ऑस्य, निकु ओस तिमव मंज़ु काँसि काँसि नमस्कार करान। तिम ति ऑसिस वापस नमस्कार करान। अख्तुय ओसुस कांह कांह पृछान, “वन साँ गोबरा, वारय!” अँस्य ऑस्य मंज़ु मंज़ु निकस पृछान जि हु कुस गव तु यि कुस गव ? निकु ओस वापस वनान जि हु गव सतीशस माम तु यि गोस पितुर बोय। असि आव समुज जि निकु ज़ानि वल्यन हँदिस खानुदानस स्यठाह जान पॉठ्य।

साडि ऑंठि बजि प्यठु हेतिन सालुर्य यिन्य। ग्वडनिची छ्वकि सुत्य चायि अँस्य ति अंदर। अँदर ऑस्य बतु ख्यनुक्य पँट्य त्रॉविथ। निकन रँट अंद कुन जाय तु कोरुन असि इशारु। अँस्य बीठ्य पथर। अँडिस गंटस मंज़ु आयि सॉरुय सब बँरिथ।

लड़कु जोराह आयि ब्रॉठ ब्रॉठ अथु स्वरशावान तु पतु पतु ऑस्य थालु वॉल्य थाल त्रावान। युथुय रोगन जोश त्रावन वोल म्याँनिस थालस निश वोत, मे वोनुस, बु माहरा छुस वशनँव्य। तँम्य त्रोव रोगन जोशु फोल वापस थालस मंज़ु। मे कुन वॉरुन व्यखचुय नज़राह तु दोपुन, “वशनँव्य, यूत ल्वकुट! चु मा छुख इम्तिहान दिथ आमुत ?” मे दोपुस, “न माहरा, बु छुस ल्वकुचारु प्यठय वशनँव्य।” म्यान्यव सॉथियव कोरुहँस तॉयीद।

रोगन जोशु वॉल्य कोर दूरि अँकिस नफरस आलव, “हे गाशु लाल।” गाशु लालन दिच नज़र। रोगन जोशु वॉल्य वोनुस, “येति हसाँ छुय वशनँव्य अख।” गाशु लालन वॉर कस ताम बेयिस सुत्य कथ तु तमि पतु वोनुन रोगन जोशु वॉलिस, “बाल जी, तलु साँ बेयि वुछ, बेयि मा छुय कांह वशनँव्य।”

यीतिस कालस लँज बाल जियस पतु बाकुय सिन्य बॉगरावन वाल्यन हंज़ लॉन। मे खोवुर्य युस नफर बिहिथ ओस, तँम्य वोन मे, “चे कुस साँ तफरीक तुलुथ। येलि वशनँव्य ओसुख, तेलि कथ ओसुय सालस युन।” मे गव तसुंद यि वनुन सख बरतबाह। मे वोनुस, “बु क्या पानय

आसु ? मे माहरा छु सतीशन साल कोरमुत।” तँम्य ह्यचोव बेयि क्याहताम वनुन जि बाल जियन दिच क्रख, “हे बेयि छुवु साँ कांह वशनँव्य ?” चोरव नफरव तुल अथु थोद। बाल जियन गँजरॉव्य “अख, जु, त्रे, चोर।” तमि पतु वोन बाल जियन गाशु लालस, “यिम माहरा छिवु चोर।” गाशु लालन कोर बेयि कस ताम नफरस सुत्य मशवरु तु वोनून असि कुन, “वँलिव साँ वशनँव्य साँरी येमि तरफु।” तमि पतु वँर तँम्य हुमि अंदु बिहिथ नफरन गुजॉरिश जि तोह्य त्रॉव्यतव येत्यथ वशनव्यन जाय तु तोह्य बिहतव यिहँजि जायि।

सबि गँयि अफरातफरी। कँह छि होर गछान तु कँह छि योर यिवान। मिनट पांचु मरु गँयि अथ कारवायी मंजु ज़ायि। तमि पतु गँयि स्युन बाँगरावनुच कारवायी बेयि शुरू।

नवि जायि ब्यहान ब्यहान आयि असि सुत्य बेयि जु नफर। व्वन्य गँयि अँस्य शे। पोन्त्य दिनु वोल येलि बजि सबि अथु खरशाँविथ म्वकल्यव, अदु आव सु सानि सबि। कँह काल गँछिथ त्रॉविख असि थाल। सानि सबि आव नु कांह थालन दजि सुत्य फश दिनि। असि मंजु अँक्य नफरन, युस वाँसि जान ओस, वँड चंदु मंजु रुमाल तु व्वथुरोवुन थाल। बाक्यव ति कोर ती। मे त्रोव चंदस अथु मगर मे आँस रुमाल गरी मँशिथ गॉमुच। मे सुत्य युस नफर ओस, सु द्राव बडु दिलदार। तँम्य कोर पनुनि रुमालि सुत्य म्योन थाल ति साफ। मे वुछ तस कुन असवुनि बुधि, मतलब शुक्रियाह।

अँस्य आँस्य व्वन्य प्रारान स्युन त्रावनस। मगर साँनिस कूसस ओर रछाह चेरुय। मे त्रॉव निकुनि सबि कुन नज़र। तति आँस बाँगरन वाल्यन हुंज लॉन लँजमुच। रोगन जोश, मछ, चोक चरवन, हाख, मुजि चेटिन्य, नदुर्य चुरमु बेत्री।

मामस ख्यनु वाल्यन हुंजि सबि मंजु गव बतु बाँगरुन ति शुरू। पतु पतु ओस वँलियि वोल पकान। मे बासेयि पनुन्य ब्वछि तेज़ान, मगर करुहाँ क्या ? म्योन थाल ओस वुनि ति कोरु होखुय तु बाँगरन वाल्यन हुंद ओस नु पय पतहुय कँह।

इन्तिज़ॉमी कारकुन आँस्य ओरु योर तु योरु ओर करान, मगर असि कुन ज़न आँस नु काँसि नज़रुय प्यवान। मे ह्योत तथ दूहस बद रद वनुन येमि दूह बु वशनँव्य बन्योस। दर-अस्तल ओस नु मे वशनँव्य बननुक शोख कँह, मगर म्योन ज़ातुक वुछिथ ओस काकु महाराजन मे स्युन ख्योन मनाह कोरमुत। मे आँस्य तसुंघ लफ़्ज अज़ ति ज़बॉनी याद। येलि म्यानि माजि तस म्योन ज़ातुक ब्रॉटु कनि थोव, काकु महाराजन वँर तथ अकाँय नज़र तु वोनून तस, “बचस छु हना ग्वब्यर। जु चीज़ थव याद। अख छु यि ब्रसवारि ब्रसवारि दूद ज़ालुनावुन तु बेयि छु यि मामस ख्योन त्रावनावुनु। पतु वुछख चु यि मा यियि अथि कुनि। फर्शु प्यठु खारिय अर्शस।” मे दोद अँदरी माज़। आँठि दहि दोह्य ओस वँह्यताम वँह्यताम नेनि फोल अख मेलान बतस सुत्य, तमि निशि ति छोल अथु। म्यानि माजि ओस काकु महाराजुन स्यठाह रोब। सु ओस तस बोड ह्यु प्यँत्रु ह्युहर। नँतीजु द्राव जि बु बन्योस वशनँव्य, ज़बरदस्ती!

काकु महाराजुनि अथ कथि ओस कमुय काल गोमुत जि गाडु बतुक वख वोत। म्यॉन्य मातामाल आँस्य गाडु बतु दिवान तयस प्यठ। म्यॉन्य नान्य आँस अमि दूह सारिनुय नँजदीखुक्यन अंगन आँशुनावन साल करान। अमि दूह ओस पँज्य पॉठ्य म्यानि मातामालु मॉलु लगान। बँड्य यक तरफ, अँस्य शुरी आँस्य शुराह सदाह आसान। म्यॉन्य नान्य आँस पनुन्यव अथव गाड रनान, मुजि आँसुस त्रावान सुत्य। इनसान ओस गाड म्वकलॉविथ अँडिस गंटस अथस तु थालस ल्यवान। बु ओसुस नानि स्वठाह टोठ। बु ओसुस ग्वडय थवान सरु वँरिथ जि म्यानि

खॉतरु रोज़ि अख गाडु गॅन्य पगाह सुबुहस किच़ ति। येलि बु अथ मुतलिक नानि ओसुस वनान, स्व ऑस मे हति हति लटि बलायि लगान।

मगर येमि वॅरियुक गाडु बतु रूद मे वुमरि प्यठ याद। मे द्यतुख बतु हाकस तु स्वचलि सुत्य। सॉरी ऑस्य टास कॅड्य कॅड्य गाडु ख्यवान। बु ओसुस सारिनय हंडिस चाँटिस कुन वुछान तु व्वश त्रावान। मे ह्यमथ दिनु खॉतरु खेयि नु अमि दूह म्यानि माजि ति गाडु। येलि राथ गॅयि, सॉरी शॉग्य। मे ऑस नॅदुर गॉब। मे आसु प्रथ तरफु गाडु यिवान बोज़नु। येलि जॉरिस प्यठ वोतुम, बु वोथुस याशाह वॅरिथ तु चास ल्वति ल्वति चोकस मंज़। सारिनय ऑस मस नॅदुर। मे तुज अख गाडु लॅट काकदस वॅलिथ तु ब्यूतुस चूरि चूरि लेफि तल खेनि। मगर च़कि मे कुस्मथ खराब, मे गव गाडि कौड हॅटिस मंज़ बंद। ग्वडुन्यथ कोर मे दमुय तु रूदुस ल्वति ल्वति चास करान। येलि नु तमि सुत्य कांह फर्क पेयि, मे चॅज बडि क्रख नीरिथ। म्यॉन्य क्रख बूज़िथ गॅयि सॉरी हुशार। पतु मतु पृछ्यतव कुस तुफान वोथ। होछी बतु टीर आपुरिथ गव कौड यलु, मगर मे थॅविख मार दी दी डॅकरु वॅरिथ। म्यानि नानि न गव म्योन गाडु ख्योन बरदाश तु न म्योन मार ख्योन। यिथु तिथु बचोवुस तमी बु। मगर काकु महाराजुनिस वनुनस च्वचि करनुक द्राव बुरु नॅतीजु। बु गोस अमि वॅरियि फेल। तमि पतु रूदुस बु ज़बरदस्त पॉठ्य वशनॅव्य।

म्यॉनिस सौंचस लॅज ज़ीर। गाशु लाल आव ब्याख नफर ह्यथ असि निश तु वोनुन तस, “शिबन जी, तुल साँ थाल।” शिबन जियन हेत्य सॉन्य थाल वापस वटुन्य। मे त्राँव पानस सुत्य वॉलिस कुन नज़र। तस तोर फिकरी ज़ि थाल थोद तुलनु सुत्य गोस बु परेशान। तॅम्य वोन मे कनल तल, “अॅस्य छि ना कमुय। यिम अनन ओरय थाल बॅरिथ।” मे खॅच वॉलिंज बोठ। शायद आसिहे गाशु लालन यि कथ ब्रॉठुय वॅन्यमुच़ तु मे आसिहे नु बूज़मुच़। बोज़ु हॉ ति किथु पॉठ्य ? बु ओसुस ना गाडु बतस सन्योमुत!

दहि पंदाहि मिनटु पतु आयि त्रे नफर सॉन्य थाल ह्यथ तु थॅविख असि ब्रॉठु कनि। दमु ओलव, व्वज़ुज च़ामन, लेदुर च़ामन, च़ोक्य वांगन, नदुर्य, बेत्री अलावु ऑस्य नदुर्य चुरमु तु म्वंजि आंचार ति। थाल ओस मे कुन वुछान तु बु थालस कुन। मे वुछ नु पथ ब्रॉठु कॅह तु ह्योतुम बतु ख्योन। अॅथ्य मंज़ पेयि मे निकस कुन नज़र। सु ओस दोयुम बोड रोगन जोशु फोल रॅटिथ विजस माज़रथ करान तु बॉगुरन वॉलिस इसरार करान ज़ि तस ति त्राव। विजु गव मजबूर ब्याख फोल रटनु बापथ।

थाल असि ब्रॉठु कनि थॅविथ आव नु असि निश कांह यि पृछनि ज़ि तोह्य मा हेयिव कॅह। सॉरी ऑस्य स्युन ख्यनु वालिनय ल्वलुमतु लाय करान। मे प्यव ह्यस, दूदु प्यालु नय द्युतुखुय नु असि। मे कोर अॅकिस इन्तिज़ॉमियस आलव तु वोनुमस, “माहरा दूदु प्यालु गोवु मॅशिथुय।” तॅम्य वॅरु बेयिस अॅकिस शेछ तु तॅम्य त्रेयिमिस अॅकिस। मगर दूदु प्यालु ह्यथ आव नु कांह। अचानक पेयि मे गाशु लालस प्यठ नज़र। बु गोस तस निशि तु वोनुमस, “माहरा, असि म्यूल नु दूदु प्यालय।”

गाशु लालन त्राँव मे दोलु नज़र। दोपुन, “दूदु प्यालु कति छि ?” मे वोनुस, “माहरा, अॅदी हय असि वुरुबलु प्यठु पताह कोर ज़ि दूदु प्यालु ति छि।” गाशु लालस व्वज़ल्यव बुथ। मे थोवुन फेकिस प्यठ अथु तु दोपुन, “गोबराह! दॅलील छि यिथु पॉठ्य ज़ि ज़ुय हथ दूदु प्यालु ऑस्य बनॉव्यमुत्य, मगर ग्वडनिची सब छि डायन हतन हुंज। अड्यन दिमव तु अड्यन दिमव नु कॅह, ति मा बनि। अमि म्वखु कोर फॉसलु ज़ि दूदु प्यालु दिमवुय नु। अज़ छना त्रठ। असल सालर छि

पतु यिवान, डुडु छि आसान ग्वडय बिहिथ। व्वन्य ह्य रँन्यमुतिस पाकुवमुतिस बराबँदी यियि तु किथु पॉठ्य।” म्यॉन्य हालत ऑस वुछिन्य लायक। म्योन बिचॉर्य बुथ वुछिथ वोन गाशु लालन मे कनस तल, “मे तोर फिकरी जि म्यॉनिस रँवी जियिन्य पॉठ्य छुय च़े ति ज़ामुत दूद स्यठाह टोट। म्वकल बतु ख्यथ, बु दिमय च़े अख प्यालु लोत पॉठ्य। मगर खबरदार छुय, यिनु येति सु कुनि जायि नोन कडख। गरु गँछिथ खेज़ि।” मे कोर ज़्यूठ आंकार।

बु वोतुस वापस पनुनिस थालस प्यठ। मन ओसुम परेशान। यिनु गाशु लाल मे दूद प्यालु दिनु वरॉयी नेरि ? सुती सूंचुम, न न, ति बनि नु। गाशु लाल छु रुत इनसान।

मे ऑस गाशु लालुन्य कथ फीर्य फीर्य यिवान च़्यतस। येलि नु इनसानस सालस पृछनुय, डुडु लॉगिथ क्या मतलब गव युन ? यि गँयि ना पनुनिस पानस बेज़ुती करुन्य।

बतु ख्यथ द्रास बु न्यबर कुन। म्यॉन्य यार ति द्रायि। मे ह्योत गाशु लाल छांडुन। मगर गाशु लाल आव नु मे अथी। मे प्रुछ अँकिस नफरस, माहरा गाशु लाल कति छु ? तँम्य द्युत नु म्यानि कथि जवाबाह कँह, मगर म्यॉनिस कलस प्यठ थोवुन अथु तु वोनुन, “च़ु मा छुख जिगरि हुंद नेचुव ?” म्यानि बदलु द्युतुस निकन जवाब, “अहन माहरा, आ।” अमि ब्रॉठ जि सु नफर वनि हे बेयि कँह, निकन वँर मे नरि थफ तु कोडुनस अँकिथ कुन। दोपुन, “दलवांजुव कथ लोगुथ ? पख नेरव।” मे वोनुस, “गाशु लाल गछि ना बिचारु पतु दरबुदर मे छांडान! बेयि सतीशस समखव ना!” निकन हेच़ोव क्याहताम वनुन जि मे वुछ सु नफर बेयि असि निश यिवान येम्य मे जिगरि हुंद नेचुव वोन। अमि ब्रॉठ जि सु पृछिहे बेयि कँह, मे पृछुस, “माहरा सतीश कति छु ?” “कुस सतीशु ?” तँम्य वोन वापस। निकु आव बेयि मँज्य तु दोपुनस, “सु माहरा छु असि यार अख। वुन्य ओस येती।” यी वनान वनान वँर निकन मे बेयि नरि थफ त कोडुनस गरु कुन। म्योन दूद प्यालु रुद अँती।

वति पकान प्रुछ विजन निकस, “असि क्याजि समखोवुथन नु सतीशु। अँस्य ति करुहोस मुबारख।” निकन चॉर्य दंद। दोपुनस, “च़ु मा छुख बावरु गोमुत! कुस सतीशु तु कुस यार ?” असि व्वशल्यव बुथ। मे वोनुस, “च़ु क्या छुख यि वनान ? च़े छुय ना सतीशु यार ?” “हा कुस साँ यार! दपू यारु त्वहि ओसवु साल ख्यनुक शोख गोमुत तु मे कोरुमवु सु शोख पूर। यि वँरमु च़ूर ?”

मे फ्यूर बुथिस व्वशलुन। “मगर च़े क्याजि वोनुथ नु असि पज़र ? अँस्य ऑस्या तेलि डुडु सालस ऑमुत्य ?” निकन वोन, “हरगाह बु त्वहि ग्वडय असलियथ वनुहोवु, तोह्य मा यीहिव ? मे ति ओस स्यठाह काल गोमुत खांदर साल ख्यनुसुय। येलि त्वहि सायेबानुच शोछ वँनिवु, मे ज़ोन गँनीमथ।”

डुडु साल ख्यथ ओसुस बु दिल मलूल ह्यु। मे तोर फिकरी जि दूद प्यालु क्याजि गँयि कम। तिम कम गछुनुक वजह ऑस्य अँसी। निकन द्युत मे कलस फश तु वोनुन, “त्राव परेशॉनी। यिमन चीज़न लगी नु पतु सनुन।” मे वोनुस, “मे छनु स्व परेशॉनी। बु छुस सॉचान यिनु गाशु लाल दूद प्यालु ह्यथ मे छांडान छांडान यूर्य वाति।”



सुह शिकार

कथ ऑस स्यठाह सँगीनु। पज़र हय बूज़िव, मे ओस बुथ्युक रंग कर ताम ज़र्द गोमुत, मगर 'सिको दिल कर' याद कॅरिथ ओसुस बु बोहोदुर आसनुक बास दिवान। सानि जमॉच मंज़ु सेहतु हिसाबु सारिवुय खोतु सरस ग्वलाम रसूल ओस अँदुरी क्याहताम परान। मे युथुय तस ज़ीर दिच, सु आव हलकॉर्य हून्य सुंघ पॉठ्य मे चॅपिस। मगर ज़ेवि ह्योकुन नु कैह वॅनिथ। जलाल दीन तु राज नाथ ऑस्य अख अँकिस तिथु पॉठ्य थफ वॅरिथ, ज़न तु अलग न गछुनुक कसम ओसुख ख्योमुत। जय कौल ओस ह्यमथ सौबरावनु बापथ सिग्रेटस दामाह दामाह दिवान, मगर यि नु खयालय जि सिग्रेट मा ओस ज़ालुनय। मुनीर अहमद ओस क्याहताम सौंचान, शायद हालातन साम ह्यवान। सु ओस टीम लीडर, अमि किन्य ऑस सौर्य ज़िमुवॉरी तँस्य। हनीफ खानस ओस बुथ व्वज़ल्योमुत मगर ज़्यव नदारद। यि ओस नु समजुय यिवान जि सु छा फ़ट सुत्य व्वज़ल्योमुत किनु जोश छुस आमुत।

खुम लूठ अकि अंद तुलिथ दिच मुनीर अहमुदन बेयि नज़र। अजि बरि मंज़ु लोगुस बु ति न्यबर कुन वुछनि, मगर वॉलिंजि थँवम चीरु थफ वॅरिथ। सुह ओस ज़ोतवुनि अँछ वॅरिथ असी कुन वुछान। फ़ट सुत्य ऑस मे सुह सुंज़ अकॉय अँछ यिवान बोज़नु मगर मुनीर अहमुदन वोन द्वशुवय अँछ छस ज़ोतान। कथ करुनस ओस नु इजाज़थ काँसि, यि सोरुय ओस इशारव सुत्य यिवान वननु। मुनीर अहमुदनि वननु पतु वुछ मे बेयि अकि लटि वारु पॉठ्य। व्वन्य आयि मे ति सुह सुंज़ द्वशुवय अँछ ठीख पॉठ्य बोज़नु। राज नाथन ति कोर अथ कथि तॉयीद। जलाल दीनस आसु नु अँछ यिवान अथी कैह, मगर तस ऑस सुह सुंदि त्रेश च्यनुच आवाज़ साफ कनन गछान। तँम्य वोन असि कनस तल, “बा ख्वदा छुवु सुह आबस ख्वलुव वॅरिथ त्रेश चवान। बु छुसवु येत्यथ बिहिथ ति तसुंज़ु आवाज़ बराबर बोज़ान।” जय कौलस आयि नु तसुंज़ि कथि सुत्य बराबँदी कैह। दोपुनस मे छु फिलुमन मंज़ वारु वुछमुत, सुह छुनु ज़हुन्य ख्वलुव वॅरिथ त्रेश चवान। जलाल दीनन हेचोव तस सुत्य तक़रार करुन मगर मुनीर अहमुदस कुन नज़र प्यथ वॅरुन छवपु। अकि लटि त्रॉव असि बेयि बरि मँज़्य नज़र। अनि गटु ऑस ज़बरदस्त। अँछन मूरन मूरन दिथ ऑस्य अँस्य यि वुछनुच कूशिश करान जि अमि पतु क्याह सपदि।

राज नाथस पथ कुन दकु दिथ आस बु ब्रॉह कुन। मे वुछ सुह वारु कारु त्रेश चवान। अमि पतु वोथ सु थोद तु कोडुन काड। तसुंद बाडव वुछिथ गव मे हॉबथ। हालांकि अनि गटि मँज़्य ओस नु तसुंद पान यिवान बराबर बोज़नु कैह मगर तसुंज़ छाय ऑस साफ बोज़नु यिवान। छायि हिसाबु आसिहे सु शे फ़टु ज़्यूठ। मे युथुय तसुंदि काड कडनुच शेछ मुनीर अहमुदस वँन्य, तँम्य ति दिच खोचान खोचान बेयि नज़र। ग्वडु ग्वडु आव नु तस कैह अथि। सु ओस वुनि ति वनान जि सुह छु त्रेशुय चवान। मगर येलि तँम्य वारु साम हेच, तँम्य वुछ वारु कारु सुह खडा गोमुत। तसुंदि हिसाबु ओस सुह चोरय फ़टु ज़्यूठ।

अचानक दिच ग्वलाम रसूलन क्रख 'हयो मूद्य हा!' अँस्य आयि अख अँकिस प्यठ लायिनु। काँसि आव नु समुज जि ग्वलाम रसूलस कथ प्यठ चँज क्रख नीरिथ। येलि मुनीर अहमुदन पृछुस, तँम्य वोन हॉरान गँछिथ, “त्वहि बूज़वु ना सुह सुंज़ ग्रज़ ?” मे तु मुनीर अहमुदन हिलोव

नकारस मंज कल, मगर जलाल दीनन कोर तस तौयीद। दोपुन, “बा खदा बूज मे पानु सुह सुंज खतरनाख ग्रज। मगर मे वॅर अवु म्वखु छ्वपु जि त्वहि मा गछिवु फ्रठ।” जलाल दीनुन्य यि कथ बूजिथ द्राव असि न्यसुब जुव। अम्युक मतलब गव जि सुह ओस वारु कारु व्वन्य असि ख्यनस जागान। जय कौलन ओस व्वन्य सिग्रेट पथर थोवमुत। शायद ओस तस एहसास गोमुत जि सिग्रेट छु जालनय।

मे ह्योत तथ गरि डाख करुन यथ गरि बु मुनीर अहमुदुन्यन कथन मंज यिथ तस सुत्य ऐडवेंचर करनि द्रास। मे हेच अँदरी पनुनिस मॉलिस माजि मॉफी जि मे ह्योक नु तुहँदि खॉतरु किहिन्य वॅरिथ तु पुंचुह वुहरि पानय लोगुस सुहस छेपि। मे ह्योतुन अँछव मंजु ओश वसुन। अकि अकि पेयम पनुन्य सॉरी अंग ऑशुनाव तु यार दोस याद। वुछान वुछान ह्योत मे टुंगि वदुन, तु मे वुछिथ ह्योत सारिवुय मे सुत्य सुत्य वदुन। व्वन्य ओस यि ऑखुरी वख तु असि थॅव सारिवुय अख अँकिस चिरु थफ वॅरिथ। मे ह्योत मनु मँजी यँद्रॉखी पाठ परुन।

अँस्य अँस्य कुल ऑठ नफर टीमस मंज। शे ऐडवेंचर करन वॉल्य याने मुनीर अहमद, ग्वलाम रसूल, जय कौल, राज नाथ, जलाल दीन तु बु, बेयि जु कुली हनीफ खान तु कसाना। दरअस्ल गॅछ्य अँस्य कुल काह नफर आसुन्य, मगर म्यॉन्य बेयि त्रे यार, यिम हर हमेशु मे सुती अँस्य आसान, आयि नु येमि लटि असि सुत्य कैह। वननु पॉठ्य वोन तिमव जि अँस्य छि आवुय मगर मे ओस पूर येकीन जि तिम खूच्य जंगुलस कुन नेरुनस। म्यॉनिस मिनतु करुनस ति आव नु हॉसिल कैह। तिमव कोर असि सुत्य यिनस साफ इनकार।

वति पकान पकान तु बालु डकरि खसान खसान आव असि पोग। अँकिस दु-वँतिस प्यठ वॉतिथ गँयि कसाना तु हनीफ खान असि निशि छ्यनु। अँस्य द्रायि अकि वति तु तिम द्रायि रछाह चौर्य वॉतिथ बेयि वति। यि कथ लॅज नु असि जलदुय पताह कैह। अँस्य येलि दुपहरस बॉग्य अँकिस ल्वकुटिस मरगस प्यठ वॉत्य, त्रेश च्यनु बापथ दिच असि सामानस छाँड। मगर अफसूस! त्रेश तु दूद ओस तथ सामानस सुत्य रूदमुत युस कसानाहस तु हनीफ खानस अथि ओस। अँस्य रूद्य प्रारान, मगर तिम आयि नु कैह। गंटु जोराह प्रॉरिथ द्युत मुनीर अहमुदन होकुम ब्रॉठ पकनुक। असि ओस नु नर्यन जंगन जुवाह ज्यताह कैह, मगर टीम लीडर सुंद होकुम मा बनिहे टालुन? यिथु तिथु वॉत्य अँस्य पांछ बजे बॉग्य बजि मरगि प्यठ तु द्युत अति डेर। अति ओस नागाह अख तु असि सारिवुय लॉज नागस प्यठ तिथु पॉठ्य त्रेश चैन्य ज़न नु बेयि अँकिस वॅरियस अँस्य पोन्ड वुछुहॉव। रछाह गॅछिथ पेयि कसाना तु हनीफ खान ति वॉतिथ। तिहुंज हालत ऑस सानि खोतु ति खराब। तिमव बिचार्यव ऑस नु त्रेश सुत्य अँसिथ ति वति त्रेश चेमुच। हनीफ खानन वोन जि तिम अँस्य वथ रॉविथ परेशान हाल तु सिरिफ असि छांडनुच कूशिश करान।

गवडु लॅग्य अँस्य सॉरी खुमु गंडुनस। खुमु गँडिथुय बॉगरॉव मुनीर अहमुदन बाकुय कॉम। जलाल दीनस तु राज नाथस आव बतु स्युन रनुनुक चार्ज दिनु। ग्वलाम रसूलन तु जय कौलन हेच खुमन अँद्य अँद्य नॉल्य बनावनुच मटिदॉरी। हनीफ खानन तु कसानाहन ह्योत नागु प्यठु पोन्ड सारुन तु मुनीर अहमुदन तु मे ह्योत कैप फायर लागनु खॉतरु होख होख ज्युन छांडुन। राज नाथ

द्राव अँद्य पँख्य अलाकृच साम हेनि। गरज़ प्रथ कांह नफर गव पनुनिस पनुनिस कारस सुत्य आवुर।

जंगलस मंज छे सुली राथ प्यवान। बतु ख्यनु ब्रोंठ लँग्य अँस्य पानुवँन्य कथाह बाथाह करनि। हनीफ खान ओस पनुनि बहोदरी हुंजु देंलीलु बोज़ुनावान। बंदूक तु बंदूकच लासन आसन म्वखु ओस सु विज़ि विज़ि हाइकिंग पारटियन सुत्य गछान, युथ ज़न तिमन वख्ते ज़रूरथ जंगली जानवरव निशि बचोंविथ हेकि। अमि सुत्य ऑस तस जान कमाँय सपदान, हालांकि तसुंदि वननु मुताँबिक ओस नु तस वुनिस ताम काँसि जंगली जानवरस सुत्य रू-बरू मुकाबलु सपुदमुत। हनीफ खान ओस सेहतु जान मगर शक्लि बढ। बासान ओस जि तसुंज शक्ल वुछिथुय हेयिहे सुह तु हापुत पथ।

तकरीबन नव बजे राथ ह्योत असि कैप फायर करनु बापथ ज़्युन आयि आयि लागुन। फॉसलु गव जि कैम्प फायरस ब्रोंठ कनि ख्यमव बतु। वुनि ओस असि अथ च़ुख दिनय जि ग्वलाम रसूलस गँयि कनन क्याहताम आवाज़। दोपुन कुस ताम छु बासान दूरि पकान। असि दिच़ प्रथ तरफ़ नज़र। अनि गटु आसन म्वखु आव नु कैह लबनु। पतु द्युत कन। मे बास्यव नु कैह मगर जलाल दीनस बास्यव साफ। दोपुन हँकीकतन छे क्वसु ताम बलायि नागस कुन यिवान। यि बूज़िथ कोर मुनीर अहमुदन असि बँडिस खुमस अंदर अचनुक इशारु। अँस्य च़ायि खुमस अंदर तु बीठ्य सॉरी अख ऑकिस सुत्य, यीतिस कालस मुनीर अहमुदन वारु पॉठ्य हालातन साम हेच़। तसुंदि यि वननु पतु जि पँज्य पॉठ्य छे कमि ताम बलायि हुंदि पकनुच आवाज़ गछान, फँट असि तुर। यि कथ गँयि पतु सरु जि बुधि यिनु वाजेन्य बलाय ओस सुह।

यँद्रोंखी परान परानुय बूज मे मुनीर अहमुदन्य कथ। सु ओस ल्वति ल्वती हनीफ खानस बंदूक कडनु खॉतरु वनान। हनीफ खानस प्यव व्वन्य याद जि तस ओस बंदूक ति सुत्य। तँम्य वँड पनुनि जोलनु मंजु दु-नँल्य। मुनीर अहमुदन त्राँव तस जाय तु सु आव ब्रोंह कुन। जाय संबॉलिथ लोग हनीफ खानन दु-नलि सुत्य निशानु गंडुन। हनीफ खान ओस तयार गूल्य चलावनस जि जलाल दीनन दिच़ क्रख। दोपुनस, खबरदार छुय, युथ नु गूल्य चलावख। असि दोप यि गव सुह वुछिथुय पागल। मे ह्योत तस ड्यकस अथु लॉगिथ तफ वुछुन। तँम्य द्युत मे दकु तु वोननु, “म्याँन्य मॉल्य छु वोनमुत जि हरगाह सुह गूल्य लॉगिथ ज़ख्मी गछि तु मरि नु कैह, तेलि छु सु ज़बरदस्त खतरनाक सपदान तु युस बुधि पेयस तस छु ख्यवान।” असि सूंच यि आसि पोज़ुय वनान। मगर हनीफ खान ओस नु यि बोज़नु खॉतरु तयार कैह। तँम्य दोप मे छि सॉरुय खबर तु अथ मामुलस मंज छे नु मे काँसि निशि ति कैह हेछिनुच ज़रूरथ।

अँदरु ऑस हमलु दमल चलान जि सुहस छा गूल्य लायिन्य किनु नु, नेबरुय ओस सुह बे-वायि असि कुन वुछान। जलाल दीनन वँर बंदूकस थफ युथ नु हनीफ खान गूल्य चलावि। मुनीर अहमद च़ाव मंजु। तँम्य ह्योत जलाल दीन समजावुन मगर सु ओस नु बोज़नुस तयारुय। यीतिस कालस पेयि जय कौलस न्यबर कुन नज़र। दोपुन सुह छु वारु वारु असि कुन पकान। कसानाहन दिच़ वॉलिंज अथस मंजु रँटिथ अख च़ूर नज़र। तस च़ँज वदन बाख नीरिथ। दोपुन सुह छु बिलकुल खुमस नेबरु कनि बिहिथ। सारिनुय च़ँज खवरव तलु मेच़ नीरिथ। हनीफ खान व्वशल्यव ज़्यादय पहान। दोपुन व्वन्य छु नु गूल्य चलावनुक मोकय। गूल्य चलावन्य गव साफ सुहस हमलु

करनुक दावथ द्युन। मे गव व्वन्य यँद्रॉखी परुन ति मँशिथुय। अचानक गव जय कौल थोद वँथिथ। दोपुन, “हयो, मे छुमवु अँकिस फिल्मि मंज़ युथुय सीन वुछमुत। सुह ओस ब्रॉटु कनि ऑस वाहरॉविथ। हीरोयिन ऑस फ्रटु सुत्य मूमच। स्व ऑस सुहस निशि मसाह शे फुटु दूर। हीरो ओस दूरि वुछान मगर सुहस ब्रॉटु कुन यिनस बँहयव नु कैह। सुह ओस अख नज़र हीरोहस कुन दिवान तु ब्याख नज़र हीरोयिनि कुन। तमि पतु पोक सु ज़ु कदम बेयि हीरोयिनि कुन। व्वन्य ओस सु तयार तस प्यठ जेफ्य मारुनस ज़ि हीरोहस प्यव ज़्वन। तँम्य वुछ ब्रॉटु कनि अख गासु लोव। वुछान वुछान तुल तँम्य सु गासु लोव तु द्युतुन लाइटु सुत्य तथ च़ुख। गासु लॉविस लोग नार। हीरोहन तुज कुनी दव तु आव दज़वुन गासु लोव ह्यथ सुहस कुन। युथुय सुहस तस प्यठ नज़र पेयि, तँम्य त्रॉव हीरोयिन अँती तु च़ोल कुनी दव तुलिथ।” जलाल दीनन वोनस, “चोन मतलब छा अँस्य ति ज़ालव गासु लोव। गासु कति छु?” जय कौलन वोनस, “हता पागुलाह! लँश छना?” यि वँनिथ तुज जय कौलन अख लशि हँट अथस मंज़ तु न्यून तथ च़ुख दिथ। पतु ज़ॉजिन ब्याख हँट तु रचन द्वशय लशि अथन मंज़। अमि पतु तुजि बाक़ुयव ति लशि तु द्युतुख तिमन च़ुख। मुनीर अहमुदन तुल ख़ुमस पर्दु थोद तु सॉरी द्रायि दज़वुनि लशि नच़ुनावान नच़ुनावान न्यबर। खोच़ु बुड आसनु किन्य रूद्य बु तु कसाना पथुय। मगर मे आव यकदम खयाल ज़ि यिम सॉरी द्रायि लशि ह्यथ न्यबर तु सुह यीतन यपॉर्य तु नीतन असि ख्यथ। अँस्य दवेयि तिमन पतु पतु। तमि पतु यि सपद्यव, ति मतु पृछ्यतव।

अँस्य फीर्य लशि ह्यथ सारिनय ख़ुमन अँद्य अँद्य। तमि पतु गँयि नागस ताम। न ओस कुनि सुह तु न तसुंद कांह निशानु। असि दिच़ अनि गटि मंज़ुय सॉरिसुय अलाकस छँड। कुनि गव नु कांह नज़रि। ग्वलाम रसूलन त्रोव असुन। अमि पतु आव नु समुज कैह, वँम्य त्रोव कस पतु असुन।

फ्रटुतमस मंज़ुय ओस असि अड्यन सुह बास्योमुत तु अड्यन तसुंज़ छाय, काँसि सु त्रेश चवान बास्योमुत तु काँसि असि कुन पकान। च़कि नु किहिन्य। वापस यिथ द्युत असि ज़िनिस नार।

कैप फायर ओस तयस प्यठ दज़ान। ट्राईपाडस प्यठ अँस्य सोबूथ क्वकर बुज़नु बापथ अलूंद। जलाल दीन तु जय कौल अँस्य ख्यनु चनुक सामानु सजॉविथ लागान। मुनीर अहमुदस प्यव ह्यस। यिनु कांह हंगु मंगु बंदूकस थफ दियि तु गूल्य गछि नीरिथ! तँम्य कोर हनीफ खानस आलव तु दोपुनस बंदूक अन। हनीफ खानन ओन बंदूक तु द्युतुन मुनीर अहमुदस अथि। तँम्य मुच़ुरोव गोलि वापस कडनु खॉतरु बंदूकुक मैग़ज़ीन। मगर यि क्याह! दु-नँल्य अँस गोल्यव वरॉयी। मुनीर अहमुदस गव बुथ्युक रंग पँक्य। हनीफ खान ओस कटु चेश्मव सुत्य गरा खॉली बंदूकस कुन वुछान तु गरा मुनीर अहमुदनेस बुथिस कुन।

हनीफ खान ओस दु-नलि मंज़ गोलि त्रावनु वरॉयी सुह शिकार गिंदुनि ब्यूठमुत। अदु य्वसु रुसवॉयी अमि पतु तस गँयि, स्व मतु गँछ्यतन काँसि।



नबु लालु

मामलु ज़ेठ्यव हना ज़्यादय पहन। नबु लालन ओस नु सूचमुतुय ज़ि कथ वाति ओर प्यठ। यि ऑस अज़ ग्वडनिच विज़ येलि तस काँसि ठेकुदरस सुत्य तक़रार गव तु मामलु गव हदु न्यबर नीरिथ। ह्यड कलर्क सप्रू साँबन करेयि स्यठाह कूशिश ज़ि बाँय बँदी सूती गोछ मामलु अंदुन मगर नबु लालु आव वुठनु। दफ़तरुक दफ़तर ओस हाँरान। नबु लालुन यि रुफ ओस तिमव ग्वडनिचि लटि वुछमुत।

कथ ऑस नु च़कि किहिन्य। अकरम खानस ओस ड़ाईवुरन क्लीनरन हंदि खॉतर वरदीयि सपलाई करनुक ठेकु म्यूलमुत। तसुंद वनुन ओस ज़ि तसुंज सारिवुय खोतु कम रेट आसनु किन्य म्यूल तस यि ठेकु। डार साँब, युस बँडिस साहबस पी.ए. ओस, ओस अथ कथि ताँयीदस मगर नबु लालस ओस नु यि व्यचान केँह। नबु लालुसुय योत क्याह, ल्वकटिस काँसि ति मुलाँज़िमस ऑस नु यि कथ श्रपान। हालांकि यि कथ ऑस टाकारु ज़ि बोड साहब, येम्य सपलाई आर्डर कोडमुत ओस, ओस नु रशवु रटान। सु ओस पानु दूदु सुत्य छँलिथ। मगर बँनिम्यव ल्वकट्यव अफ़सरव ओस ब्वनय यि कार तँरीकु सान अंजाम द्युतमुत। अकरम खानन अँन्य पानय च़ोर टँडर तु वँगरिन डार साँबस हवालु। पतु कोर सारिवुय ल्वकट्यव बड्यव ह्यमतो समतो तु बनोवुख तसुंदि नावु आर्डर। बोड साहब ओस पूर मामलु निशि बे-खबर।

बोड साहाब ओस नु वैसे ति यिमन ल्वकट्यन ल्वकट्यन मामलन सनान। तस ऑस खबर ज़ि चपरॉस्य सुंदि प्यठु पी.ए. हस ताम छि साँरी मुलाँज़िम त्रेशाह तमोकाह रटान तु अमि वरॉय छुनु तिमन बतय श्रपान। मगर सु ओस नु यिमन कथन ज़्यादु सनान केँह। सु ओस तैलि मामलस सनान येलि लछु बद्यन हुंज काँम आसिहे। सासु वादन ओस नु सु पृछु गॉरुय करान। दपान तँम्य ओस अकि लटि डार साँबस ननि वानु वोनमुत ज़ि ल्वकटिस मुलाँज़िमस नय बिचारस यिम नाँयिद पाँसु ति बनन, गुज़ारु कति गछ्यस? डार साँबन ऑस यि कथ लुकन कम तु पानस ज़्यादु पहन वँन्यमुच़। मगर दफ़तरन मंजु छा कांह कथ च़ूरि रोज़ान? वारु वारु लँज यि कथ सारिनुय पताह।

अज़ सुबहस येलि अकरम खान आर्डर निनु खॉतर आव, सु वोत स्योदुय सप्रू साँबस निशि। ओरुच योरुच कथाह बाथाह वँरिथ कोर सप्रू साँबन डार साँबस आलव। पतु द्रायि त्रेश्वय दफ़तरु न्यबर, शायद चाय चेनि। केँह काल गँछिथ येलि तिम वापस आयि, अकरम खान वोत स्योदुय नबु लालस निश तु मोंगुनस आर्डर। नबु लालु ओस टाइपिस्ट-कम-डिसपैच कलर्क। तँम्य वँरुस बुथिस कुन वारु नज़राह। फाइलि मंजु कोडुन आर्डर तु रोडुन अथस क्यथ। पतु दोपुनस, “अन हज़ साँन्य चाय।” अकरम खान ओस प्रोन खिलॉड्य। तस ऑस वुम्बुर गॉमुच़ मुलाँज़िमन सुत्य लेन देन करान, अमि किन्य ओस नु कहुन्य मुलाँज़िम तस मंगु मंग करान। अदु सुलि या च़ीर्य, सु ओस सारिनुय हुंद माल तिमन बराबर वातुनावान। मगर नबु लालु ओस नोवुय नोवुय ओर आमुत, अमि किन्य ज़ानिहे नु सु अकरम खानस वारु पाँठ्य केँह। अकरम खानन कोड चंदु मंजु दँह वपुयुन अख तु थोवुन नबु लालस अथस क्यथ। नबु लालन त्रोवुस दँह वपुयुन वापस चंदस मंजु तु दोपुनस, “असि सुत्य नु हज़ मज़ाख केँह। शेठन सासन हज़ छुय आर्डर। बा ख्वदा रटय नु पुंचुहव कम डबल पाँसु।”

नबु लाल ओस वॉसि ल्वकटुय। योहय वुह अकवुह ह्यु आसिहे। ज़ु डाय वॅरी आसुहनस गॉमुत्य नोकरी करान मगर अथ दफ्तरस मंज़ आमृतिस ऑसिस त्रे र्यथ गॉमुत्य। गॅर्य किन्त्य ओस जान। मोल ओसुस नॉयिब तँहसीलदार तु पेठ्य वॉन्य ओस सु रूदुक्य पॉठ्य कमावान। अवु किन्त्य ऑस नबु लालस ति पनुन्य जान खर्चहन। पान सिग्रेट गॅयोव ऑसिथुय, ज़ु कदम ति हरगाह कडुन्य आसुहँनस, टांगु ओस छांडान। दफ्तर वॉल्य ऑसिस अवु किन्त्य लाल वनान, नबु लाल! यज़तु खॉतरु कम तु हज़ुलन ज़्यादु।

पुंचुहन र्वपुयन हुंद नाव बूज़िथुय खँच अकरम खानस ग्रख। दोपुनस, “हा यारु, चु मा छुख बावरु गोमुत। मे ना पुंचुह र्वपुयि ज़ांह पी.ए.सॉबस दिचुमचु, चु कमि वारि हुंद हाख छुख?” नबु लालस खोत वारि हुंद हाख बूज़िथु खश्मु। दोपुनस, “गछ हज़ पगाह यिज़ि, पगाह दिमय आर्डर। मे छुय वुनि यि डिस्पैच करुनय।” यि वॅनिथ थोव नबु लालन आर्डर बेयि मेज़ुकिस दराज़स अंदर।

कथ वॉच सप्रू सॉबस ताम। तँम्य न्युव नबु लाल बुलॉविथ तु वोनुनस, “गोबुराह! वुनि छुख चु ल्वकुट। यि लगी नु करुन। खान सॉबस छुय ह्योर ताम रसूख। अँमिस सुत्य लगी नु रावुरावुन।” यि वॅनिथ कोड सप्रू सॉबन अकरम खानस आलव, “व्वलु हज़ खान सॉब यूर्य। दिस हज़ पंदाह र्वपयि। बचु हय छु, मारोन मा!”

अकरम खान द्राव बुर्दबार। दोपुनस, “सप्रू सॉब! बु माहरा दिमुहँस नु दहि अलावु कैह। व्वन्य छुख चु वनान तु ठीख छु। बु मा छुस ज़ांह चॉन्य कथ टालान।” यि वॅनिथ कजि अकरम खानन चंदु मंज़ु पंदाह र्वपयि तु दिचन नबु लालस।

नबु लालस आव गुर ज़्यादय पहन। तँम्य सूंच ज़ि डार सॉबन तु सप्रू सॉबन आसि जान माल रोटमुत, मे छि टुरकावान पंदुहन प्यठ। दोपुनस, “पुंचुह माहरा छस नु ज़्यादु कैह। अँमिस क्या, कमावुन छुस ना?” अकरम खानस गव यि वनुन सख बरतबाह। दोपुनस, “चे मा छी मगुज़ खराब गॉमुत्य। बु हा करय यारु अकी टासु सुत्य कुलचु।” नबु लालस चायि मॉल्य सुंज नॉयिब तँहसीलदॉरी मगुज़न। दोपुनस, “गछ हज़ कर क्याह छुय करुन। गछ साहबस निश कर रपोर्ट।” नबु लालस ऑस पताह ज़ि यिथिस मामुलस मंज़ गछि नु कांह बॅडिस साहबस निश। तस हरगाह रछाह ति शख गछ्यख ज़ि यि ओस चूरु टेंडर, सु कर्यख आर्डरुय कैन्सल।

अकरम खानस बास्यव ज़ि नबु लालु छु ज़्यादय पहन नचान। शायद अमी किन्त्य ज़ि मोल छुस नायिब तँहसीलदार। मगर बु ति गोस नु ल्वकचि माजि हुंद कैह। दोपुनस, “बा ख्वदा दिमय नु व्वन्य डबल पाँसु। वन आर्डर म्योन छुयि ह्युन किनु नु?” नबु लालन कोरुस साफ इनकार।

वुछान वुछान गव मामलु सँगीन। अमि ब्रॉठ ज़ि सप्रू सॉबस तरिहे कैह फिकरी, अकरम खान गव याशाह वॅरिथ थोद वॅथिथ तु चाव बॅडिस साहबस निश। तति क्या सपद्यव, ति लॅज नु काँसि पताह। बॅड्य साहबन करुनोव चपरॉसिस अथि दरवाज़ु बंद।

रछाह गॅछिथ द्राव अकरम खान कमरु मंज़ु न्यबर। काँसि सुत्य वॅरुन नु कांह कथ तु द्राव गरु कुन।

यीतिस कालस वॉच डार सॉबस ति शेछ। सु आव दवान दावन सप्रू सॉबस निश। सप्रू सॉबन वॅन्य तस पूरु दॅलील तफसीलु सान। डार सॉबन वोनुस, “मामलु छा यूत बिगर्योमुत? मे गॅछ ना शेछ करुन्य, बु समजावुहन नबु लालु पानय।” सप्रू सॉबन ह्युतुस जवाब, “मे हज़ करेयि

पानु स्यठाह कूशिश जि कथ गॅछ नु ज़ेठुन्य, मगर नबु लालु आव वुठनु। किहिन्य बूजुन नु योरुक। ”

डार साँब तु सप्रू साँब गॅयि स्यठाह दिल मलूल। युथ कुसु ओस अज़ ग्वडनिचि लटि सपद्योमुत। बॅडिस साहबस कुन वुछिथुय ऑस प्रथ काँसि तुर फटान, पतु बॅहर्या कांह तस निश रशवु पाँसन हुंज कथ करुनस। यीतिस कालस सूज़ बॅड्य साहबन डार साँबस नाद। डार साँबस व्वज़ुल्यव बुथ। नबु लालस कुन वुछिथ वोनून तस, “छुनिथु साँ त्रठ, पानस ति तु असि ति! खबर क्या आस्यम व्वन्य बोजुन।”

दर अस्ल ऑस बॅडिस साहबस कोत ताम गछनुच जलदी। तॅम्य ओस अकरम खानस ति पगाह सुबहस यिनु खॉतरु वोनुमुत। डार साँबस वोनून, “वुछ हज़ पनुन्य एडमिनिसट्रेशन। क्याह वनु बु पगाह अँमिस ठेकुरस? अँमिस लडुकस गछि वनुन सुबहस हॉज़िर रोजुन।” यि वॅनिथ द्राव बोड साहाब।

रॉत्य रातस ओस नबु लालु तारख गँज़ुरावान। स्व कति नैदर? मॉलिस ति ह्योकुन नु कैह वॅनिथ। यिनु वोल सीन याद वॅरिथुय फॅट तस तुर। तॅम्य ओस नु यि खाबस मंज़ ति सूंचमुत जि अकरम खान अचि पॅज्य पाँठ्य बॅडिस साहबस निश।

सुबहस बुलॉव्य बॅड्य साहबन अकरम खान तु नबु लाल यिकुवटय। डार साँब ति ओस हॉज़िर। बॅड्य साहबन करुनोव दरवाज़ु अँदुर्य किन्य बंद। नेबरु कनि ऑस्य दफ्तरुक्य बाक्य मुलॉज़िम कन दिथ बोज़नुच कूशिश करान। सप्रू साँब ओस पनुनिस मेज़स प्यठ बिहिथ दुयान।

नबु लालु ओस अँकिस कूनस मंज़ व्वदुनी, बुथि लेदुर्योमुत। अकरम खान ओस कुरसी प्यठ बिहिथ। डार साँब ओस व्वदुनी तु साहबन कोर तस बेहनुक इशारु। बॅडिस साहबु सुंदिस वनुनस प्यठ बोज़नॉव अकरम खानन साँरुय दॅलील। दोपुनस, मे हज़ दिचॉमस खुशी सान दॅह र्वपयि, मगर यि वोथ नु पुंचुहन र्वपुयन डबल पाँसु। वन तु हज़ मे कुस लास छु त्यूत लबुन।

बॅड्य साहबन बूज़ साँरुय दॅलील वारु पाँठ्य। यीतिस कालस अकरम खान शेछ ओस वनान, तीतिस कालस वॅर नबु लालन पानस मंज़ ह्यमथ पाँदु। सूंचुन, युथुय मे पृछि, बु ह्यमस नलम। दपस यि हज़ छु अपुज़ वनान। हरगाह डार साँब तसुंद तरफ करि, बु दपस डार साँब ति छु अपुज़ वनान। यिम हज़ छि दूक्षय रॅलिथ।

मगर ति कुसु सपद्यव नु कैह। साहबन पृछुय नु नबु लालस कैह। बुथ गोस खतरनाक। ड्यकस खचस द्रुह। अँछव ज़न ओसुस नार नेरान। डार साँबस कुन वुछिथ वोनून, “मे तार तु हज़ फिकरी, बड्यन बड्यन अफसरन निश गॅछिथ छि यिम ठेकुर वफूर पाँसु बाँगरावान। जायि जायि छि डालि पकुनावान। व्वन्य हरगाह येम्य मांचुकूलन र्वपयि पुंचुह मंजिनस, तु द्रास जुव। त्वहि ति आस्यन खर्चुहन बराबर दिचमुच, तमि वरॉय मा वॅरिवुस तोह्य काँम। मगर ल्वकटिस मुलॉज़िमस बिचारस दियिहे नु कैह।” माहोल गव यकसर बदलिथ। डार साँब ओस साँचान, खबर क्वसु त्रठ छुनि यि नबु लालस, मगर अज़ ओस बॅडिस साहबस नोवुय रुफ। डार साँबन थोव कलु ब्वन कुन। तस आव नु समजुय क्याह पज़ि करुन। अकरम खानन ह्योत बुथिस ऑरख व्वथुरावुन। बॅड्य साहबन वोनूस, “चे हज़ छुय अथ कामि मंज़ स्यठाह ज़ेनुन। पुंचुह र्वपयि क्वसु हज़ कथ गॅयि? यिम कुसु ह्यथ नु हज़ गछि नु मे निश युन। हरगाह युन आसि, काँसि बॅड्य संज़ शकायथ ह्यथ गछि युन। ति करख नु ज़ांह।”

अकरम खानस वोथ दिगनि आँरख। डार साँबस आयि नु चलनस वथ। दृश्य द्रायि दुह्य लद गगर ही न्यबर। अकरम खान चोल स्योदुय गर। सु रुद नु अँज्यकिस काँसि बुथ द्युन लायखुय।

नबु लाल ओस अँदुर्य ख्वश। तस आँस्य ब्वकु फवलान। सु ओस व्वन्य कमुरस मंज कुनुय ज़ोन। बँड्य साहबन कोर चपरॉसिस आलव तु करुनोवुन दरवाज़ु बेयि बंद। चपरॉस्य द्राव न्यबर। नबु लालस आव नु कैह समुज। सु ओस व्वन्य बँडिस साहबस कटु चेशमव वुछान। यीतिस कालस कँड बँड्य साहबन दराज़ु मंजु लूर तु वोथ कुरसी प्यठ थोद। वुछान वुछान त्रॉव्य तँम्य नबु लालस फीतिन्य कँरिथ। तस खचु लहा। बँड्य साहबन दोपुनस, “जुमाह जुमाह गँयी आँठ दूह नोकरी करान, चु छुहमु वुन्यकि प्यठय डिमांडु करान। सु ति म्यॉनिस दफ्तरस मंज। अकरम खानस छा वर्दीयि सपलाई करनि किनु चोन चंदु बरुन।” यि वँनिथ कँड बँड्य साहबस तस अख दुदरु चपाथ। नबु लालन ह्योत टूंगि वदुन। अमि पतु हेच तँम्य साहबस माँफी। बाक्य मुलॉज़िम आँस्य दरवाज़ु चुरनि मँज्य सोरुय वुछान।

नबु लालु येलि पनुनिस मेज़स प्यठ वापस वोत, तस आसु अँछ व्वजुजि। बाक्य मुलॉज़िम आयि तस निश हमददी हावनु बापथ मगर तँम्य कँर नु तिमन सुत्य कथुय। बुथ थोवुन ब्वन कुन तु ड्यकस द्युतुन अथु। बाक्य मुलॉज़िम गँयि वापस पनुनि पनुनि जायि प्यठ।

गंटु जोराह गँछिथ आव अकरम खान वापस तु वोत स्योदुय नबु लालस निश। सप्रू साँब आस सुत्य। नबु लालन तुल कलु थोद। खान साँबन वोनुस, “नबु लाल, मे हज़ दिज़ि माँफी।” अमि पतु कजि खान साँबन चंदु मंजु पुंचुह र्वपयि तु त्राव्यन नबु लालस ब्रॉटु कनि। नबु लालन त्रॉव सप्रू साँबस कुन वारु नज़र। सप्रू साँबन होवुनस इशारु ज़ि रठ, कैह छुनु परवाय। नबु लालन गँज़ुरावि र्वपयि तु कोरुन तिमन ताह। अकरम खानस कुन कँरुन नज़राह तु त्रोवुन हत्कु असुन। तमि पतु तुजन र्वपयि तु त्राव्यन खान साँबस चंदस मंजु वापस। दोपुनस, “व्वन्य हज़ ह्यमय बराबर पंचाह र्वपयि, अदु दिमय आर्डर।” अकरम खानस गव हेरिम शाह ह्योर कुन तु बँनिम शाह ब्वन कुन। सप्रू साँब चोल वापस पनुनि जायि प्यठ। तस आव नु समजुय ज़ि यि क्याह छु सपदान।

यि सूचिथ ज़ि बँडिस साहबस निश बेयि गछनुक छुनु कांह फॉयुदय, अकरम खानन कजि चंदु मंजु पंचाह र्वपयि तु दिचनु नबु लालस। तँम्य पिलुनोवुस आर्डर। सप्रू साँब ओस दूरि प्यठ वुछान। तस आव नु समजुय ज़ि कँम्य कोर ठीख तु कँम्य कोर गलथ।



तालेह

गर् वॉतिथ ति आव नु बख्शी सॉबस करार। फीर्य फीर्य ओस तस आलम दीन यिवान अँछन तल। गेनि दार होखुमुत बुथ, चिपु अँछ, कलस कमय मस, ओड सफेद ओड कृहुन तु ह्विचिमचु नरि जंगु। आलम दीन ओस बोजान बराबर, मगर अँछन ओसुस गाश कम। कथ करनुक अंदाजु त्युथ ज़न तु प्रथ कांह कथ ज़ानुवुन ओस।

आलम दीन ओस ह्यतु हिसाबु शेठि डोलमुत, मगर लूख ऑस्य वनान सु छु द्वयित्रह वुडुर। यि कथ बीठ नु ग्वडु ग्वडु बख्शी सॉबस ति, मगर येलि तस यि कथ तारिक सॉबस निशि सरु गँयि, सु प्यव असमानु ?

आलम दीन येलि कथ ओस करान, तस ओस प्यवान पांचि पांचि मिनटि पतु थख द्युन। अज़ येलि तस अँछव किन्य पँज्य पॉठ्य ओश वोथ, बख्शी सॉबस गव नु बरदाशुय। दोपुनस, “आलम दीन! बु करु पनुनि तरफु प्रथ कांह कूशिश चु नोकरी लागुनस। बस मे दि केँह वख चु। मे हरगाह चानि खॉतरु ह्योर ताम ति पेयि गछुन, बु गछु।” अमि पतु वँर बख्शी सॉबन तस अथस थफ तु द्रास न्यबर ताम सुत्य। नेरान नेरान येलि आलम दीनन तस कुन बेयि आरु हति बुथि वुछ, बख्शी सॉबस गव ज़न जिगुरस चाक।

आलम दीन ओस अज़ ब्रॉठ ज़ु र्यथ तारिक सॉबन बख्शी सॉबस निश ओनुमुत। तारिक सॉब ओस अथ अलाकस मंज़ बी.डी.ओ. तु बख्शी सॉबस सुत्य ओसुस दोस्तानु। तारिक सॉबस ओस अलाकस मंज़ स्यठाह काल गोमुत नोकरी करान तु लूख ऑस्य तस व्वन्य अमी अलाकुक बाशंदु मानान। नोकरी हुंदिस सिलसिलस मंज़ ओस तस लूकन सुत्य सेदि स्योद रॉबितु, अव किन्य ऑस तस तिमन सुत्य ज़ॉती ज़ान पहचान। तँम्य ऑस बख्शी सॉबस आलम दीनुन्य सॉरुय दँलील बोज़नॉवमुच।

दपान आलम दीन ओस वँहरि बहि, येलि सु स्कूलुक्यन बेयि च्वन यारन सुत्य लाल पुल किन्य पॉकिस्तान च़ोलमुत ओस। अमि कथि हुंद पय लगिहे नु काँसि अगर नु मँजीदु यि कथ पनुन्यन गरिक्यन वनिहे। मँजीदु ओस आलम दीनस ब्याख यार तु प्रोगरामु मुताँबिक ओस तस ति यिमन सुती पॉकिस्तान च़लुन, मगर तफ खसनु किन्य ह्योक नु सु अमि द्वह गरि नीरिथ केँह। शामस च़ेर ताम येलि नु आलम दीन तु तसुंघ यार स्कूलु प्यठु वापस आयि, तिहुंघ गरिक्य वॉत्य तिमन छांडान छांडान मँजीदुन गर्। अति ननेयख हँकीकथ। आलम दीनुन मोल, युस ज़मीनदॉरी ओस करान, प्यव यि कथ बूज़िथुय मरुनस। माजि बिचारि गँयि लारनि तु स्व च़ायि बिस्तरस। अमि अलाकू मंज़ु ऑस्य अमि ब्रॉठ ति वारियाह लँडकु विज़ि विज़ि पॉकिस्तान च़लिमुत्य, मगर वापस ओस नु आमुत कांह। आ, मंज़ु मंज़ु ऑस तिहुंज़ शेछ खबर वातान, दपान केँह ऑस्य जान ख्यवान चवान तु केँह यि दँप्यिज़ ति बेछान। यिम बेछान ऑस्य तिम ति ऑस्य नु गरिक्यन हुंदि बीमु किन्य वापस ह्यकान यिथ। दपान ज़ु च़ोर बचु ऑस्य अकि लटि च़ूरि च़ूरि वापस तरान येलि मिलट्री वाल्यन तिमन प्यठ नज़र पेयि। पतु लँज नु पताह केँह ज़ि तिम च़ँल्या वापस किनु दँरियावु बुज्य गँयि।

अँकिस बेयिस निशि कथ वँडिथ लँज आलम दीनुनिस मॉलिस पताह ज़ि पॉकिस्तान गछुनुच स्कीम ऑस असली तल रँशीदन बनॉवमुच। रँशीदुन मामतुर बोय ओस ज़ु वँरी ब्रॉठ

मुज़फ़राबाद च़ोलमुत तु तँमी ऑस रँशीदस ति अँकिस बेयिस अथि शेछ सूज़िथ कल कँडमुच़। अखतुय ओसुनस वतु हावुक्य सुंद ति नेब द्युतमुत। यि वतु हावुक ओस बेयि अकि गामुक हँबीबु डार, युस विज़ि विज़ि च़ूर वति किन्य मुज़फ़राबाद ओस गछ़ान। दपान हँबीबु डार ओस ओरुक माल योर तु योरुक माल ओर करान तु जान पाँसु हन कमावान।

रँशीदन येलि पनुन्यन यारन पाँकिस्तान गछ़नुच़ कथ बोज़ुनॉव, तिमव मंज़ु गँयि स्यठाह तस सुत्य यिनस तयार। रँशीदन कँर हँबीबु डारस सुत्य कथ तु चलनुक ताँरीख़ कोरुन मुकरँर। यूत यूत यि दूह नँज़दीख़ गव यिवान, अख़ अख़ यार गव लोब ह्यवान। म्वख़सर बचेयि कालु शाम ताम शे मगर द्रायि ऑख़रस पांच़य।

आलम दीन तु बाक़ुयन शुर्यन हुंघव गर वाल्यव च़ोट ख़नवटु ख़ड, मगर शुर्यन हुंज़ लँजिख़ नु पताह कँह। पनुन्य किन्य वॉत्य तिम लाल पुल ताम पय पताह कडान कडान, मगर हॉसिल नदारद। जंगल आसनु किन्य आसु सरहदु अपोर तरनुचि वतु बिसियार। योदुवय जायि जायि मिलट्री वॉल्य गारुथस ऑस्य मगर तमि पतु ति ऑस्य चलन वॉल्य चलान।



आलम दीनु संदि पाँकिस्तान चलनु पतु वुहि वुहुर्य लँज पताह जि सु छु जेमि अँकिस जेलस मंज़ बंद। यि कथ वँन्य तमी जेलु मंज़ु रिहा गॉमुत्य अँक्य नफरन, यस सँलीम खान नाव ओस। सँलीम खान ओस आलम दीनुनि गामु नखय बेयि अकि गामुक रोज़न वोल। येलि आलम दीनुनि माजि यि कथ बूज़, स्व गँयि नेचिविस बुथ वुछनु खॉतरु देवानु। आलम दीनुन मोल ओस नु व्वन्य जिंदु कँह। सु ओस ऑठ वँरी ब्रॉट गुज़र्योमुत।

आलम दीन क्याज़ि ओस जेमिकिस जेलस मंज़ बंद तु सु किथुवँन्य वोत पाँकिस्तानु प्यठ तोर, ति ऑस नु काँसि पताह। ग्वडु ग्वडु ज़ोन लूकव मसाँवी। तिमव कँर नु अथ मामुलस मंज़ बेयि पय पताह करनुच़ कूशिश कँह। मगर येलि तारिक साँबन यि कथ बूज़, सु गव संजीदु। तँम्य बुलॉव गामु जिठ्यन हुंज़ अख़ मीटिंग। सँलीम खान, येम्य ग्वडु आलम दीनुन्य शेछ ऑस वँन्यमुच़, आव बुलावनु। सँलीम खानन वोन जि तँम्य वुछ पानु सु कुद्य तु तँस्य निशि लोगुस पताह जि सु छु आलम दीन। आलम दीन क्याज़ि ओस जेलस मंज़ तु कति प्यठ ओस आमुत, तथ मुतलिक ऑस नु सँलीम खानस ति कँह पय पताह। आलम दीनन ओस नु तछ़ व्यछ़नॉविथ कँह वोनमुत। सिर्फ़ ओसुनस दोपमुत, हरगाह मोकु यियी, म्याँनिस मॉलिस माजि कँर्यज़ि शेछ। मगर सँलीम खानन युस हुलियु आलम दीनुन वोन, सु ओस नु असली आलम दीनुनिस हुलियस सुत्य वाठ ख्यवान। मसलन तसुंदि वननु मुताँबिक ओस आलम दीन स्यठाह वाँसि, येलि ज़न असली आलम दीन वँहरि त्रुहि दूयत्रुहि गोछ़ आसुन।

तारिक साँबन कोर पनुन रसूख़ इस्तेमाल। सु वोत गामुक्य कँह नफर ह्यथ जोम तु अति समख्यव पनुनिस अँकिस दोस्तस, यस परवेज़ अहमद नाव ओस। परवेज़ अहमद ओस पुलसस मंज़ नोकरी करान। सु गव पानु तिमन सुत्य तु वातुनॉविन तथ जायि येति आलम दीन बंद ओस। अति करुनोव तँम्य यिमन आलम दीनस समखुनुक इन्तिज़ाम।

दपान तारिक साँब तु बाक़ुय नफर येलि आलम दीनस समखुनि तसुंजि कूठरि मंज़ वॉत्य, तिमन आव नु साफ़ बोज़ुनय कँह। अँदरु ऑस अनि गटु। अख़ नफर ओस कूनस मंज़ बिहिथ,

कलु क्वठचन मंज त्रॉविथ। बॅशीरु मॅलिक, युस तारिक सॉबस सुत्य ओस आमुत, गव ब्रॉठ कुन तु दिचुन तस ज़ीर। अँम्य नफरन तुल कलु थोद तु त्रॉवुन ग्वडु बॅशीर मॅलिकस तु पतु बाक्यु सारिनय प्यठ नज़र। बॅशीर मॅलिकन वुछ तस बुथ वारु तु द्युतुन फॉसलु। दोपुन यि छुनु आलम दीन। कृद्य वोन तस, “बु छुस आलम दीनुय। चु कुस छुख?” बॅशीर मॅलिकन वोनस, “बु छुस बॅशीर मॅलिक। चु हरगाह आलम दीनुय छुख, वन मे छुखु परज़नावान?” कृद्य वोनस, “कति परज़नावथ। वुह वॅरी गॅयि मे त्वहि निशि दूर गॉमुतिस। चु मा छुख मही दीन मॅलिकुन नेचुव।” बॅशीर मॅलिकस आयि कथ बराबर। दोपुनस, “आ, सुय छुस। यिम ज़ानुहँखु?” बॅशीर मॅलिकन होवुनस बेयि दून नफरन कुन। कृद्य हेक्य नु तिम पछॉनिथ कैह। दोपुनस, चुय वन। बॅशीर मॅलिकन वॅनिनस तिहंघ नाव तु तस प्यव ह्यस। दोपुनस, “यूसुफ छु मे हमसायि तु मँजीदु ओसुम स्कूलुक च़ाटु बोज, यस असि सुत्य पॉकिस्तान च़लुन ओस, मगर च़ोल नु कैह।” बस, अमि पतु वॅर्य तिमव सारिवुय पानुवँन्य नालुमँत्य, म्वनि तु मीठ्य। बॅशीर मॅलिकन करुनोव तारिक सॉबुन तारुफ आलम दीनस सुत्य तु दोपुनस ज़ि तसुंजी मेहरबॉनी सुत्य वॉत्य तिम तस निशि।

आलम दीनन प्रुछ तिमन ग्वडु पनुनि गर्युक हाल। तिमव वोनहँस, “मुहम्मद दीन सपुद अज़ ब्रॉठ ऑठ वॅरी रहमते हक। मॉज छय ज़िंदय, बस च़ेय प्रारान। चु वुछिथ मेलि तस बिचारि नँव ज़िंदगी।” आलम दीनन ह्योत मॉल्य सुंदि मरनुच शेछ बूज़िथ वदुन। मगर ओश कति ओसुस ज़ि दिगनि वसिहेस। बॅशीर मॅलिकुनिस ज़ोर करुनस प्यठ बोज़नोव आलम दीनन ति सोरुय यि तस प्यठ यिमन वुहन वॅरियन गुज़र्योमुत ओस।



वुह वॅरी ब्रॉठ येलि आलम दीन तु तसुंघ यार गरि प्यठ च़ॅल्य, हँबीबु डारन, युस तिमन वतु हावुक ओस, वातुनॉव्य तिम मुज़फ़राबाद। अति वॅरिन तिम अँकिस कॉशिरिस हवालु यस चायि दुकान ओस। दुकानु वॉलिस ओस नाव मकबूल खान। सु ओस मुज़फ़राबादुकुय रोज़न वोल। दूहस दून दूहन यड बॅरिथ बताह ख्यॉविथ लॉग्य तँम्य आलम दीन तु तसुंघ यार कामि। बानु छलुनस तु साफ सफॉयी करुनस। ग्वडु ग्वडु गव तिमन यि करुन सख बरतबाह, मगर वारु वारु लोगुख दिल। अथ अलाकस मंज ऑस्य वॅशीरि प्यठ च़ॅलिथ आमुत्य शुर्य आम तोर यी करान। वारु वारु गॅयि आलम दीनस तु तसुंघन सॉथियन बाक्युन कॉशिर्यन सुत्य बरादँरी। रॅशीदस म्यूल नु पनुन मामतुर बोय कैह। हँबीबु डारन कोर पताह तु नन्योस ज़ि सु छु मुज़फ़राबाद त्रॉविथ कराची गोमुत। यि बूज़िथ गव रॅशीदु स्यठाह मोयूस। तस ओस नु व्वन्य मुज़फ़राबादस मंज दिलुय लगान।

र्यथ ड्वड र्यथ गॅछिथ च़ोल रॅशीदु ति। आलम दीनस तु बाक्युन यारन लँज नु पतहुय ज़ि सु कोत गव। सॉरिसुय अलाकस छॉड दिथ ति लोग नु तसुंद कैह पताह। आलम दीनन सूच ज़ि सु ति आसि करॉची च़ोलमुत।

आलम दीन रूद अथ चायि दुकानस प्यठ लगबग दून वॅरियन। रॅशीदुनि च़लनु पतु गव तस ति शोख कराची गछुनुक मगर वथ हॉवुनस नु कॉसि। ज़ु वॅरी गॅछिथ वॅर तँम्य अँकिस खँरीदारस सुत्य कथ यस सुत्य सु बडु अँज्य मँज्य ओस गोमुत। खँरीदारस ओस नाव जमाल

खान। जमाल खान ओस ट्रक चलावान तु अक्सर लोहूर गछान। सु ति ओस मुजफ्फराबादकुय काँशुर। तँम्य द्युत आलम दीनस दिलासु जि कराँची नु कैह, अलबतु ह्यकथ बु लोहूर वातुनॉविथ। आलम दीनन ज़ोन यि ति गँनीमथ।

अकि दूह सँबील वॅरिथ न्युव जमाल खानन आलम दीन पानस सुत्य पनुनि ट्रेकि मंज़ लोहूर। बाकुय यार त्रॉविन चायि वॉलिस निशी। जमाल खानन पुछ आलम दीनस, “लोहूर वॉतिथ क्याह करख चु? च़े छुयि कांह पनुन तति?” आलम दीनन वोनस, “कांह नतु कांह मेलि पनुन। सानि गामुक्य छि वारियाह नफर योर आमुत्य। मे छु बूजमुत जि तिम छि साँरी जान कारुबार करान। कांह नतु कांह रटी पानस सुत्य।” “मगर च़े क्या मजबूरी ऑसुय गरि चॅलिथ यिनुच? चु क्या ओसुख तति करान?” पृछुस जमाल खानन। “बु ओसुस स्कूल परान। मे ओस सख शोख पाँकिस्तान वुछनुक तु येती रोज़नुक। रँशीदस ति ओस मामतुर्य बाँय वोनमुत जि पाँकिस्तान छु पॅज्य पाँठ्य जनथ। येतिक्य लूख छि काँशिर्यन सख माय बरान तु अथु रोट करान। यि बूजिथ ऑस मे ति सख कल द्रामुच।” जमाल खानन वोनस, “गोबराह, गरु गव गरय। गरु छुनु कुनि बनान। च़े वुछुथ ना येति किथु पाँठ्य छि काँशिर्य मोज़ूर्य करान तु यड बरान।”

आलम दीन गव जमाल खानुन्य कथ बूजिथ साँचस। कैह काल ओस तस गोमुत गरु पनुन याद यिवान। मोल माँज, यार दोस, ऑशुनाव रुशनाव मगर पाँकिस्तान वुछनुक तु अति रोज़नुक जनून ओस तस वुनि ति जाँरी। जमाल खानन वोनस, “चु छुख वुनि ल्वकुट। यीतिस कालस येति कांह नोकरी बनी, तीतिस कालस रोज़ मेय सुत्य गाडि प्यठ।” आलम दीनस आयि बराबँदी। वैसे ति ओस तँम्य सूचमुत जि मे ति छु ऑखुरस कराँची गछुन, येति कस छु रोज़नुक ?

जमाल खानस सुत्य वॅरिथ आलम दीनन च़ोर वॅरी। जमाल खान ओस तस बाँय सुंघ पाँठ्य रछान। यीतिस कालस हेछ तँम्य गाँड्य ति चलावुन्य। जमाल खानन अँन्य ब्याख गाँड्य तु स्व वॅरुन आलम दीनस हवाल। अमि पतु गव आलम दीन नॅव गाँड्य चलावनस सुत्य आवुर। जमाल खानन द्युतुनस तनखाह मोकूल। आलम दीनन कोर अलग डेरु।

बेयि पाँछ वॅरी गँयि। आलम दीनस गँयि जान पाँसु हन जमाह। अकि दूह आव तस मोकु ट्रक ह्यथ कराँची गछुनुक। जमाल खान गोस सुत्य। तसुंदि दँस्य गव आलम दीनस कैहन काँशिर्यन सुत्य तारुफ। तिहँदि ज़रियि वॅर आलम दीनन रँशीदु छांडनुच कूशिश मगर सु लोगुस नु कुनि अथि। लगेहे ति कति? कराँची ऑस थोडॉयी ल्वकुट जाय कांह? आलम दीनन त्रॉव तसुंज़ ब्रांथुय।

मगर आलम दीनस आयि कराँची पसंद। दोपुन असली पाँकिस्तान गव योहय। तँम्य ह्योत अँती अख कमरु मँल्य। सु ओस नु व्वन्य यछान गाँड्य चलावुन्य। गाँड्य वॅरुन जमाल खानस हवाल तु कराँची मंज़ुय त्रुवुन अख ल्वकुट म्वकुट किरानु दुकान।

वारु वारु वॅर आलम दीनन स्यठाह तरकी। ल्वकटिस दुकानस बन्यव बोड दुकान। दुकानस खोत बोर्ड ‘आलम किराना स्टोर’। दुकानस मंज़ आयि नोकर चाकर। शेन वॅरियन मंज़ सपुद आलम दीनस जान गुज़ारु। तँम्य ह्योत दुकानस सुती अख ल्वकुट मकानु ति मँल्य।

आलम दीनुनिस दुकानस ब्रॉठु कनि ओस अख ल्वकुट म्वकुट होटल। अम्युक मॉलिक ओस सरवर खान। सरवर खान ओस असली पुंछुक रोज़न वोल मगर पाँकिस्तान बननु वख्तु ओस सु अयाल ह्यथ कराची आमुत।

सरवर खान ओस रुत इनसान। वाँसि आसिहे योहय पंचाह दुवंजाह ह्यु। आलम दीनस सुत्य आयि तस सख बराबँदी। मंजु मंजु ओस सु आलम दीनस पनुनि अँकिस ऑशुनाव कोरि सुत्य खांदर करनुक मशवरु ति दिवान। मगर आलम दीन ओस नु वुनि तयार। सु ओस यछान अयालुक बार तुलनु ब्रॉट मॉलिस माजि समखुन।

सरवर खान ओस यछान पनुन कारुबार बडावुन। तस ओस शोख बोड होटल बनावुनुक मगर सरमायि ओसुस नु त्यूत कैह। कथ कथ करान वोन तँम्य अकि दूह आलम दीनस, “बु ओसुस सौँचान सौँन्य बरादँरी गँछ रोज़न्य ता-हयात ज़िंद। मे छु शोख पनुन होटल थदि पायि बनावुनुक, मगर गुज़ारु छुम कमय। छुना सलाह, च़ु रोज़ख मे शँरीक तु दूश्वय करव रँलिथ मीलिथ कार।” आलम दीनन वोनस, “बु कति हेक़ु ज़ु ज़ु चीज़ सम्बॉलिथ। च़ु छुख ना वुछान बु कोताह आवुन छुस।” सरवर खानन ओस ग्वडय सूँचिथ थोवमुत। दोपुनस, “च़े छुयि वुम्बरि व्वन्य नून तीलय कुनुन? अगर तरकी करुन्य छि, तैलि छु ज़मानस सुत्य पकुन। ख्वदा तालुहन हय योछ, बेयि दहि वुहुर्य आसि असि इन्टरनेशनल स्टँडार्डस प्यठ होटल। लछि बँदिस आसव ऑगुजन प्यठ हिसाब करान।” आलम दीनस आयि कथ समुज। सरवर खान ओस यछान तसुंद किरानु दुकान कुनिथ होटलस मंजु शँरीक सपदुन।

आलम दीनन कोर सौँच। तस बासेयि सरवर खानुन्य कथ मोकूल। कैह वख्त गँछिथय गव सडकि दु-वँतिस प्यठ ‘होटल सरवर आलम’ खडा। दूशवुन्य शँरीकन यि कैछा जमाह ओस, ति लोग अथ। होटल ओस नु त्यूत बोड कैह मगर अथ अलाकस मंजु ओस यि अमि कृस्मुक कुनुय। वारु वारु गव यि होटल दर्मियानु तबकुक्यन लूकन तु दपतरी मुलॉजिमन मंजु स्यठाह मँहशूर। दूह पतु दूह गँयि आमदँनी हुरान।

आलम दीन ओस अकि दूह बाज़रस मंजु नचान ज़ि तस पेयि अँकिस बुज़र्गस प्यठ नज़र। यि बुज़र्ग ओस तसुंदी अलाकुक। आलम दीनन कोर तस आलव। सु नफर आव ब्रॉह कुन तु आलम दीनन वोनस, “बु हज़ ज़ानथ च़ु। च़ु छुख ना वँशीरि रोज़ान सलामाबादु?” बुज़र्गन कोर यकरार तु वोनस, “मगर बु ज़ानथ नु च़ु कैह। च़ु कुस छुख।” आलम दीनन वोनस, “बु छुस आलम दीन। बु ओसुस रामपोरु रोज़ान। बु छुस १८ वँरी ब्रॉट गरि प्यठ च़ैलिथ आमुत।” बुज़र्गन वोनस वापस, “मे छु शख ह्यु गछान। च़ु मा गोख मुहम्मद दीनुन नेचुव?” आलम दीनन कोर आंकार। बुज़र्गन वोनस, “बु छुस दह पंदाह दूह ब्रॉट योर अँकिस ऑशुनावस निश आमुत। बु ज़ानुहन चोन मोल वारु पॉठ्य। सु ओस स्यठाह जान इनसान। चानि च़लनु किन्य वोट तस सख तकलीफ तु गव रहमते हक। मगर मे छु बूजमुत ज़ि च़े छय मॉज ति स्यठाह ब्यमार। स्व छि खबर कथ गरि प्रारान, शायद च़े बुथ वुछुनस।” आलम दीन गव दिल मलूल।

कैह दूह गँयि। आलम दीन गव गरु गछनु खॉतरु सख बेताब। तँम्य वँर सरवर खानस सुत्य कथ। सरवर खान ओस जान रसूखु वोल तु बड्यन बड्यन सुत्य ऑसुस ज़ान। दोपुनस, बु करुनावय चानि वँशीरि तरनुक इन्तिज़ाम।

दूह दूह गव गछान। आलम दीन ओस माजि हुंद बुथ वुछनु खॉतरु तरसान। कॉशिर्यन ओस नु सँहल सँहल वँशीरि वापस तरनु खॉतरु इजाज़थ मेलान मगर सरवर खानस ओस यकीन ज़ि सोरुय सपदि ठीख।

सरवर खानुन रसूख च़ल्यव नु कैह। आलम दीनस म्यूलय नु गरु गछनुक इजाज़थ। पॉकिस्तान यिनु पतु ह्योत तँम्य ग्वडनिचि लटि वदुन।

आलम दीनन्य हालथ गॅयि बिगरान। सरवर खानन ह्योक नु तसुंद यि हाल वुछिथ कैह। तॅम्य कॅर ब्याख अख सॅबील। पॉकिस्तानस मंज़ ऑस्य तिथ्य नफर मूजद यिम पाँसु रॅटिथ सरहदु अपोर ऑस्य वातुनावान। युथुय अख नफर छोंड सरवर खानन। तस ओस नाव वकार खान। तॅम्य मॅग्य ज़ु सास। दोपुनस, “मुज़फ़राबादु वति वापस तरुन छु अज़ कल खतरनाक। म्यॉन्य कॉम गॅयि च़ु सियालकोटु निश हिंदुस्तानुकिस अलाकस अंदर छ्वपु दम कॅरिथ वातुनावुन। अमि वति छुनु खतरु कैह मगर तोति छुय ह्यस करुन। अपोर तॅरिथ छुसय नु बु ज़िमुवार।” आलम दीन गव आमादु।

सफर ओस स्यठाह ज़्यूठ। वकार खान तु आलम दीन वॉत्य ग्वडु लोहूर तु तमि पतु गुजरानवाला। अति प्यठु खॅत्य तिम अॅकिस ट्रकि तु वॉत्य सियालकोट सरहदस ताम। अति हॉव वकार खानन आलम दीनस स्व वथ, येमि वति तॅरिथ सु जोम अलाकस मंज़ वातिहे। आलम दीन ओस बेताब मगर वकार खानन दोपुस, “अनि गटु हिश गॅछिन, पतु छुनु परवाय कैह।” युथुय शामुचि सथ हिशि बजेयि, वकार खानन वातुनोव सु अथस थफ कॅरिथ सरहदु अपोर।

आलम दीनन त्रोव अपोर वॉतिथुय फ़ख। अति प्यठु लगुहन तस सिर्फ़ ज़ु दूह गरु वातुनस। सु रूद ब्रोंह कुन पकान। अॅछन तल ओसुस सिर्फ़ पनुन गरु तु माजि हुंद बुथ।

मगर कुस्मतन द्युत नु आलम दीनस साथ कैह। तस आव नु समजुय ज़ि कपॉर्य आयि जवान तारु तु कॅरुख तस नरि थफ। जवान ऑस्य नु हिंदोस्तॉन्य फोजुक्य कैह, बॅल्यकि ऑस पॉकिस्तॉन्य रॅजर। तिमव येलि आलम दीन पनुनि चोकि प्यठ वातुनोव, अदु लॅज तस पताह ज़ि सु ओस वुनि ति पॉकिस्तॉन्य अलाकस मंज़ुय। वकार खान ओस गोमुत तस ननि वानु दोखु दिथ।

आलम दीनुन प्लान प्यव पथर। तस फीर ऑरकू छठ बुथिस। पॉकिस्तॉन्य रॅजुरव वातुनोव सु गुजरानवाला वापस तु तति कोरुख मिलट्री इंटेलिजनुसस हवालु। तिमव बनाव आलम दीनुनि नावु फाइल यथ मंज़ सु हिंदोस्तॉन्य एजेंट आव करार दिनु। काकुदन मंज़ आव लेखनु ज़ि रॅजुरव रोट सु हिंदोस्तॉन्य अलाकू प्यठु पॉकिस्तॉन्य अलाकस मंज़ तरान तरान। तमि पतु यि तस सुत्य सपद्यव, ति छुनु बयान करुन लायखुय। तसुंद नाव, तसुंद कराची हुंद गरु तु तसुंद कारुबार, किहिन्य आव नु पोज़ माननु। यिम पाँसु तॅम्य पानस सुत्य ऑस्य तुल्यमुत्य, तिम नीहॅस अथु मूरिथ।

आलम दीन रूद पॉकिस्तॉन्य इंट्रोगेशन सेंटरन मंज़ बराबर दून वॅरियन। गरा अॅकिस जायि तु गरा बेयिस जायि। तस सुत्य सपुद थर्ड डिगरी हुंद ति वरताव। ऑखुरस येलि सु पॉकिस्तॉन्य मिलट्री इंटेलिजनुसन हिंदोस्तानुकिस अलाकस मंज़ ‘पुश बैक’ कोर, सु ओस पूर अडु मोर सपद्योमुत।

मगर आलम दीनुनि खॉतरु ऑस नु जिंदुगी यिचुय कैह। तस ओस बुथि ति तकलीफ वुछुन। जोम अलाकस मंज़ वॉतिथुय पेयि बी.एस.एफ. वाल्यन तस प्यठ नज़र। तिमव वुछ कुस ताम पॉकिस्तॉन्य ‘जोसूस’ हिंदोस्तॉन्य अलाकस मंज़ अचान। तमि पतु सपुद बराबर ती यि आलम दीनस सुत्य पॉकिस्तानस मंज़ सपुदमुत ओस इंट्रोगेशन, मार, थर्ड डिगरी तफतीश, अकि इंट्रोगेशन सेंटरु प्यठु बेयिस इंट्रोगेशन सेंटरस। मारु निशि बचनु खॉतरु कोर व्वन्य आलम दीनन सु सोरुय कबूल यि तस वोनुख। तसुंज हालथ गॅयि दूह पतु दूह खराब गछान यीतिस

कालस तस अँछन ति गाश कम गव। त्रुह पांचत्रुह वुहुर जवान बन्यव वुछान वुछान शेठ वुहुर बुड।



तारिक साँब वोत अँकिस बेयि सुंदि मदतु सुत्य मँनिश्टरस ताम। तस निश कँरुख आलम दीनुन्य साँरुय दौद्य कांगुर बयान। सुती द्युतुख बरुसु जि तिम छि आलम दीनुन्य ज़मनाथ दिनु खॉतर तु ज़िमुवॉरी तुलनु खॉतर तयार। तारिक साँबस प्यव अथ सिलसिलस मंज अँकिस पछस जेमिस मंजुय रोजुन।

बराबर अँकिस वँरियस तु त्रेन र्यतन कौद रोजनु पतु कोरुख आलम दीन रिहा। तस खलाफ केस आव हेरि प्यठ हुकम अनुनॉविथ वापस निनु। तमि पतु वातुनोव तारिक साँबन सु गरु पनुन। मगर आलम दीनुन खोट तालेह रुद तस बदस्तूर सुत्य पकान। येमि दूह सु गरु वोत, तमि कालु आँस तसुंज माँज अमानथ दिथ गॉमुच। यस माजि हुंदि खॉतर आलम दीन यूताह मुसीबथ तुलिथ आव, तसुंद बुथ वुछनुय ओस नु तस नँसीबस। लूकव वोन जि माँज ति आँस नेचिविस बुथ वुछनु खॉतर बेकरार तु मरनु वख्तु ति आसु तस अँछ सडकि कुनुय दरस लगिथ।



बख्शी साँब ओस यिमनुय ग्वतन जि माजि कोरुनस आलव। तसुंज माँज आँस व्वन्य अक्सर ब्यमारुय रोजान तु बख्शी साँब ओस गरु वॉतिथ ज़्यादु तर तँस्य निश ब्यहान। माजि हुंद आलव बूजिथुय पेयि बख्शी साँबस आलम दीनुन्य माँज याद। सूंचुन, स्व बिचॉर ति आसिहे पनुनिस नेचिविस यिथय पाँठ्य छांडान। बख्शी साँबन व्वथुरोव अँछन हुंद ओश तु वोत माजि निश।

आलम दीन ओस नोकरी यछान करुन्य। तसुंद पाँकिस्तान वापस गछनुक ओस नु व्वन्य सवालुय कांह। बाजॉप्यतु इजाज़थ ह्यथ दिथिहे नु तस कांह गछनु तु चूरि छेपि गछनुक ओस नु सवालुय। अँथ्य सिलसिलस मंज आँस तारिक साँबन बख्शी साँबस सुत्य कथ कँरमुच। बख्शी साँबस आँस्य पनुनिस दफ्तरस मंज कँह नफर नोकरी लागुन्य। आलम दीनन ओस चपरॉस्य पोस्टु खॉतर दरखास कोरमुत। बख्शी साँबन ओस तसुंद दरखास ह्योर सूजमुत तिक्याजि अख ओस नु सु खास पोरमुत ल्यूखमुत, बेयि ओस सु स्यठाह कालस जेलस मंज बंद रुदमुत। बख्शी साँबन कँर सख दोड दूप मगर तसुंज मेहनथ ति गँयि बेसूद। आलम दीनुन दरखास आव ना-मंजूर करनु। यि कथ वँन्य तँम्य तारिक साँबस ति।

अँथ्य दोरान कँर आलम दीनन सरवर खानस सुत्य रॉब्यतु करनुच कूशिष। टेलेफोनस प्यठ कँर सरवर खानन चटवुन्य कथुय। गवडु दोपुनस सोरुय छु ठीख, चु मु बर परवाय कँह। बेयि लटि दोपुनस, होटुलस गव सख गाटु। त्रेयिमि लटि कोरुनस कथ करनसुय इनकार। आलम दीनुनिस अँकिस ज़ॉन्यकारस ओस पाँकिस्तान गछनुक इजाज़थ म्यूलमुत। आलम दीनन सूज तस अथि सरवर खानस चिठ्य। सु नफर येलि सरवर खानस चिठ्य दिनि गव, तँम्य

दोपुनस बु ज्ञानुनय नु कांह आलम दीन। ज्ञॉन्यकारन वोन जि सरवर खानुन होटल ओस श्री स्टार होटल बन्योमुत।

आलम दीन रूद वारियाहस कालस बख्शी सॉबस निश यिवान तु नोकरी हुंद पताह करान। बख्शी सॉब ओस नु बॅहरानुय तस पोज़ वनुनस। दपान ओसुस, कथ बाथ छि चलान तु कैह नतु कैह सपदि। तसलाह गॅछिथ त्रोव आलम दीनन तस निश युनुय।

अख र्यथाह आसिहे गोमुत आलम दीनस बख्शी सॉबस निश यिनस जि अख मोज़ु सपद्यव। बख्शी सॉबस सूज़ बॅञ्च साहुबन नाद। दोपुनस हरगाह च़ु पानु जिमुवॉरी ह्यख, आलम दीन ह्यकोन नोकरी लॉगिथ। शेन र्यतन आरज़ी पॉठ्य, पतु करोन तुहँजि सुफॉरशि प्यठ मुस्तॅकिल। बख्शी सॉबन हेच़ जिमुवॉरी।

देयिमि दूह सुबहस तुल बख्शी सॉबन तारिक सॉब सुत्य तु गॅयि आलम दीनुन गरु युथ ज़न तस यि ख्वश खबर बोज़ुनावन। युथुय तिम तसुंद गरु वॉत्य, तति ओस बदलुय आलम। गामुक गाम ओस जमाह। सॉरी ऑस्य हयबुंगु। बख्शी सॉबन कोर पताह जि क्या दॅलील छि? येलि तॅम्य जवाब बूज़, सु प्यव असमानु। आलम दीन ओस वापस च़ूर वति किन्य पॉकिस्तान च़ोलमुत। यि कथ ननेयि समद मागरेहस निश। समद मागरे ओस आलम दीनस हमसायि। तम्य वोन व्यस्तॉरिथ, “आलम दीन आव राथ शामस च़ीर्य मे निश। दोपुनम, मे कोर फॉसलु पॉकिस्तान वापस च़लनुक। योत आयोस बु माजि हुंदि खॉतर, स्व रूज़ नु कैह। नोकरी ति बनेयम नु कैह युथ बु जिंदुगी हुंघ बाक़ुय दूह आरामु सान गुज़ारहॉ। व्वन्य छु म्यानि जिंदुगी हुंद अकोय मक्सद, सु गव कराची गॅछिथ सरवर खानस बदलु ह्योन।”

अमि पतु लॅज नु कैह पताह जि आलम दीनस क्या गॅयोव ?



पँत्युम बाज़

तिमन ओसुख नाव कोरमुत 'शुच'। तिमन मंज युस सारिवुय खोतु बोड ओस तस ओस नाव लालजी। सु ओस च्वदाह वुहुर। शेनुवय ऑस्य सॉनिस महलस नँजदीखुय मनियार मँहलस मंज अँकिसुय जायि रोज़ान।

'शुच' ऑस तिमन र्यछ। यि र्यछ ऑस नु तिमन हुटु मुटय आमुच थवनु कैह। समु काकन ऑस यि र्यछ तिमन बडु सूचिथ समजिथ तु तिहँदि वँतीरुक संजीदु मुशॉहिदु वँरिथ थँवमुच। समु काख ओस अमी मँहलुक अख रिटायर गोमुत पुलसु अफसर। तसुंद वनुन ओस जि अमि शुचि छि अख अँकिस सुत्य जादु वख्तस लरि लोर रोज़नुक्य तमाम रिकार्ड फुटरॉव्यमुत्य।

हरगाह पोज़ बूजिव, ऑठ वँरी ब्रॉठ यनु यिम लँडकु नँजदीखुकिस प्राइमरी स्कूलस मंज दॉखुल आयि करनु, तनु वोत तिमन यिकुवटय व्थान ब्यहान। मँहलस मंज बाग ओस अख बोड शाह तुलु कुल। अँथ्य तुलु कुलिस तलु कनि ओस तिहुंद माठ। यि माठ ओस तिमव डुविथ शीरिथ साफ सुथरु बनोवमुत तु रूदु शीनु मूसिमु वरॉय ऑस्य तिम सॉरी प्रथ सातु अती ब्यहान। अँती ऑस्य तिम स्कूलच कॉम ति करान, बहस मुबाहसु ति करान, सॉलस गछनुक प्रोग्राम बनावान तु कुलिस प्यठ खँसिथ शाह तुल्य ति ख्यवान। शाह तुल्य ख्यनु खॉतरु ऑस तिमव सारिवुय पनुन्य पनुन्य अख अख लँड रँटमुच। अमि कुलिक्यन शाह तुल्यन प्यठ ओस तिहुंदुय योत हक, यि हावनु म्वखु ओस तिमव कुलिस प्यठ श्रापकुचि सुत्य पनुन पनुन नाव लीखिथ थोवमुत। शीन प्यनु वख्तु ऑस्य तिम अख मोट तु द्रोठ शीनु मोहन्युव बनावान तु तस ऑस्य अँथ्य कुलिस तल अँकिस खास जायि बेहनावान। तसुंद कलु तु नरि जंगु ति ऑस्य शीनुवुय बनॉविथ तस लागान। लँडुकन मंज ओस सारिवुय खोतु ल्वकुट लँडकु राम जी। तसुंज कॉम ऑस अमिस शीनु मोहनिविस चुनि फलि सुत्य कन, अँछ, नस तु ऑस बनावुन। शीनु मोहनिविस ब्रॉठ कनि ऑस यिवान अख प्रॉन्य कांगुर थवनु, येमि सुत्य तस बदलय हयथ ऑस गछान। लँडुकन हुँदि बदलु ओस योहय शीनु मोहन्युव सॉतस ताम तीतिस कालस तथ कुलिस तल रोज़ान, यीतिस कालस सु सॉतु वावु सुत्य व्यगुलान तु म्वकुलान ओस।

लँडुकन हुंज यि कारवॉयी रूज तोताम बराबर चलान योताम दिलि हुँद्य अँक्य ऑशुनाव लँडुकन लाल जीयस अख ट्रांसिस्टर रेडियो द्युत अँनिथ। सुती वोननस जि जल्दुय छु इंगलँडस मंज हिंदोस्तानस तु इंगलँडस दरमियान किरकटुच पूरु सिरीज सपदन वाजेन्य, तु तिमन किरकट मैचन हुंज कामेंट्री यियि सैदि स्योद अथ रेडियोहस प्यठ। बस, अमि कथि पतु बदल्यव त्युहुंद तोर तँरीकय।

तिछ कथ ऑस नु कैह जि तिमव क्या ओस नु अमि ब्रॉठ रेडियो वुछमुत या बूजमुत। पज़र गव यि जि तिमव मंजु ऑस्य दून लडुकन गरन मंज ति रेडियो, मगर रेडियो आसुन न आसुन ऑस तिहुँदि खॉतरु हिशी कथाह। तिहुँद्य मोल मॉज ऑस्य सिर्फ खबरु बोजनु खॉतरुय योत रेडियो त्रावान, तिव्याजि किरकटस विरकटस सुत्य ऑस नु तिमन कांह दिलचस्पी। यि ट्रांसिस्टर यिनु सुत्य सपदेयि तिहुँदि मनुच मुराद पूरु। व्वन्य ह्यकुहन तिम कुनि ति वख्तु पनुनि मरज़ी हुंद प्रोग्राम बिला रोक टोक बूजिथ।

लाल जियस हुरेयि कॉम। सु लोग व्वन्य किरकट मैचन मुतलिक ज्ञानकॉरी जमाह करनि। अमि खॉतरु पेयि तस अख नॅव कापी अनुन्य, यथ मंज तॅम्य तमाम ज्ञानकॉरी लीखिथ थॅव युथ ज्ञन वख्तु विजि छांडुनस मंज कांह मुशिकल यियि नु। इंडिया-इंगलैंड सिरीज शुरु गछनु ब्रोंदुय थोव तॅम्य बुथि अॅकिस वॅरियस सपदन वाल्यन मैचन हुंद पूर हिसाब किताब लीखिथ। सु ओस व्वन्य विजि विजि माठु प्यठु गॉर हॉजिर रोज्ञान, मगर यि ऑस नु कांह परेशॉनी हुंज कथ। सारिनय ऑस पताह जि सु छु 'कामि' लॅगिथ।

लॅडुकव मंजु ओस नु कॉसि ति अमि ब्रोंठ किरकट गिंदुमुत या किरकट मैच वुछमुत। मगर तिमव ओस अथ मुतलिक स्कूलक्यन बड्यन लॅडुकन निश स्यठाह बूजमुत। लाल जियिन्य ऑशुनाव लॅडुकन ओस तिमन वोनमुत जि यि खेल गिंदुन्य छी तीच सख जि बॅड्य बॅड्य ताकतवर मुल्क मसलन अग्रीका, रूस तु जापान ति छि यि गिंदुनस खोज्ञान। मगर अमि सुत्य पेयि नु लॅडुकन हुंदिस शोकस कांह फर्ख। तिम सॉरी रूद्य इंडिया-इंगलैंड सिरीजि हुंद ग्वडन्युक मैच शुरु गछनुस बे-सब्री सान प्रारान।

मैच गव शुरु तु पॅज्य पॉठय आयि अमिच कामेंट्री ट्रांसिस्टर रेडियोहस प्यठ। ग्वडु ग्वडु आयि नु लॅडुकन वारियाह लफज समजुय, मगर पांचि दोही गॅयि तिम अथ बोलि मंज मॉहिर। मैचस दोरान ऑस्य तिम न्यसुब रातन ताम तुलु कुलिस तलय ब्यहान तु कामेंट्री बोज्ञान। कुनि कुनि सातु ऑसिख गरिक्य छांडान छांडान वातान तु बेजती वॅरिथ गरु वापस निवान तु बतु ख्यावान।

लाल जियस बडेयि जादय पहान जिमुवॉरी। ज्युठ आसनु सबु ओस यि जरूरी जि तस आसि किरकटस मुतलिक पूर ज्ञान। अमि किन्य ओस सु पनुन्यन जिठ्यन तु व्वसतादन दूहय कृसमु कृसमुक्य सवाल पृछान तु तिमन हुंद्य जवाब मंगान। यिमय जवाब ओस सु पनुन्यन सॉथियन ताम ति वातुनावान। तिमन प्यठ पनुन रोब त्रावनु खॉतरु ओस सु पनुनि तरफु ति कैह नतु कैह तबसरु करान, येमि सुत्य सु यि फिकरी तरिहे जि तस क्या हेचुन व्वन्य किरकटच पूर वाक्फियथ सपदुन्य। ग्वडन्युकुय मैच खत्म गछनुस ताम गॅयि लॅडुकन स्यठाह ज्ञान, कम अज कम तिम ऑस्य यी सॉचान।

पांचन मैचन हुंज सिरीज खत्म गॅछिथ गॅयि लॅडुकु किरकटस मुतलिक स्यठाह वॉकफ। तिमन ऑस व्वन्य अमिक्यन कॉयिदन हुंज ति वाक्फियथ। कुनि कुनि सातु ऑस्य तिम कामेंट्रेरु सुंदिस तबसरुस प्यठ ति तबसरु करान तु पनुन अलग फॉसलु दिवान। “बस, व्वन्य छि अॅस्य पूर पॉठ्य किरकट गिंदुनस कॉबिल”, यि सूंच तिमव। “हरगाह मॅहलुच कांह ति टीम असि सुत्य व्वन्य मैच येछि गिंदुन, अॅस्य छि तयार”, वोन लाल जियन साफ साफ। बाक्यव लॅडुकव कोर चरि पोप।

टीम बनावनु खॉतरु ऑस्य काह बॉज बकार, तिम ऑस्य शेय। मगर अमि सुत्य सपुद नु तिमन कांह मुशिकल। युस कॅड्य तारि वोल प्लाट ओड मील दूर ओस तु युस हाल हालुय तिहुंद्य अॅक्य हमसायन पनुन मकानु बनावनु बापथ मॅल्य ओस ह्योतमुत, अॅस ल्वकटुय तु तथ मंज हेकहन नु काह बॉज अकी सातु कैह गिंदिथ। बेयि सूंच तिमव यि जि हरगाह जरूरथ पेयि, तमाशु वुछन वाल्यव मंजु ति ह्यकोख कैह लॅडुकु फील्डिंग करनु खॉतरु तुलिथ। योताम बैटिंग करनुक सवाल ओस, तमि वख्तु गिंदन तिमव मंजु पांच बॉज द्वयि द्वयि लटि, यि न्युव तिमव फॉसलु वॅरिथ।

अकि दूह रुत साथ वुछिथ कोर लॅडुकव पनुनि टीमुक ऐलान। तिमव करि तुलु लोरि च्वम्बरु जमाह, यिमु ज़न विकटन हुंज कॉम दिहॅन, त्रे बैटिंग तरफु तु अख बालिंग तरफु। बाज़रु ओस नोव बैट मेलान दॅहन र्वपुयन। सु ह्यनस ऑस नु तिमन सूरथ कॅह। सारिनय लॅडुकन हुंद चंदु खर्च जमाह वॅरिथ तु ओरु योर छाँड दिथ समेयि तिमन चोर र्वपुयि। लाल जी, युस ज़्युठ आसनु सबु बिला शक कैप्टन बनन वोल ओस, गव गरु तु तति अँनिन च़ोरिथ अख अस्ल पहान वीरि ज़िन्य हॅट। यि ज़िन्य हॅट आयि अँकिस छानस हवालु करनु येम्य अथ जान स्वंदर बैट बनॉविथ द्युत। छानस लॅज पताह ज़ि लॅडुकन निश छुन च़ोरि र्वपुयि अलावु किहिन्य, तँम्य कॅर नु ज़ोर ज़बरदस्ती कॅह। पुशनय द्युतुनख अख हचुव बीरु मुफ्त। लॅडुकु गॅयि ख्वश। व्वन्य बास्यव तिमन पॅज्य पॉठ्य ज़ि तिम हेकन कुनि ति टीमस चलेंज कॅरिथ। मगर लाल जियस आव क्याहताम खयाल। तँम्य दोप ज़ि बेयिस चलेंज दिनु ब्रॉठ पज़ि असि दून त्रेन दूहन ग्वडु प्रेक्टिस करुन्य।

बेयि आथवारि वॉत्य तिम सोरुय सामानु ह्यथ 'प्ले ग्राउंड।' मँहलु मंज़ु तुलिख त्वकट्य शुर्य बाह मरु ति सुत्य, युथ तिम गिंदनु वख्तु च़रि पोप करन। बैटिंग करनु बापथ आयि चीरि त्रावनु। लाल जियस आव बैटिंग करुनस ग्वडन्युक नम्बर। सु गव ख्वश। कुंदनु, यस पोतुस बैटिंग ऑस करुन्य, द्राव बालिंग करनि। कैप्टन आसनु किन्य दित्य लाल जियन कुंदनस कॅह रुत्य मशवरु 'फास्ट बाल किथु वॅन्य छि लायिन्य तु सुपिन बाल किथु वॅन्यु।' कुंदनन कॅर यि बूज़िथुय कलस ज़ीर, मतलब मे छु सोरुय फिकरी तरान।

लाल जी वोट बैटिंग करनु बापथ क्रीज़स प्यठ। अँद्य पॅख्य कॅरुन तिथु पॉठ्य नज़राह ज़न तु सु कांह बोड बारु बैट्स मैन ओस। ओवरुच ग्वडनिच बाल रटनु ब्रॉठ कॅर लाल जियन गुज़ारिश ज़ि तस गछि ग्वडु अख ट्रायल बाल यिन्य लायिनु। सु गव व्वन्य बाल रटनु खॉतरु तयार तु कोरुन कुंदनस इशारु। कुंदनन लॉय फास्ट बाल, मगर तथ लोग लाल जियस ताम वातुनस कॅह वख। लाल जियन कोड तथ कुनुय टास मगर बाल वॉच नु बालरु सँज़ि जायि ताम ति बराबर। शुर्यव कोर च़रि पोप।

व्वन्य वोट वख ओवरुच ग्वडनिच असली बाल लायिनस। कुंदनु आव दूरि प्यठ दोरान दोरान तु लॉयिन बाल। लाल जी द्राव अख कदम ब्रॉठ युथ ज़न येमि लटि ज़्यादु ताकतु सुत्य हिट मारिहे। मगर ति करनु ब्रॉठुय गव सु आउट। तसुंद मँज़िम विकेट ओस ज़ु गज़ दूर प्यथ मैचि लार्योमुत। लाल जियुन बैट रुद हवहस मंज़ुय। शुर्यव कोर बेयि च़रि पोप। लाल जी ओस मून्य ह्यु खडा। बुथ गोस व्वज़ुल नार।

अमि पतु ऑस मखनुन्य वॉर्य। सु ओस लाल जियस ज़ु वॅरी त्वकुट मगर ओस सेहतु जान। कुंदनु ओस पनुनिस अथस मंज़ बाल नचुनावान। चूकि ग्वडनिच बाल ऑस तँम्य पनुनि हिसाबु फास्ट लॉयिमुच, येमि लटि सूंच तँम्य सुपिन बाल लायिन्य। युथुय तँम्य यि सुपिन बाल लॉय, हालांकि सुपिन वुपिन ऑस नु स्व कॅह ति, मखनु पोक अख रछाह खोवुर कुन तु कोडुन बालि हवहस मंज़ कुनुय टास। बाल वॉच अस्मानस ताम तु चायि शीशु फुटरॉविथ अँकिस बंगलुकिस हेरिमिस पोरस अंदर। शीशु प्यव दर दर करान वॅसिथ। मखनुनस गव फ्रठ। अख तिनि कलु द्राव दारि किन्य तु दिचुन क्रख। अँछ आसस शरारतु सुत्य नार हिशि गॉमचु। अमि ब्रॉठ ज़ि लॅडुकन तरिहे वारु फिकरी ज़ि क्या सपुद, बंगलु मंज़ु आव दोरान दोरान अख मोहन्युव तु रॅटुन मखनुनस गरदन। अमि पतय आव तिनि कलु बीरु ह्यथ अथस क्यथ। तस ऑस सफेद वॅकमीज़

चायि सुत्य बरनु आमुच। तँम्य त्रॉव मखनुस कुनी थापुर। मखनु प्यव पथर। टिनि कलु ओस ज़न पागल गोमुत। तँम्य त्रॉव्य मखनुस बिरयानु कॅरिथ। टीमुक लीडर आसनु किन्य प्यव लाल जियस ब्रॉठ कुन युन। तँम्य कॅर टिनि कलस गुज़ॉरिश, मगर तस लॉय मोहनियव दुदरु चपाथ। यि वुछिथ खोत कुंदनस ज़हर। सु आव दोरान दोरान तु रोदुन मोहनियविस अथु। टिनि कलु आव तु लॉयिन कुंदनस लथ। सु आव दूर लायनु। शुर्य ऑस्य दूरि बिहिथ यि सोरुय वुछान तु वदान। सुती ऑस्य तिम टिनि कलस तु तसुंदिस मोहनियविस वोहव ति कडान। टिनि कलन कॅर मखनुस तु लाल जियस थफ तु छुनु तिमन त्रावानुय। दोपुनख ग्वडु दियिव दून शीशु पटचन, अकि चीनी मेचि हुंदि कपुक्य तु वॅमीज़ छलनुक्य पाँसु, अदु त्रावोवु। यि ओस कुल ऑठ वंपयि वातान। लॅडुकन ओस नु चंदस किहिन्य तु टिनि कलु ओस नु तिमन त्रावनु खॉतरु तयारुय। वति ओस अख नफर पकान। सु चाव मंज़ु। तँम्य कॅर टिनि कलस गुज़ॉरिश जि कुमथ कर रछाह कम। टिनि कलस आव आर। दोपुनस अछा ज़ु वंपयि त्रावु। मगर लॅडकु ऑस्य चंदु खॉली। वति पकवुन्य कॅर अख सॅबील। लॅडुकन दोपुन बैट तु बीरु त्रावुन, यिमन हुंद कुल कुमथ लॅडुकन हुंदि वननु मुताँबिक चोर वंपयि ओस। लॅडकु ऑस्य व्वन्य वदुन ह्यवान। टिनि कलस तोर फिकरी जि तिमन छिनु पाँसु कॅह। तस आव बेयि हना आर। तँम्य त्रॉव्य तिम अथ शर्तस प्यठ जि पगाह वातुनावन तिम तस निश बाकुय पाँसु।

टिनि कलु द्राव पनुन मोहन्युव ह्यथ वापस। वति पकन वोल ति द्राव। लॅडकु ति द्रायि लॉन बनॉविथ पनुन गरु कुन। लाल जी ओस लॉनि बुथि तु शुर्य लॉनि पतु। सारिनुय ओस कलु ब्वन कुन। लाल जी, मखनु तु कुंदनु ऑस्य वुनि पानस फश फश दिवान तु दग शेहलावान। वापसी प्यठ ओस नु सुत्य तुलुन लायख सामानु कॅह। विक्कट आयि प्लाटस मंज़ुय त्रावनु युथ ज़न सनद रोज़ि जि लॅडुकव छु तथ माँदानस मंज़ु ग्युंदमुत। तिमव कोर फॉसलु जि अमि वाकुहुच कथ वनन नु तिम मँहलस मंज़ु काँसि ति। शुर्यन ति थोवुख ठाख कॅरिथ।

लॅडुकन हुंद किरकट गिंदनुक खाब रुद खाबुय। दोयिमि दूह ख्यव तिमव सारिवुय कसम जि तिम गिंदन नु किरकट ज़ांह ति। यि सूचिथ जि कामेंद्री बोज़ान बोज़ान मा तंबलि तिमन दिल, तिमव वोल ट्रांसिस्टर रेडियो अँकिस पलुवस तु थोवुख अँकिस बँडिस संदूकस मंज़ु प्रान्यन किताबन तलु कनि चूरि। युतुय योत नु कॅह, बुथि अँकिस वॅरियस ताम द्रायी नु लॅडकु तमि बंगलु ब्रूह्य किन्य, अमि म्वखु जि टिनि कलु मा रटि तु मंगि बाकुय पाँसु। हालांकि स्कूल वातनु खॉतरु ओस तिमन बेयि ज़ेछि वति किन्य प्यवान युन।

योताम ज़न तुलु कुलिस तल तिहुंजि जायि हुंद सवाल ओस, स्व रुज़ तमि पतु खॉली। लॅडकु ऑस्य खोचान जि यिनु तथ जायि बिहिथ टिनि कलस नज़र पेयि तु रटि। अमि पतु आव वंदु तु शीनु त्रटु पेयि। मगर येमि लटि ओस नु शीनु मोहन्युव कुनी। अँद्य पँख्य ओस सॉरिसुय शिशुर लोगमुत। तुलु कुल्य लंजि आसु ब्वन कुन नॅमिथ तु तमिक्क्यव पनु वँथुरव प्यठ ऑस्य पां फेर्य पशपान। शायद आसुहन तिम लॅडुकन हुंदिस व्वजारु गछुनस प्यठ मातम करान तु वदान।



त्रु-लूर

अमि दूह ऑस चंद्रवार मगर माश्टर जी आव नु स्कूल कैह। तोति रूद्य अँस्य मोहतात। शोर वोर कोर नु कैह। काह बजे बॉग्य येलि यि पकु गव जि माश्टर जियस छुनु अज युनुय, अँस्य गँयि ख्वश। अमि पतु लोग असि ज़ोरु ज़ोरु शोर करुन। अड्यव ह्योत पनुनि पनुनि मश्कि प्यठ तबलु बजावुन तु अड्यव ह्योत बाँथ ग्यवुन। अँड्य ऑस्य थोद वँथ्य वँथ्य क्रकु दिवान तु अँड्य ऑस्य ठहा ठहा कँरिथ असान। सोन शोर बूजिथ आव ह्यड माश्टर साँनिस कमरस मंज तु असि गव दम। तँम्य तुल मँनीटर थोद तु पृछुनस, “कुस कुस ओस शोर करान?” मँनीटरस फूर नु जवाबुय तिक्याजि सु ओस पानु ति माश्टर जियस नक्ल कँरिथ असि परनावनुक ड्रामा करान। ह्यड माश्टरन द्युत असि कान-पकडी हुंद सजा तु असि प्यव माजि हुंद दूद याद। तमि पतु वोन तँम्य साँनिस मँनीटरस असि सबख परनावुन।

साँनिस माश्टर जियस ओस नाव नीलु कँठ। सु ओस रोज़ान हब्बु कँदलु दँरियावु बँठिस प्यठ। तस ऑस्य ज़ु अचकन, अख नीलि रंगु तु ब्याख क्रेहनि रंगु। अकि दूह ओस सु लागान न्यूल अचकन त बेयि दूह कृहुन। जंगन ओस लागान सफेद तंग मुरि पॉजामु तु ख्वरन कृहन्य गुरगॉब्य। कलस ओस लागान हल्कु गवलॉब्य रंगु दसतार।

अँस्य ऑस्य पुंच्यमि जमॉच परान। जमॉच मंज ऑस्य कुल अरदाह लँडकु। सुबुहस प्रेयर परनु पतु येलि अँस्य पनुनिस कलासस मंज वातान ऑस्य, बुथ ओस गछान वदुवुन। अकि अकि टाटस प्यठ लॉनि मंज बिहिथ ऑस्य अँस्य प्रारान माश्टर जी सुंदिस यिनस। येलि सु कलासस अचान ओस, अँस्य ऑस्य थोद वँथिथ तस आदाब अर्ज करान। सु ओस कलु सुत्य जवाब दिवान, कुरसी प्यठ ब्यहान तु हॉज़िरी रजश्टर खोलान। अमि पतु ऑस साँन्य हॉज़िरी सपदान। यसुंद यसुंद रोल नम्बर सु वनिहे, तस ओस आसान थोद वँथिथ जवाब द्युन ‘हॉज़िर जिनाब’। माश्टर जी ओस तस वारु बुथिस कुन नजर दिवान तु तमि पतु ब्याख रोल नम्बर वनान।

असि ओस माश्टर जियुन सख हॉबथ। सु ओस परनॉव्य परनॉव्य असि रथ कडान। हरगाह काँसि पास करनि गछुन आसिहे, तस ओस बुथिस कुन वारु वुछिथ ग्वडु सरु करान जि सु छा पोज़ वनान किनु अपुज। यस नु पँज्य पॉठ्य पास आसिहे आमुत, तस ओस बुथ्युक रंग लेदुरान तु सु ओस दुह्य लद गगुर ह्यु वापस फेरान। हरगाह काँसि लँडकन स्कूलच कॉम आसिहे नु बराबर कँरमुच, तस ओस सु अकी क्रेकि सुत्य मुथुर व्यसुरावान। इशारु ओसुस हावान तथ त्रु-लोरि कुन य्वसु माश्टर जियन दरवाज़स पँत्य किन्य अलूंद ऑस त्रॉवमुच। त्रु-लोरि कुन नज़र प्यथुय आसु लँडकस क्रकु चलान नीरिथ तु सु ओस तस दहि दहि लटि माँफी मंगान तु आयंदु गलती न करनुक वादु करान। हरगाह कांह लँडकु बँडुय पहान गलती ओस करान, माश्टर जी ओस त्रु-लूर तुलिथ तस लँडकस अथु दारनु खॉतरु वनान। बस, पतु मतु पृछ्यतव, पूर कलासस मंज कुस हंगामु ओस सपदान। लँडकस ऑस्य मार ख्यनु वरॉयी गित्य गछान तु बाक्य लँडकु ऑस्य माश्टर जियस तसुंदि बदलु माँफी मंगान।

माश्टर जी ओस असि अकी लटि ख्वश करान। छुटी गछनु ब्रॉटु ओस सु असि पानस निश बेहनावान तु अकि अकि सारिनुय हुंद हाल पृछान। अँकिस ओस मॉल्य संज शैछ पृछान तु बेयिस गाव मरनुक वजह। अँकिस निश फीस न बरनुक वजह मोलूम करान तु बेयिस ग्वरबथ आसनु

किन्त्य पुवर फंड मंजु कैह पाँसु दिनुक वादु करान। अँकिस ओस पृछान जि तस कति छि मॉलिस ड्यूटी, बेयिस निश मोलूम करान जि ब्यमारस क्या ऑस खबर। गरज, माश्टर जियस ऑस प्रथ काँसि हुंज फिकिर तु कुनि नतु कुनि तँरीकु ओस सु प्रथ अँकिस अथु रोट करान। काँसि पाँसु रँग्य, काँसि किताबव रँग्य, काँसि वरदी रँग्य तु काँसि स्कूल नीरिथ ति परनावनु रँग्य।

अँस्य क्याजि अँस्य अथ त्रु-लोरि खोचान तु यि त्रु-लूर क्या ऑस ? यि ऑस स्योद सादु वीरि कुलिच अख मूर, यथ बुथि गंडस निशि त्रे लंजि आसु नेरान। मूर ऑस गंडु पथ कुन तकरीबन त्रे फुट तु गंडु ब्रॉह कुन अख फुट। माश्टर जियन ओस अथ मूरि दल तुलनोवमुत तु पतु तील दिवुनोवमुत। यिहय चोर फुट ज़ीठ लूर ऑस असि शुर्यन क्युत अजाब।

यि त्रु-लूर आयि सॉनिस कलासस मंजु सथ रथ ब्रॉठ। माश्टर जियन अँन्य यि पानस सुत्य तु थँवुन मेजस प्यठ। असि कुन वोनुन रोबु सान, “यि लूर छिवु वुछान।” असि हिलोव कलु। तँम्य वोन, “यि छनु स्योद सादु लूर कैह। यि छे मे बाह वँरी ब्रॉठ जस्तु खॉज कँरिथ गांदरबल बालु कि तँतालि प्यठु खास कँरिथ वालुनॉवमुच। अथ लोरि छु शर्फ जि यि हेकि नु कांह चूरि निथ। अमि सुत्य हरगाह अपुज वनन वॉलिस दब कडव, सु छु पोज वनान। हरगाह काँसि चूर आसि कँरमुच, यि लूर छि तस कुन वुछिथुय अलुरान तु तस कुन कलु फिरान। अथ लोरि छि सुह ताम खोचान।” सुह संजु कथ करान करान तुज माश्टर जियन लूर अथस क्यथ तु रँटन सीनस सुत्य। दोपुन, “बु ओसुस अकि दूह पहलगाम गोमुत। यि लूर ऑसुम सुत्य। चीर्य राथ क्युत डँज मे वथ तु बु गोस पनुन्यन गरिक्यन निश छ्यनु। बु ओसुस वथुय छांडान जि मे वुछ बुथि सुह पकान। बु खूचुस। मे दोप अजु म्वकलेयि म्यानि जिंदुगी हुंज कथुय। युथुय सुहस मे प्यठ नज़र पेयि, सु आव मे जेफि। मगर क्वदरतुन कार, मे ऑस लूर अथस क्यथ तु सुहस लँज यि बुथिस सुत्य। बस पतु मतु पृछ्यतव कैह। सुहन दिच लोरि कुन खोचान खोचान नज़र तु त्रॉवुन कुनी टुख जंगुलस कुन। बेयि लटि ओसुस बु गाडि मंजु सोपोर गछान। गाडि ओस सख रश। मे त्रॉव अँक्य नव जवानन सीट तु बु ब्यूतुस पथर। येलि कंडक्टर टिकट दिनि आव, मे फेरि ऑरकु छट। मे ओसुख चंदय चोटमुत त बँटवु ओसुहम चूरि न्युमुत। कंडक्टरन कोर मे रोब। दोपुन गाडि मंजु वस ब्वन। मे ऑस यि लूर दारि सुत्य व्वदुनी थँवमुच। युथुय मे वापस वसन खॉतरु यि लूर तुज, यि चँज मे अथु मंजु नीरिथ तु आयि पथ कुन अँकिस नव जवानस प्यठ लायिनु। नवजवानन हेचॉयि यि दारि किन्त्य छुनुन्य जि अम्युक लोट फस्यव तस चंदस मंजु। अँथ्य चंदस मंजु ओस म्योन बँटवु। यि ओस सुय नव जवान येम्य मे सीट ऑस त्रॉवमुच। मे दिच क्रख, म्योन बटवु! नव जवानन द्युत यि बँटवु मे कुन वापस दारिथ तु त्रॉवुन गाडि मंजु व्वठ तु चोल। यिथु पाँठ्य द्युत अमि लोरि मे पनुन बँटवु नोन कँडिथ। बेयि लटि ओस म्यानि कलासुक्य अँक्य बचन गरि अपुज वँनिथ स्कूल यिनस छुटी कँरमुच। दोयिमि दूह येलि सु स्कूल आव तु लोरि निशि वोत, लूर पेयि तस खवरन प्यठ। मे तोर फिकरी जि अँम्य छु क्याहताम अतुर कोरमुत। येलि मे तस मार दिनु खॉतरु लूर अथस मंजु तुज, तँम्य ह्योत वदुन तु वोनुन सोरुय पोजु पोजु। बेयि अकि लटि प्यव मे अँकिस बचस खँरिल करनस प्यठ अमि त्रु-लोरि सुत्य अथस प्यठ टास त्रावुन। तस प्यव लोरि हुंद कृहुन आख अथस। अजु गँयि तथ कुसस ज़ु वँरी मगर तस छु सु आख तँती।”

यिमु कथु बूजिथ ओस असि फ्रठ गोमुत। अवु किन्त्य ओस त्रु-लोरि हुंद नाव बूजिथुय असि जुव चलान नीरिथ।

यनु प्यठ माश्टर जियन यि लूर स्कूल अँन्य, तँम्य नियि यि सिर्फ अकि लटि गरु। दोपुन, गरि छु अख बचु सख खँरिल करान तु तस छु अमी लोरि सुत्य मुस्तु वालुन। असि फँट जादय तुर। असि दोप, येलि सु पनुनिस बचस मुस्तु वालि, असि क्या लिहाजु वुछि ?

अज आँस्य अँस्य ख्वश। माश्टर जी आव नु कैह। असि सूच द्रहस तुलव अलुगँड्य तु मलुगँड्य। ह्यड माश्टर सुँदि यिनु सुत्य गव रछाह थ्वथ मगर सु नीरिथुय लोग असि बेयि नचुन तु ग्यवुन मगर ल्वति ल्वति। असि दोप युहय अख द्रह छु गँनीमथ। त्रु-लूर थँव असि अँकिस जायि चूरि युथ नु तथ असि प्यठ नज़र पेयि। ह्यड माश्टर आव नु बेयि असि वुछनि कैह। तस ओस शायद यकीन जि असि आसि मँनीटर ठीख पॉठ्य परनावान।

रिसु वख्तु प्यव निकस खयाल। तँम्य वोन मे कनस तल, “छुना सलाह, त्रु-लूरय करव गॉब।” मे गव यि बूजिथुय हेह। दोपुमस, “माश्टर जियस येलि पताह लागि, सु च़टि ना मुस्तु ?” तँम्य दोप, “पताह कति लग्यस ? बाक्यन शुर्यन वनव नु किहिन्य। लूर आसि गॉब, तथ किथु पॉठ्य पृछि ?” मे बीठ यि कथ। मगर खतरु ओस स्यठाह। अँस्य आँस्य वुनि कथुय करान जि राजस गव शख। दोपुन तोह्य छिवु चूरि चूरि क्याहताम च्वय करान, मे ति वँनिव नतु वनोवु बु माश्टर जियस।” असि दोप यि तुलि पँज्य पॉठ्य फसाद, अँमिस ति पजि लोत पॉठ्य वनुन। येलि तँम्य साँन्य कथ बूज, सु गव ख्वश। दोपुन, “सँबील छि जान, लूर करु बुय गॉब।” असि मोनुस। दोपुस मगर त्रॉव्यजि दँरियावस अंदर। तँम्य कोर आंकार।

राजु वोथ ब्वन तु असि त्रॉवुस लूर दारि किन्य। तँम्य रँट ब्वनु कनि, ओरु योर दिचुन नज़र तु द्राव। ओड गंटाह गँछिथ आव वापस। असि पृछुस, “कतिनस त्रॉवुथ ?” तँम्य वोन इशारव सुती जि दँरियावस त्रॉवुम से-मंज़स। बाक्यन बचन लँज नु कैह पताह तिक्याजि तिम आँस्य साँरी अख अँकिस सुत्य गिंदुनस तु मस कडुनस सुत्य आवुर्य। च़ीर्य येलि अँस्य गरु कुन वापस द्रायि, राजु ओस क्याहताम साँचान। असि पृछुस जि दँलील क्या छि ? मगर तँम्य वोन नु कैह। असि सूच जि सु आसि लूर दँरियावस मंज़ त्रावान त्रावान खूचमुत।

बोमवारि द्रह आव माश्टर जी तु चाव कलासस अंदर। हॉज़री वँरिथ येलि तँम्य प्रुछ जि कालु क्या क्या कोरुवु, असि गँयि छवपु। तस तोर फिकरी जि कालु छु असि सारिवुय असमान नखस प्यठ तुलमुत। ह्यड माश्टरन ति आँस तस कालुच दँलील वँन्यमुच। माश्टर जियन प्रुछ अँकिस अँकिस बचस जि कालु वँम्य वँम्य वँर खँर्यगी, मगर काँसि वोनस नु कैह। अमि पतु छाँड तँम्य पनुन्य त्रु-लूर।

मगर त्रु-लूर आयि नु अथी। दरवाज़स पँत्य किन्य, मेज़स त्ल, टाटस तलु कनि, अलमार्यन मंज़, साँरिसुय दिचु तँम्य छाँड, मगर त्रु-लूर आँस नु कुनी। मँनीटरस ति आँस नु कैह पताह। माश्टर जियस खोत सख शरारथ। तस तोर फिकरी जि वँम्य ताम बचन छि चाल वँरमुच। तँम्य ह्योत अकि अकि पृछुन। बु ओसुस निकस कुन वुछान तु निकु ओस राजस कुन वुछान। थँकिथ हॉरिथ वोन माश्टर जियन असि, “त्वहि मंज़य छि वँम्य ताम लूर नीमुच चूरि मगर तोह्य छिवु नु वनान। हरगाह पगाह सुबहस लूर वापस पनुनि जायि आँस नु, अकि अकि च़टोवु मुस्तु तु त्रावोवु ख्वरन तल।” यि वँनिथ वँर माश्टर जियन असि कुन तिथु पॉठ्य नज़र ज़न तु जिंदय च़ापिहे। निकन, राजन तु मे कोर फॉसलु जि हरगाह दालु ति वालन, पँज कथ कडव नु नँनी।

बदवारि दूह येलि माश्टर जी स्कूल आव, तस ओस त्रु-लूर सुत्य। अँस्य अँस्य हॉरान। मे त्रॉव राजस कुन नज़र। सु ओस हयबुंग। मे ओस नु यिवान समजुय ज़ि लूर हय राजन दँरियावस अंदर त्रॉव, मास्टर जियन कति अँन्य यि बेयि। अम्युक मतलब ओस साफ ज़ि यि अँस नु पँज्य पाँठ्य स्योद सादु लूर कैह, बँल्यकि अँस करामाँती लूर। अँस्य अँस्य माश्टर जी सुंदिस बुथिस कुन वुछान। तसुंद बुथ वुछिथ ओस बासान ज़न तु तस स्यठाह दूख छु वोतमुत। तँम्य थँव त्रु-लूर मेज़स प्यठ तु वोनून असि कुन, “राथ गव अतुर। मे वोनूमवु त्वहि बद रद, मगर खता ओस मे पानस। मे छि दर-अस्ल यि लूर बटवारि दूह पानस सुती गरु नीमुच, मगर मे ओस नु अम्युक ज्वनुय। मे पेयि अज़ सुबहस अथ प्यठ नेरान नेरान नज़र। यि आसिहे मे योरु निथ आंगुनस मंज़ त्रॉवमुच। बु छुसवु त्वहि ज्युठ अँसिथुय माँफी मंगान।” तँम्य युथुय असि माँफी मँज, असि ह्योत सारिवुय वदुन। माश्टर जी आव असि निश तु अकि अकि कोरुन असि नालुमोत। खास कँरिथ तुलिन तिम बचु ख्वनि मंज़ यिमन प्यठ तस ज़्यादु शख ओस तु यिमन तँम्य जादु ब्यवॉरी अँस कँरमुच।

रिसु वक्तु वँथ्य अँस्य साँरी गिंदुनि मगर राजु वोथ नु असि सुत्य कैह। सु रूद कलासस मंज़ुय। दोपुन मे छि काँम करुन्य। रिसु पतु येलि अँस्य तु माश्टर जी वापस कलासस मंज़ खँत्य, असि वुछ राजु अँकिस कूनस मंज़ बिहिथ टुंगि वदान। तँम्य ओस कलु त्रोवमुत जंगन मंज़। माश्टर जियस तोर फिकरी ज़ि तस छु म्यॉन्य माँफी हेन्य दिलस सनेमुच तु अवय छु सु सारिनुय चूरि वदुन ह्यवान। माश्टर जियन तुल सु पनुनि ख्वनि मंज़ तु बेहनोवुन पानस सुत्य। माश्टर जियन वोनूस, “व्वन्य क्याजि छुख चु वदान? त्रु-लोरि हुंज कथुय म्वकलेयि। मे अँस गलती गाँमुच तु अवय हेचुम माँफी। माँफी ह्योन गव जान। अमि सुत्य छि पाफ वसान नखु।” यि वँनिथ द्युत माश्टर जियन तस बुथिस फश। मगर माश्टर जियुन अथु बुथिस लँगिथुय ह्योत राजन बेयि टुंगि वदुन तु कँरिन माश्टर जी सुंदिस अथस म्वन्य तु मीठ्य। तमि पतु दोपुनस, “माश्टर जी! मे दिविय माँफी?” माश्टर जियन वोनूस, “सु क्याजि? चे क्या कोरुथ?” अँस्य पँक्य ब्रॉह कुन तसुंज कथ बोज़नु खॉतरु। राजन वोन, “लूर अँसवु नु त्वहि गरु नीमुच कैह, स्व अँस मे चूरि नीमुच।” साँरी बचु गँयि हॉरान। माश्टर जी ति गव हॉरान। दोपुनस, “यि क्या छुख चु वनान? मे हय स्व लूर पनुनि गरि लँब!” राजन वोनूस, “माश्टर जी! लूर गाँब करनुच चाल अँस असि त्रेयव कँरमुच। बु वोतुस यि लूर दँरियावस मंज़ त्रावनु खॉतरु यारबल, मगर तति आम नु व्यस्तार कैह। तति अँस्य कैह नफर श्रान करान। अमि पतु द्रास बु यि कँदलु प्यठु दॉरिथ दिनु खॉतरु ज़ि मे वुछ दूरि पनुन मोल यिवान। तस वुछिथ तुज मे दव मगर बुथि अँस नु चलुनस वथुय। बुथि ओस कन्युव देवार। मे दोप यिनु मे मोल वाति ब्रॉह कुन तु रट्यम, मे दिचु लूर अमि देवारु पेट्य आंगुनस मंज़ दॉरिथ। शायद आसिहे सु तुहुंदुय आंगुन।” असि कुन वुछिथ वोन राजन, “मे वोनूमवु नु त्वहि ति कैह तिक्याजि बु खूचुस ज़ि तोह्य मॉरिव मे।”

माश्टर जी गव हॉरान ज़ि लोरि हुंदि खोफु सुत्य कोताह मुश्किल कदम छु राजन तुलमुत। तस बासेयि यि लूर व्वन्य स्वरुफ। मगर सुती गव ख्वश। दोपुन राजन वोन पोज़ तु पज़रस छुनु कांह ज़वाल। तँम्य दिचु तस माँफी।

माश्टर जियन बेहनाँव्य शुर्य पथर तु दोपुनख, “यि लूर छनु करामाँती लूर कैह। यि अँस मे पनुनिस आंगुनस मंज़ अँकिस वीरि कुलिस चँटमुच। मे यि कँछा त्वहि अथ मुतलिक वोनमुत ओस, सु ओस सोरुय अपुज। बु ओसुस नु ज़ांह यछान त्वहि प्यठ अथु तुलुन तिक्याजि तोह्य

छिवु मे पनुन्यन शुर्यन हुंघ पॉठ्य। म्योन मुदा ओस सिर्फ त्वहि लूर हॉविथ बीम थवुन युथ ज़न तोह्य हमेशु जान कामि वॉरिहिव, पॅरिहिव तु लीखिहिव।” माश्टर जियस लोग यि वनान वनान होट। अमि वख्तु कोर असि माश्टर जी सख ख्वश।

स्कूल बंद गछनु वख्तु तुज माश्टर जियन त्रु-लूर सुत्य। दोपुन, यथ चीज़स बचु खोचन, सु चीज़ थवुन छु गलथ। तॅम्य दोप, यि त्रु-लूर छुनु बु व्वन्य जॉलिथुय युथ ज़न अम्युक नाम निशानुय मिटि। मगर तॅम्य ह्योक नु ति वॉरिथ कॅह। निकन त्रोव पनुन पान त्रु-लोरि प्यठ तु दोपुनस, “माश्टर जी! यि त्रु-लूर थॅविव येत्य। येलि त्वहि तबदीली गछि, यि रोज़ि असि निश तुहुंद निशानु।” माश्टर जियन त्रॉव लूर अॅती।

माश्टर जी द्राव गर कुन। मे पैयि नज़र। सु ओस पकान पकान रुमालि सुत्य पनुन ओश व्वथुरावान।

